

# Panongpolong Sivenga aka Luk i wat i Luk

## Ritetong nge a Luk

Panongpolong Sivenga aka Luk i wat i, kene i wat i mo aro i opoal toko omole aka iion a Tiopilus, ini toko pomnga omole. (Aro o thepol a Luk 1:1) Ava ini toko pomnga omole aka a Rom. Na Luk i sis ve aro Tiopilus ilemi nine nge a Jisas imanenga, na ile mimiong, na ile rinong, na ile los wereraing. Na i sis mun ve aro ilemi mire senu aka ve, Jisas ini toko aka God i ateal i ve aro i el werer ile tokokoere, na i pavurvur aka aro i pamimi Judare na areko or ini Judare avele mun. Ini toko alavusnga ake ru a ulue, opamimingaa. Na Luk i wat rirumong pulua tie nge a Jisas aka i voth a Matiu na Mak lemi avele. (Aro o thepol ritetong aka i voth a mukaling a Matiu ile erere nge.) Na Panongpolong Sivenga aka Luk i wat i, kene ini ile riong pateanga aka aro i wat i a Tiopilus nge, na i patopalal i nge ile erere aka te apet i ve ini "Pakekere ole Omaing." (Pakeke 1:1,2) Na nge a Luk ile riong patopalalnga nge ile erere ake, te thepol aka ve, Jisas i ria ile wainlangaere ve, aro o men tetal nge a God ile sungong aka ini Oni Riringa. (Luk 24:29) Na nge Pakekere ole Omaing pateanga i ri vene mun re aken, aken i pathengal it aka ve, Panongpolong Sivenga aka Luk i wat i, tomo mun nge Pakekere ole Omaing aka Luk i wat mun i, kene or paini ini

rirumong omole inga ako i ritet nge a Jisas na ile pakekere ole panongpolong nge i.

*Luk i wat Panongpolong Sivenga ake a Tiopilus nge.*

<sup>1</sup> Ine toko pulua aka o tongporum nge aka aro o wat tenesing nge ur areko i velpol aka ru a them nge aka nge a Jisas ile omaing. <sup>2</sup> Ma o wat i ranga ve aka them nongpol i, na them tital i nge areko o thepol ipateanga ma o panongpol nge riong sivenga aken. <sup>3</sup> Make ranga ve i sivenga nge tho aka tho wat tenesing ake mo tho pasong i a wong a Tiopilus nge wot, aka ini mukalinga pomnga. Eneke nomenga vet aka me, tho nin senu nge ur alavusnga areken opateanga. Make tho wat vengveng ur areken ole velpoling. <sup>4</sup> Make tho wat ake mo aro lomum mire senu nge riong areton ong nongpol i kene i nunganga.

**Jon aka ini toko paninuonga inina  
ome a Jisas inina oa tenesing**  
(Vonge 1:5–2:52)

*Ensel i ritet nge a Jon aka ini toko paninuonga ile velpoling.*

<sup>5</sup> Na nge wop lemi aka Herot ini nepes a Judia. Na Sekaraia ini pris omole aka i voth nge pris avlung aka o apet i ve ini a Abija ile. Na iewo sengenga ini a Aron aka ini pris tel a mukaling, ilenga, ma iion a Elisabet. <sup>6</sup> Na or paini o vengveng a God itheki. Na o panes senu a God ile patorong na ile riong alavusnga. Na o oma vothung kerenga e avele a God itheki. <sup>7</sup> Aveto

otutun e avele, eneke Elisabet i sarit. Ma or paini kene, e i tolok na e i kimeitu lale.

<sup>8</sup> Ma nang omole aka pris avlung aka Sekaraia i voth nge, o oma pris a omaing a Lotu Tepun a Vel aka, na Sekaraia i oma mun pris a omaing nge. <sup>9</sup> Na prisre o panes ole vothung ma o otiktok um ma Sekaraia ile i prilpot, mako o ateal i mo i eso a Toko Pomnga ile Lotu Tepun a Vel lemi aka o pavothal nge, mo aro i ongtun sungong una vrunga a God nge la. <sup>10</sup> Na nge wop lemi aken toko na seng pulua aka ru o voth a lalanga ma o nong.

<sup>11</sup> Na Toko Pomnga ile ensel omole e aka i velpol a Sekaraia nge. Ma i mit telek a epee a imeni sivenga nge anga, a sungong a lekleka aka o oma sungong una vrunga nge. <sup>12</sup> Ma Sekaraia i thepol ensel aken ma i kukuk ma i ngange i. <sup>13</sup> Aveto ensel i ria Sekaraia ve, “Sekaraia wong mothong tova wong ngange. God i nongpol lom nongong lale. Na ewom sengenga a Elisabet aro i pop itun tomonnga e. Naro wong apeta iion a Jon. <sup>14</sup> Naro opom lemi aro i ngo senu naro lomum sivenga nge, naro toko na seng pulua aka aro olemi sivenga mun nge ile velpoling. <sup>15</sup> Eneke aro i velpol ini toko kimanga a God itheki. Na i mothong tova aro i thin vain na thei engenga. Naro i vual nge a God Ioni Riringa na i patea nge aka rongan i voth a inina iopo lemi. <sup>16</sup> Naro i wol werer toko na seng pulua aka ru a Israel, mo o lo werer a God nge aka ini oa pomnga. <sup>17</sup> Naro i mukal a Toko Pomnga nge, mo aro i oma tokokoere mo aro o monsi nge a Toko Pomnga ile esong me. Naro i eksing oa vovoere olemi mo aro olemi esal otutunre. Naro i eksing tokokoe areko

o avsa a God ile riong mo aro o el lemi rumong sivenga ranga ve ini toko vengvengare. Na God aro i sungu Ioni Riringa na ile engenging a i nge ranga ve nomenga ako i sungu i a Elaija nge.”

<sup>18</sup> Na Sekaraia i ria ensel ve, “Aro lemik mire nge vava aka lom riong aken i nunganga, e? Eneke tho toloku lale, na ewok sengenga i kimeitu mun lale.”

<sup>19</sup> Na ensel i olal ile riong ve, “Tho ini a Gabriel aka tho mit a God itheki. Ma i pake tho me ve aro tho ria wong nge ritetong sivenga ake. <sup>20</sup> Na wong nongpol. Aro wong rises ol naro wong ri avele, i pavurvur nge nang aka aro ur elonga areken aro i velpol. Eneke lomumo e lek riong avele. Na lek riong aro i velpol vengveng nge nang aka God i ateal i lale.”

<sup>21</sup> Ma rongan o mit total a Sekaraia aka i voth palolo a Lotu Tepun a Vel lemi, ma olemi pelekpol, eneke olemi ve, “I vova ake Sekaraia i voth palolo a Lotu Tepun a Vel lemi, e?” <sup>22</sup> Ma nge aka i korpot, i pavurvur aro i ria a or nge avele, ma olemi mire aka ve, i thepol ur relnga e lale a God ile Lotu Tepun a Vel lemi, na i paateal inga or aka nge imeni, eneke i rises.

<sup>23</sup> Ma nge aka Sekaraia ile omaing i vus, mako i lo werer ol a ile vel la.\* <sup>24-25</sup> Ma palolo avele, nako Elisabet iopo. Mako i ria ve, “Nomenga lek maral nge aka tho sarit, aveto ponange Toko Pomnga ilemi esal tho, mako i oma ur ake a tho nge ma i eltetpot ur aka lek maral nge nomenga a toko na sangre otheki.” Ma i men kine inga a vel lemi

---

\* <sup>1:23:</sup> Sekaraia i um nge wik omole.

i pavurvur nge ngov or lim aka tokokoere o ate i  
ako iopo lale.†

*Ensel i ria Maria ve, “God i ateal ong ve aro wong pop Itun.”*

<sup>26</sup> Ma nge aka Elisabet kene iopo ma ia ngov or limae, na God i pakepot ile ensel omole aka iion a Gabriel, a rem aka a epee a Galili aka iion a Nasaret. <sup>27</sup> Ma i es a seng ovote omole aka o ateal i ve aro iewo a toko omole aka iion a Josep, ini nepes a Devit ilenga. Na seng ovote aken iion a Maria. <sup>28</sup> Ma ensel a Gabriel i es a i nge la. Ma i ria i ve, “Toko Pomnga i voth tomo nge wong, na opom aro i ngo pis naro Toko Pomnga aro i oma senu nge wong.”

<sup>29</sup> Ma Maria i nongpol riong aken ma ilemi pelekpol nge, ma ilemi rum riong aken kene, i mirenga vava. <sup>30</sup> Ma ensel i ria i ve, “Maria wong mothong tova wong ngange, eneke God i themosal ong. <sup>31</sup> Wong nongpol, aro opom mo aro wong pop totomone e mo aro wong apeta iion mo ini a Jisas. <sup>32</sup> Aro i velpol ini toko kimanga. Naro o apet i ve ini a God aka i roro rintet Itun. Na God aro i pamena i ini nepes, ranga ve ini itevinga a Devit. <sup>33</sup> Aro i velpol ini nepes nge a Israelre evelelnga, naro nge ile menong e nepes aro ile vusonga avele.”

<sup>34</sup> Na Maria i nin a ensel ve, “Ur ake aro i velpol vava? Eneke tho ngo tomo e toko e avele.”

---

† **1:24-25:** Na nge Judare ole vothung aro ve seng i kimeit lale na iopo aro ile mara avele. Aro or alavusnga o risea nge aken.

<sup>35</sup> Ma ensel i olal ile riong ve, “God Ioni Riringa aro i eso a wong nge, naro God ako i roro rintet ile engenging aro i seltun ong, maken aro wain riringa aka aro ong pop i aro o apet i ve ini a God Itun. <sup>36</sup> Wong nongpol, lomnga e aka iion a Elisabet aka i kimeitu lale na o ri ve i pavurvur aro i pop ol wain e avele, aveto ponange ia ngov or limae lale aka iopo nge. <sup>37</sup> Eneke ur e avele i klip nge a God aka aro i oma i.”

<sup>38</sup> Na Maria i ria ve, “Nongpol, tho ake ini a God ile umonga, aro i oma i a tho nge ranga ve aka wong ri nge.” Mako ensel aken i los lelpot i.

*Maria i losa ma i es mo i porum a Elisabet.*

<sup>39</sup> Na nge wop lemi aken Maria i losa ma i es viri viri a rem a wop epee a Judia aka ini pen polemire. <sup>40</sup> Ma i eso a Sekaraia ile vel ma i ria ve, “Elisabet, ong kath?” <sup>41</sup> Ma Elisabet i nongpol a Maria ikei, ma povothvoth aken i siu sia rintet a iopo lemi. Na Elisabet i vual nge a God Ioni Riringa. <sup>42</sup> Ma i presa viringga ma i ri ve, “Sapase wong, na God ile omaing nge wong, i aolonga nge seng alavusnga aka i oma i nge or. Na sapase mun wain aken ru opom nge. <sup>43</sup> Na tho ini seng ao aka ok Pomnga inina i es me mo i porumtet tho, e? <sup>44</sup> Na lemik mire aka ong ini ok pomnga inina, eneke aka tho nongpol keum ma ine povothvoth ake a opok lemi, ilemi sivenga ma i siu sia. <sup>45</sup> Na lom lemi sivengaing i aolonga, eneke lomumo nge ur aka Toko Pomnga i ri nge wong aka aro i velpol nunganga.”

*Maria ia voing aka i risea a God nge.*

<sup>46</sup> Ma Maria i ri vene:

“Lemik i papomnga Toko Pomnga.

**47** Na onik ilemi sivenga nge a God  
ako ini lek pamimionga.

**48** Eneke ilemi esal tho ini ile umonga vulutnga.  
Ma i patea ponange na panen  
naro toko na seng alavusnga,  
aro o apet tho ini seng ako God i oma senu  
nge tho.

**49** Eneke God ako i pomnga rintet,  
ile omaing a tho nge,  
i aolonga na iion kene i riritet.

**50** Na i kene i themosal toko na seng areko o  
papomnga i  
ranga ve nge toko alavusnga  
ako o mimi nomenga na ponange na  
panen.

**51** Na God i oma omaing aolonga  
ako i athepu areko olemi i vual nge mago-  
ning.

**52** Ma i paesu nepesre ako ru a ole menongare nge,  
na i paposnga or.  
Na i papomnga toko vulutngare.

**53** Na areko o men mesi,  
i pavual or nge ur sivesivengare.  
Na i pakepot toko le urngare  
ma o es ol alapronga la.

**54** Na nomenga i kin riong tomo nge ar pom-  
pomere  
na ponange i oma ol i lale.

Na i opoal mun ile umonga Israelre lale.

**55** Ma ilemi rum ile themosaling nge a Abraham  
tomo mun nge ititeviere ako aro o velpol  
panen.

Na ile themosaling aken aro ile vusonga avele.”

<sup>56</sup> Na Maria i voth tomo nge a Elisabet i pavurvur nge ngov or me. Lamako i lo werer mun a ile pen la.

*Elisabet i pop a Jon ako aro i paninu tokokoere.*

<sup>57</sup> Ma ine nang i velpol nge ako aro Elisabet i pop itun ma itun aken ini totomone. <sup>58</sup> Na ile pen lemiare na ilengare o nongpolo aka God ilemi esal i ma i oma omaing sivenga rintetnga nge i, mako or alavusnga olemi sivenga tomo nge i.

<sup>59</sup> Lama nge nang or limmenga o es mo aro o is ile, ma o ri ve o apet iion a Sekaraia mo ini itema iion. <sup>60</sup> Aveto inina i ri ve, “Avele! Aro iion a Jon.”

<sup>61</sup> Na o ria i ve, “Aveto lomnga e avele aka iion venen aken.”

<sup>62</sup> Ma o oma inga paatealing aka nge omeni a itema nge, aka o nin i ve, i sis ve aro i apeta ol wain aken aro iion ol vava. <sup>63</sup> Mako i nong a or nge ur e aka aro i watu i nge. Mako i watu ve, “Iion a Jon.” Ma or alavusnga o kukuk nge. <sup>64</sup> A ur e avele na Sekaraia iwo i thep werer, nako i palav ol. Na i patea ol nge a God iriseanga. <sup>65</sup> Ma ile pen lemiare o thepol ur aken i velpol ma o kukuk rintet nge. Ma ur aken i kima a pen elonga aka ru a wop a Judia epee aka ini pen polemire.

<sup>66</sup> Ma tokokoere o nongpol ur aken, ma olemi pelekpol nge, ma o nin pel ve, “Naro wainlanga aken panen aro i velpol aro ini toko le vanga?” Eneke o ate aka ve, Toko Pomnga ile engenging i voth a i nge.

*Sekaraia i ripot a God ile riong.*

- 67** Ina Sekaraia ako ini a Jon itema i vual nge a God Ioni Riringa na i ripot a God ile riong ve,
- 68** “Aro te risea Toko Pomnga  
ako ini Israele ole God,  
eneke i es me lale  
na i el werer ilengare.
- 69** Na i sungpot ler pamimionga engenga  
ako ini ile umonga a Devit itevinga
- 70** ranga ve nomenga i ripot i  
a ile riong elnga riringare owo.
- 71** Na i sungpot ler pamimionga  
mo aro i el werer it  
a ler ngarangre omeni,  
na nge tokokoe areko oni silal it.
- 72** Mako i oma nunganga  
ile themosaling  
a ititeviere nge.  
Na i oma ile riong kinnga riringa  
ako i oma tomo i nge or nomenga.
- 73** Na nge ile riong kinnga aken  
i ri nunganga a titevir a Abraham nge ve,
- 74** ‘Aro i el werer it  
a ler ngarangre omeni,  
mo aro te oma ile umong  
tomo nge ngangeong avele.’
- 75** Maken aro e nang elonga ako aro te mimi nge,  
aro te voth toko vengvenga  
na toko riringa a itheki.
- 76** Na wong, tuk.  
Panen aro o apet ong ini a God ako i roro  
rintet ile riong elnga.  
Eneke aro wong mukal e a Toko Pomnga  
mo wong monsi ile sovengalo.

- <sup>77</sup> Naro wong ria ile toko na sengre  
 mo olemi mire nge ako  
 aro ilemi simikal ole vothung kerenga  
 naro i pamimi or.
- <sup>78</sup> Eneke ler God i vual nge themosaling  
 na i ranga ve ini nang le tolilisong  
 aka i esu a Pen a Urvet me.
- <sup>79</sup> Ma i totun it  
 tomo nge areko o voth a mideng  
 na a rinong lemi  
 mo aro i pathengal it  
 nge ler sovengalo aka nge lemi moring.”
- <sup>80</sup> Na wainlang aken i poma ol ma God Ioni  
 Riringa i paengeng i, na i voth a pen polpolnga,  
 makola i pavurvur nge nang aka i velpol pat ol a  
 toko Israelre otheki.

## 2

### *Maria i pop a Jisas.*

<sup>1</sup> Nge wop lemi aka Jon rongan i povothvoth, nepesre ole nepes aka iiion a Sissar Ogastus i sung riong engenga aka ve, aro o el toko na sengre oion, nge pen alavusnga aka Rom a gavman i theal i. <sup>2</sup> Na nomenga gavman i oma venen aken avele. Na ake ini ole omaing teltelinga aka o el toko na sengre oion. Nge wop lemi aken Kwirinius aka ini toko Rom, ini mukalinga nge wop aka a Siria. <sup>3</sup> Mako toko na sengre o es a ole pen tepun omole omole mo o watu oion.

<sup>4</sup> Ma ina Josep i lospot a rem a Nasaret a epee a Galili ma i es aka la a Betlehem, aka a epee a Judia, ini wop aka o pop a nepes a Devit nge. Na Josep i es nge la, eneke ini a Devit ilenga. <sup>5</sup> Ma

i es tomo nge a Maria ako o ateal i ve aro ini iewo, na i kene iopo ma o es mo aro o watu oion. <sup>6</sup> Na rongan o voth a Betlehem na i vengtun nang aka aro Maria i pop itun nge. <sup>7</sup> Ma i pop itun tengen aka ini totomone. Ma i auval i na i pangou i a mekeremre oa aning le ngoinga. Enekeomei ol e avele aka ru a ngoaloinga a vel.

*Enselre o panongpol sipsip thealngare nge aka Maria i pop a Jisas.*

<sup>8</sup> Na nge epee aken sipsip thealngare o theal ole sipsipre pemlik nge wop aka pililre nge. <sup>9</sup> Ma Toko Pomnga ile ensel i velpol a or nge. Na Toko Pomnga ile tolilisong i totun or ma o ngeip rintet. <sup>10</sup> Na ensel i ria or ve, “Thomu o mothong tova o ngeip. Nongpol, tho pasong panongpolong sivenga ake a thomu nge me, aka aro i pavelpol lemi sivengaing aolonga a toko na seng alavusnga nge. <sup>11</sup> Nge nang ake ponange aka ru a rem aka ini a Devit ile, seng omole aka i pop lomu pamimionga, ini toko aka God i ateal i ve aro i el werer thomu. Na ini Toko Pomnga. <sup>12</sup> Naro thomu o ate i tova o thopol povothvoth aka o auval i na i ngo a mekeremre oa aning le ngoinga, aken ini lomu paatealinga.”

<sup>13</sup> Na a ur e avele na ensel avlung aolonga aka a Pen a Urvet o velpol ma o voth tomo nge ensel aken. Ma o vo na o risea a God ve,

<sup>14</sup> “Te risea a God  
ako i voth roro a Pen a Urvet.  
Na toko na seng areko a ulue  
ako ilemi sivenga nge or,  
o vual nge lemi moring.”

*Sipsip thealngare o es ma o thepol a Jisas.*

<sup>15</sup> Ma enselre o plos lelpot or, ma o es werer a Pen a Urvet la. Na sipsip thealngare o ria ol pel ve, “Ita! Te es a Betlehem mo te thepol vet ur aken ru i velpol.”

<sup>16</sup> Ma o losa ma o es viri viri la, ma o kath ma o thepol a Maria ome a Josep na wain aken i ngo a mekeremre oa aning le ngoinga. <sup>17</sup> Ma o thopol i, lamako o es la ma o ritet nge uneke ako ensel i ria or nge wain aken. <sup>18</sup> Ma toko alavusnga ako o nongpol riong ako sipsip thealngare o ri nge, ma olemi pelekpol nge. <sup>19</sup> Aveto ur alavusnga areken Maria i pango i a iopo lemi ma ilemi voth ol inga nge. <sup>20</sup> Na sipsip thealngare o lo werer mun a sipsipre nge la, ma o vo na o risea a God nge ur alavusnga areko o thepol i na o nongpol i ako ranga ve ensel i ria or nge.

*Maria i apeta ol itun iion a Jisas.*

<sup>21</sup> Ma nge nang limmenga, nge nang ako aro o is ile, o apet iion a Jisas. Ion aken ensel i ria Maria nge nomenga ako iopo nge i rongan.

<sup>22</sup> Lamako nang i velpol ako aro o pariri osivenga a God itheki\* ako ranga ve Moses ile patorong i ri nge. Mako itema ome inina o mane tomo i a Jerusalem la mo aro o pariri osivenga, na e mun i ako aro o sungu i a Toko Pomnga imeni. <sup>23</sup> Na or paini o panes a Toko Pomnga ile patorong ako i ri vene:

“Na otun tomonnga elonga ako ini tengen

\* **2:22:** Seng i riri a God itheki avele i patea nge ako i pop na i pavurvur nge nang mule pa penel.

aro o sungu i a Toko Pomnga nge mo ini ile.”

*Kisim Bek 13:2,12,15*

**24** Na or paini o ol pothu or aini ma o oma mun ole sungong nge, aka ini ole paririonga ranga ve aka Toko Pomnga ile patorong i ri nge.

*Simeon i thepol a Jisas.*

**25** Na nge wop lemi aken toko omole aka i voth a Jerusalem, iion a Simeon. Ini toko aka ile vothung i vengveng na ini toko aka i lotual a God. Na i thealal toko aka aro i eltetpot Israelre ole lemi kerereong. Na Oni Riringa i voth a i nge. **26** Na Oni Riringa i ria tel i lale aro i rin tel avele i pavurvur tova i thepol tel Toko Pomnga ile toko aka i ateal i ve aro i el werer ile tokokoere. **27** Ma Oni Riringa i palosa i ma i eso a Lotu Tepun a Vel a lok lemi ma Jisas itema ome inina o pasong i mo aro o oma vothung aken a i nge aka ranga ve Moses ile patorong i ri nge. **28** Na Simeon i manea i na i ri sivengaing a God nge. **29** Na i ri ve,

“Toko Pomnga,

ponange wong oma i

ranga ve aka ong ria tho nge nomenga.

Na tho ini lom umonga

na modop tho

mo tho rin tomo ol nge lemi moring.

**30** Eneke thekik i thepol lom toko lale

ako aro i pamimi them

**31** aka ong pavelpol i lale

a lom toko na seng alavusnga otheki.

**32** Na ini the lalainga

ako aro i pathengal lom sovengalo

nge tokokoe areko ini Judare avele.

Naro o paesa lom toko Israelre oion roro nge i.”

<sup>33</sup> Na Jisas itema ome inina olemi pelekpol a lemi sivengaing we nge riong areko Simeon i oma i nge i. <sup>34</sup> Ma Simeon i ri ve aro God i oma senu nge or, na i ria Maria, ako ini wain aken inina, ma i ria i ve, “Nongpol, God i ategal wain ake ve aro i paru toko Israel pelie a God itheki naro i paro pelie. Naro i ranga ve ini paatealing ako a God nge, naro toko pulua aro okei enal i. <sup>35</sup> Mako ole lemi rumong ako i ngo kine aro i velpol pat ol. Na lemi kerereong ako i ranga ve ini peang wowonga ako aro i pun sivengom lomum.”

### *Ana i thepol a Jisas.*

<sup>36</sup> Ma seng omole e ako i voth, ini a God ile riong elnga, iion a Ana. Na ini a Panuel itun ako ini a Aser ilenga. Na i kimeit rintet lale, na nomenga ako i peange ma i voth tomo inga nge iewo nge tovu po or limai. <sup>37</sup> Lamako iewo tomonnga i rin, na i voth basu na ia tovu po or mule pa limme pothoi or penel. Na i lo lelpot Lotu Tepun a Vel a lok lemi avele. Na nge nang na mlik i sem na i nong na i lotual a God. <sup>38</sup> Na Simeon ile riong i vusu inga na Ana i velpola ma i ri sivengaing a God nge, na i ri mun nge wain aken, nge areko o thealal nge a God mo i el werer a Jerusalem a ngarangre omeni.

### *Jisas ome itema na inina o lo werer a Nasaret la.*

<sup>39</sup> Ma nge ako Josep ome a Maria o oma vus ur elonga areko ranga ve ako Toko Pomnga ile patorong i ri nge, lamako o lo werer a ole rem a

Nasaret aka a epee a Galili. <sup>40</sup> Ma wainlang aken i poma, ma i engeng, na ile mire i aolonga, na God ile themosaling i voth a i nge.

*Jisas i voth tomo nge patoralingare aka a Lotu Tepun a Vel a lok lemi.*

<sup>41</sup> Na nge tovu po elonga Jisas itema ome inina o es a Jerusalem nge aning aka o apet i ve ini “Pasova”. <sup>42</sup> Na Jisas ia tovu po or mule pa omole pothoi or aini ma o panes ole vothung aka o eses nge aning aolonga aka ro a Jerusalem. <sup>43</sup> Lamako aning aolonga aken i vus, mako o lo werer ol, aveto wainlang a Jisas rongan i voth a Jerusalem, na itema ome inina ole mi mire avele aka rongan i voth. <sup>44</sup> Na or paini o rivenga i ako ru i es tomo nge toko na sengre aka o es tomo nge or la. Ma or paini o es e nang alarolnga na or paini o kath i a olengare nge na o thangangaere nge. <sup>45</sup> Ma or paini o kath, ma o kath, ave o thepolo i avele. Mako or paini o lo werer mun a Jerusalem la mo o ortet mun i nge. <sup>46</sup> Ma nang menga o thopol i aka i men a Lotu Tepun a Vel a lok lemi. Na i men tomo nge pamirealingare nge a Moses ile patorong, ma i nongpol ole riong ma i nin mun or e ninong pelie. <sup>47</sup> Ma tokokoere aka o nongpol ile riong, o kukuk nge ile mire na nge ile riong olalngare. <sup>48</sup> Ma or paini o thepol i ma o kukuk rintet nge. Ma inina i ria i ve, “Tuk, ong vova ake ong oma ol vene ake nge them paini, e? Na them e tomom, lemimem kerere nge wong make them kath ong.”

<sup>49</sup> Ma i olal ole riong ve, “I vava ake thomu paini o kath tho, e? Thomu paini lomumu mire avele?

Wop omole ako aro tho voth inga nge ako ini ok Vovo ile vel.” <sup>50</sup> Aveto or paini olemi mire nge ile riong aken mirenga e avele.

<sup>51</sup> Lamako Jisas i lo werer tomo ol nge or paini a Nasaret la. Na i nongal senu ole riong. Na ur alavusnga areken inina i pango pis i a iopo lemi. <sup>52</sup> Ma Jisas i poma na ile mire kene i aolonga. Na God tomo nge tokokoere olemi sivenga nge i.

## **Tenesing nge ur areko i velpol tel a mukaling aka i monsi sovengalo nge a Jisas ile omaing**

### 3

(Vonge 3:1–4:13)

*Jon aka ini toko paninuonga i panongpol nge riong.*

(Matiu 3:1-12; Mak 1:3-8)

<sup>1</sup> Ine tovu po mule pa omole pothoi or limnga aka Taiberius Sisar i voth ini nepes. Na Pontius Pailat ini gavana nge a epee a Judia. Na Herot i theal epee aka a Galili, na iteinnga a Pilip i theal epee aka ru a Ituria na Trakonitis. Na Lisanias i theal a Abilene. <sup>2</sup> Na Anas ome a Kaiapas or paini ini Prisre oa Pomnga. Na nge wop lemi aken Jon aka ini a Sekaraia itun i voth a pen polpolnga na God ile riong i velpol a i nge. <sup>3</sup> Ma Jon i esu esa e pen elonga aka i toth a thei a Jordan, ma i panongpol toko na sengre ve, “Naro thomu o pathengal or nge aka o lel kimomu nge lomu vothung kerengare, nge paninuong elnga mo aro God ilemi simikal lomu vothung kerengare.” <sup>4</sup> Na

Jon ile omaing aken i ranga ve ini wating ako i  
voth a God ile riong elnga a Aisaia ile erere nge,  
ma i ri vene:

“Toko e aka i leng a leng a pen polpolnga  
ma i leng ve,

‘Monsi Toko Pomnga ile sovengalo,  
na pavengveng ile sovengalo  
mo aro i es nge.

<sup>5</sup> Na ruprup alavusnga  
aro ultunnga,  
na pengene tomo nge tete alavusnga  
aro tounga,  
na lomolire  
aro o pavengveng i,  
na sovengalo areko i gurikrok  
aro i sathamtet.

<sup>6</sup> Naro toko alavusnga ake ru a ulue  
aro o thepol omaing ako God i pamimi or  
nge.’” *Aisaia 40:3-5*

<sup>7</sup> Na toko na seng pulua aka o espot a Jon nge  
la aka aro o el paninuong a i nge. Ma i ria or ve,  
“Thomu ini ingop kerenga itutunre, na thomu o  
eksing senu rongan na thomu o ri ve o el polpol  
paninuong mo aro o lo nge a God ile paomelaling  
ako aro i velpol panen. <sup>8</sup> Na o oma tel vothung aka  
i pathengal aka ve, thomu o lel kimomu nge lomu  
vothung kerenga lale. Na thomu o mothong tova  
o pakukukala a lomu riong pelie ve, ‘Aro them ela  
God ile paomelaling avele, eneke nomenga God i  
kin ile riong tomo nge a Abraham, na Abraham  
ini titievimem.’ Eneke tho ria thomu ve, God i  
pavurvur aka aro i oma um areke mo o velpol ini  
a Abraham ititeviere. <sup>9</sup> Na God ile paomelaling

i ranga ve ini telenga wowonga ako i totho lale  
ako aro i vairo i a thomu nge ako o ranga ve ini  
won. Na won alavusnga areko omongna i sivenga  
avele, aro o tetela ir mo o asesu or a won sesenga  
nge.”

<sup>10</sup> Ma Jon i ria vene aken, ma toko alavusnga o  
nina i ve, “Aro them oma vava?”

<sup>11</sup> Ma i olal ole riong ve, “Omu e ile tekruk or  
aini, aro i sungu omole e a toko aka ile avele. Na  
toko aka ia aning i voth, aro i sung mun i.”

<sup>12</sup> Na toko pelie aka ini umtun elngare o es mo o  
el mun paninuong ma o nina i ve, “Pamirealinga,  
aro them oma vava?”

<sup>13</sup> Ma i ria or vene, “Aro thomu o el inga umtun  
ranga ve aka gavman i ria thomu nge. Naro o el  
polpol mun pelie avele.”

<sup>14</sup> Na toko punongare pelie aka o nin mun i ve,  
“Na them, aro them oma vava?”

Ma i olal ole riong ve, “Thomu o mothong tova  
o siso polpol tokokoere na o pamit or nge riong  
mo o el polpol umtun a or nge. Naro lomumu i  
sivenga inga nge olongomu elnga.”

<sup>15</sup> Ma toko na sengre o nongpol a Jon ile riong  
ma olemi ve aro ur sivenga aro i velpol. Na olemi  
pelekpol aka ve, “Ava ini toko aton ru God i ateal  
i ve aro i el werer it eve ava avele.” <sup>16</sup> Mako  
Jon i olal ole riong ve, “Tho paninu thomu nge  
thei, aveto toko e aka aro i rumongal me, kene  
ile engenging i aolonga nge lek engenging, na  
i pavurvur aro tho es totho a ilo sei mo aro  
tho inospot ile esonga a we, kene avele. Naro i  
paninu omu pelie nge a God Ioni Riringa, aveto  
omu pelie nge won sesenga. <sup>17</sup> Naro i nongpol

toko alavusnga ole riong, naro i thomreu areko o sivenga na areko o kerenga, ranga ve ini toko pen lesnga i thomreu wit monnga sivenga na wit peti kerenga. Naro i veliloalo ur sivesivengare a ile pen sivenga, aveto ur kerekengare aro i asesu ir a won sesenga nge ako aro ile vusonga avele.” <sup>18</sup> Na Jon i oma riong relnga mun pelie ako aro i pavurpol olemi nge, mako i panongpol nge panongpolong sivenga a toko na sengre nge.

*Herot i paeso a Jon ako ini toko paninuonga a mang a midenga lemi.*

*(Matiu 14:3-5; Mak 6:17-18)*

<sup>19</sup> Na Jon i vol a Herot ako ini nepes, eneke i pamues a Herodias aka ini itein posnga iewo tomo mun nge vothung pulua kerenga mun aka i oma i. <sup>20</sup> Ma Herot i rong esa mun ile kerengaing aka ranga ve i paeso a Jon a mang a midenga lemi.

*Jon i paninu a Jisas.*

*(Matiu 3:13-17; Mak 1:9-11)*

<sup>21</sup> Na Herot i paeso a Jon a mang a midenga rongan, na nge aka toko alavusngare o el paninuong, na Jisas mun i el paninuong, ma rongan i nong, nako sepsa i thep. <sup>22</sup> Na Oni Riringa i esu a i nge me, ma i ranga ve ini pothu, ma i men a i nge. Na lenging aka i espot a sepsa lemi me ma i ri ve, “Wong ini tuk aka ok sagu rintet wong, ma lenik sivenga rintet mun nge wong.”

*Jisas ititeviere oion.*

*(Matiu 1:1-17)*

**23** Na nge wop lemi ako Jisas i patea ile omaing ma ia tovu po mule pa me. Ma toko na seng olemi ako ve, ini a Josep itun.

Na Josep ini a Heli itun.

**24** Na Heli ini a Matat itun.

Na Matat ini a Livai itun.

Na Livai ini a Melki itun.

Na Melki ini a Janai itun.

Na Janai ini a Josep itun.

**25** Na Josep ini a Matatias itun.

Na Matatias ini a Amos itun.

Na Amos ini a Nahum itun.

Na Nahum ini a Esli itun.

Na Esli ini a Nagai itun.

**26** Na Nagai ini a Mat itun.

Na Mat ini a Matatias itun.

Na Matatias ini a Semen itun.

Na Semen ini a Josek itun.

Na Josek ini a Joda itun.

**27** Na Joda ini a Joanan itun.

Na Joanan ini a Resa itun.

Na Resa ini a Serubabel itun.

Na Serubabel ini a Sealtiel itun.

Na Sealtiel ini a Neri itun.

**28** Na Neri ini a Melki itun.

Na Melki ini a Adi itun.

Na Adi ini a Kosam itun.

Na Kosam ini a Elmadam itun.

Na Elmadam ini a Er itun.

**29** Na Er ini a Josua itun.

Na Josua ini a Elieser itun.

Na Elieser ini a Jorim itun.

Na Jorim ini a Matat itun.

Na Matat ini a Livai itun.

**30** Na Livai ini a Simeon itun.

Na Simeon ini a Juda itun.

Na Juda ini a Josep itun.  
Na Josep ini a Jonam itun.  
Na Jonam ini a Eliakim itun.  
<sup>31</sup> Na Eliakim ini a Melea itun.  
Na Melea ini a Mena itun.  
Na Mena ini a Matata itun.  
Na Matata ini a Natan itun.  
Na Natan ini a Devit itun.  
<sup>32</sup> Na Devit ini a Jesi itun.  
Na Jesi ini a Obet itun.  
Na Obet ini a Boas itun.  
Na Boas ini a Salmon itun.  
Na Salmon ini a Nason itun.  
<sup>33</sup> Na Nason ini a Aminadap itun.  
Na Aminadap ini a Atmin itun.  
Na Atmin ini a Arni itun.  
Na Arni ini a Hesron itun.  
Na Hesron ini a Peres itun.  
Na Peres ini a Juda itun.  
<sup>34</sup> Na Juda ini a Jekop itun.  
Na Jekop ini a Aisak itun.  
Na Aisak ini a Abraham itun.  
Na Abraham ini a Tera itun.  
Na Tera ini a Nahor itun.  
<sup>35</sup> Na Nahor ini a Seruk itun.  
Na Seruk ini a Reu itun.  
Na Reu ini a Pelek itun.  
Na Pelek ini a Eber itun.  
Na Eber ini a Sela itun.  
<sup>36</sup> Na Sela ini a Kainan itun.  
Na Kainan ini a Arpaksat itun.  
Na Arpaksat ini a Siem itun.  
Na Siem ini a Noa itun.  
Na Noa ini a Lamek itun.  
<sup>37</sup> Na Lamek ini a Metusela itun.  
Na Metusela ini a Enok itun.  
Na Enok ini a Jaret itun.

Na Jaret ini a Mahalalel itun.  
 Na Mahalalel ini a Kenan itun.  
<sup>38</sup> Na Kenan ini a Enos itun.  
 Na Enos ini a Set itun.  
 Na Set ini a Adam itun.  
 Na Adam ini a God itun.

## 4

*Satan i tongporum a Jisas.*  
*(Matiu 4:1-11; Mak 1:12-13)*

<sup>1</sup> Na Jisas i vual nge Oni Riringa, ma i losteta a thei a Jordan. Mako Oni Riringa i wolu wola i a pen polpolnga. <sup>2</sup> Ma i voth nge wop aken, i pavurvur nge nang or mule pa penel. Ma Satan i tongporum i nge, na nge nang alavusnga aken Jisas i an vet avele. Ma nang or mule pa penel aken i vus, mako i rova ol mesipuniong.

<sup>3</sup> Na Satan i ria i ve, “Tova ve ong ini a God Itun, mo wong ria um ake mo i eksing mo ini bret.”

<sup>4</sup> Ma Jisas i olal ile riong ve, “God ile erere i ri vene:

‘I pavurvur aro toko i mimi inga nge aning avele.’” *Lo 8:3*

<sup>5</sup> Ma Satan i paesa i roro, na a ur e avele, nako i pathengalpot i nge rumrem elonga ake ru a ulue.

<sup>6</sup> Na i ria i ve, “Naro tho sungu ur alavusnga aken a wong nge mo ong theal i, mo aro iom i kima nge. Na aro ve tho sungu i nge toko e, aro tho sungu i inga nge i, eneke ur alavusnga aken i voth a menik. <sup>7</sup> Na aro ve ong lotual tho, aro ur alavusnga ake ini lom.”

<sup>8</sup> Na Jisas i olal ile riong ve, “God ile erere i ri vene:

‘Aro ong lotual inga Toko Pomnga ako ini lom God,  
naro wong oma inga ile omaing.’ ” *Lo 6:13*

<sup>9</sup> Na Satan i wol a Jisas a Jerusalem la, ma i paesa i a Lotu Tepun a Vel, ma i pamita i roro a vel polemi. Ma i ria i ve, “Tova ve wong ini a God Itun, aro wong opthou la, <sup>10</sup> eneke God ile erere i ri vene:

‘God aro i ria ile enselre  
mo o theal senu wong.

<sup>11</sup> Naro o monteta la wong nge omeni,  
mo aro evom i tup nge um e avele.’ ” *Buk Song 91:11-12*

<sup>12</sup> Na Jisas i olal ile riong ve, “God ile erere i ri vene:

‘Mothong tova tongporum Toko Pomnga ako ini lom God ile engenging.’ ” *Lo 6:16*

<sup>13</sup> Na Satan i oma tongporumong pulua lale nge a Jisas, ma i lo lelpot i mo aro i men total mun nge nang relnga e.

## **Jisas i eso a Galili ma Oni Riringa i paengeng i nge ile omaing pateanga**

(Vonge 4:14–9:50)

*Jisas i patea ile omaing a Galili.*

<sup>14</sup> Na Jisas i lo werer a Galili la na Oni Riringa ile engenging i voth a i nge. Na ikimanga i song a pen elonga aka i toth a Galili. <sup>15</sup> Na i patorial or aka ru a Judare ole lotuonga a velre, ma or alavusnga o paesa iion roro.

*Nasaret angare o kelelal a Jisas ile omaing.  
(Matiu 13:53-58; Mak 6:1-6)*

**16** Na Jisas i es a Nasaret ako ini rem ako i poma nge. Na nge nang rialonga i panes ile vothung, na i eso a Judare ole lotuonga a vel, ma i mita mo aro i tital a God ile erere. **17** Ma o sungu a God ile riong elnga a Aisaia ile erere a i nge. Ma i thep i, na i ortet riong e ako aro i tital viringga a tokokoere nge, ma i ria ve,

**18** “Toko Pomnga Ioni Riringa i voth a tho nge,  
 eneke i ategal tho ve aro  
 tho panongpol Panongpolong Sivenga  
 a toko le ur avelengare nge.  
 Na i pake tho me ve aro  
 tho panongpol areko o voth a mang a mi-  
 denga  
 mo aro o vthopot.  
 Na i pake tho me ve aro  
 tho panongpol mun areko otheki pros  
 mo aro o the werer.  
 Na i pake tho me ve aro  
 tho pavthopot areko ole ngarangre o paome-  
 lal or.

**19** Na i pake tho me ve aro  
 tho panongpol nge ako,  
 tovu po aka Toko Pomnga i themosal toko  
 na sengre nge,  
 kene i velpol lale.” **Aisaia 61:1-2**

**20** Ma Jisas i mol werera erere aken ma i sung wereru i a toko aka i theal erere areken. Lamako i men wereru. Ma toko na seng alavusnga aka ru a vel lemi o the rinrin ol inga aka ini i. **21** Lamako i patea ol riong a or nge, ma i ri ve, “Na ponange thomu o nongpol riong aken kene i velpol nunganga lale.”

**22** Ma or alavusnga o ri riong sivenga nge i ma o kukuk nge riong sivenga ako i velpolpot a iwo. Ma o ri ve, “Ake ini a Josep Itun inga na ile riong sivenga aken i es vanath me?”

**23** Ma i ria or ve, “Lemik mire ako ve, aro thomu o ria riong agelalnga a tho nge me ranga ve, ‘Vuralinga, aro ong pamimi sivengom.’ Naro thomu o ri mun ve, ‘Ur areko them nongpol aka wong oma i a Kaperneam, aro wong oma werer mun i ake ru a lom rem tepun.’”

**24** Ma i ria mun or ve, “Tho ri nunganga a thomu nge, God ile riong elnга e, aro ve i lo werer a ile rem tepun, tokokoere aro o nongal ile riong avele. **25** O nongpol, tho ri nunganga a thomu nge, nomenga nge wop lemi aka Elaija i voth, seng basu pulua aka o voth mun a Israel. Na nge wop lemi aken sepsa i pupal rintet ma vit i mol vet avele nge tovu po or me na ngov or limae. Na mesi aolonga i velpol a pen elonga a ulue. **26** Aveto God i pake a Elaija a seng basu e nge avele aka ru a Israel aka ini ile rem tepun. Aveto i pake inga i a seng basu e aka a rem a Sarepat aka a epee a Saidon. **27** Na nomenga nge wop lemi mun aka God i pake ile riong elnга a Elisa a Israelre nge, toko pulua aka a Israel kene putput i el or. Aveto oa e avele i senu werer. Ave ini inga Naman aka ini Siria anga i senu werer.”

**28** Na toko alavusnga aka a Judare ole lotuonga a vel lemi, o nongpol riong aken ma olemi kling rintet nge a Jisas ile riong, aka i oma i a or nge. **29** Ma o losa ma o titpopot a Jisas a rem pomnga wopo a tete polemi mo o wola i la ma o ri ve o

asesu i a ruprup la. <sup>30</sup> Aveto Jisas i eksing ma i es werer a oa lemimi, mako i es la.

*Jisas i wistetpot tamata kerenga a toko ako nge.  
(Mak 1:21-28)*

<sup>31</sup> Ma Jisas i esu a rem a Kaperneam ako a epee a Galili. Na nge nang rialonga i patoral toko na sengre. <sup>32</sup> Ma o nongpol ile riong ma o kukuk nge, eneke ile patoraling aken i rangga ve ini toko ako ile engenging i aolonga.

<sup>33</sup> Na toko e aka i voth a Judare ole lotuonga a vel lemi kene tamata kerenga i voth a i nge. Ma i wal na i presa viringa ve, <sup>34</sup> “Wong ake ini a Jisas aka ini Nasaret anga. Lom neke i voth a tho nge? Na wong es ake me mo ong ri ve wong pakerenga them, e? Na lemek mire nge wong, wong ini toko riringa aka ini a God ile.”

<sup>35</sup> Aveto Jisas i vol i ma i ria i ve, “Wong poreng, na wong lopot a toko aken nge.” Ma tamata kerenga aken i asesu toko aken a ulue aka ru a otheki lemi. Ma i lopot a i nge na i pakerenga i avele.

<sup>36</sup> Ma tokokoere o kukuk. Na o ria osivenga nge ve, “Ake ini riong le vanga ake? Eneke ile riong i mathe na i rangga ve ini toko aka ile engenging i aolonga. Na i ri pompom nge tamata kerengare, mako o lopot.” <sup>37</sup> Mako ritetong nge a Jisas i kima ol a pen elonga aka i toth a Kaperneam.

*Jisas i pamimi toko pulua.  
(Matiu 8:14-17; Mak 1:29-34)*

<sup>38</sup> Ma Jisas i plosa ma i espot a Judare ole lotuonga a vel, ma i es a Saimon ile vel lemi. Ma Saimon iewo inina ini multhang ma ini peti i vel

rintet. Ma o leng a Jisas ve aro i opoal i. <sup>39</sup> Mako i mit totho a ni multhanginga aken nge, ma i vol ni peti velonga aken, mako i lo lelpot i, na a ur e avele na seng aken i plosa ma i monsi nge oa aning.

<sup>40</sup> Ma nang i mena ol a ile ring, na tokokoe areko olengare o el ni multhanging rel relngare, o pasong or a Jisas nge, ma i ronga imeni a or omole omole nge, mako i pamimi werer or alavusnga.

<sup>41</sup> Ma tamata kerengare o lopot a tokokoere nge. Ma tamata kerengare o lopot na o walal na i ria ve, “Wong ini a God Itun.” Aveto i vol or na i rial or ve, o mothong tova o ri, eneke ini plong ve aro o ritet tokokoere ako ve, ini toko aka God i ateal i ve aro i el werer toko na sengre.

*Jisas i panongpol a rem elonga.  
(Mak 1:35-39)*

<sup>42</sup> Na totho rulpounga na Jisas i lospot nge rem aken ma i es nge wop aka tokokoere nge avele. Ma tokokoere o ortet i. Lamako o sangpolo i ma o ri ve o rialalu i mo i mothong tova i lo lelpot oa. <sup>43</sup> Aveto i ria or ve, “Aro tho panongpol nge Panongpolong Sivenga aka nge a God ile menong e nepes, nge rem rel relnga munre, eneke God i pake tho ve aro tho oma omaing aken.” <sup>44</sup> Ma i panongpol a Judare ole lotuonga a velre a pen elonga aka ru a epee a Judia.

## 5

*Jisas i leng a Pita mo aro i velpol ini ile wainlanga.  
(Matiu 4:18-22; Mak 1:16-20; Jon 1:40-42)*

<sup>1</sup> Nge nang omole aka Jisas i mit a thei a pamonlel a Galili wo peti, ma toko pulua aka o es a i nge ma o mumrongtuno i, ve aro o nongpol a God ile riong.\* <sup>2</sup> Ma Jisas i thepol wok or aini aka o wetea i a thei wo peti. Aveto wok tokoninga aka ini silang elngare o voth nge avele, eneke o sopol oa susua. <sup>3</sup> Mako Jisas i ro a wok nge aka ini a Saimon ia. Ma i ria Saimon ve aro i osthongpot wok a sthapot la tie. Na Jisas i men a wok lemi na i patoral toko na sengre.

<sup>4</sup> Ma i patoral or ma i vus, lamako i ria Saimon ve, “Aro wong na thongongomre aro o sauthpot a thei stha la, mo o ulu omu susua mo o ting silang.”

<sup>5</sup> Ma Saimon i ria ve, “Toko Pomnga, them um polpol inga nge pemlik lollonga ake ma them tinga vet silang e avele. Aveto aro them ulu wereru mun emem susua, eneke wong ria vene aken lale.”

<sup>6</sup> Ma o oma venen aken ma o tinga silang pulua, na pa omole re aka aro oa susua aro i minrira.

<sup>7</sup> Mako omeni wit othangangaere aka nge wok aininga mo o es me mo o opoal or. Na o asesa silangre nge wok alaini aken ma i vuala ma pa omole tova aro wok alaini o vlu.

<sup>8</sup> Ma Saimon Pita i thepol aken. Ma ilemi kerere ma i koru ieve a Jisas itheki lemi ma i ria ve, “Toko Pomnga, aro wong lo lelpot tho, eneke tho ini toko aka lek vothung kerenga.” <sup>9</sup> Ma i ria ol venen aken, eneke i thepol silang pulua ma i kukuk nge. Ma areko o voth tomo nge i o kukuk mun nge.

<sup>10</sup> Ma Sebedi itun or aini aka ini a Jems na Jon, or

---

\* **5:1:** Galili iion mun a Genesaret.

paini ini a Saimon ithanga, ma or paini mun kene o kukuk.

Lama Jisas i ria Saimon ve, “Wong mothong tova ong ngeip, nomenga ong el silang, aveto ponange na panen aro ong el toko na sengre a tho nge me.” <sup>11</sup> Ma o monteta oa wokre a thei wo peti la, na o modipdopu ur alavusnga na o panes a Jisas.

*Jisas i pamimi werera toko ako putput i voth a i nge.*

*(Matiu 8:2-4; Mak 1:40-44)*

<sup>12</sup> Na Jisas i voth a rem pomnga omole na toko omole ako i voth nge, kene ini peti i vustetu nge putput. Ma i thopol a Jisas ma i koru ieve ma ipo tiru a ulue na i nong a i nge ma i ria i ve, “Toko Pomnga, ong pavurvur aro ong paonolpot tho mo tho riri a God itheki, tova lomum ve aro ong oma i.”

<sup>13</sup> Ma Jisas i ronga imeni a i nge na i ria i ve, “Lemik ve aro tho oma i, aro wong riri werer.” Na a ur e avele, nako putput aken i vuspot ol a i nge.

<sup>14</sup> Ma Jisas i ri engeng a i nge ve, “Wong mothong tova ong ria ol toko e nge. Aveto aro wong es vengveng a pris nge la, mo i thopolrum num peti, mo aro i panunganga riong nge wong ve, ‘Putput i vus.’ Na oma lom sungong ranga ve Moses i ria nge lale, mo ako tokokoere olemi mire ako ve, num multhanga aken i vus.”

<sup>15</sup> Aveto ur areko Jisas i oma i, i kimapot a pen elonga. Mako toko puluanga o es a i nge, mo o nongpol ile riong, naro i eltetpot oni multhanga.

**16** Aveto nang pulua ako, i es nge wop aka toko e nge avele, ma i nong nge.

*Jisas i pamimi werer toko aka ini peti motungtung.*

(*Matiu 9:2-8; Mak 2:3-12*)

**17** Nge nang e aka Jisas i patoral toko na sengre, na pokononga pelie aka o apet or ini Parisire tomo nge pamirealingare nge a Moses ile patorong aka o es e pen elonga aka ru a Galili na Judia na Jerusalem, or aka o men tomo mun. Na Toko Pomnga ile engenging, i voth tomo nge a Jisas, mo aro i pamimi ni multhangingare. **18** Ma tokokoe pelie aka o potuna toko omole aka tomo nge ile ngosel. Ma toko aken ini peti motungtung. Ma o ri ve o potuno i a vel lemi la, mo o parong i a Jisas itheki lemi. **19** Aveto vel lemi i vual rintet nge toko na sengre, na ole sovengalo avele aka aro o paeso ni multhanginga aken a vel lemi la. Mako o paesa i a vel powe la, ma o eltetpot vel pothoi aka ini um. Na toko aken o pamonlolu tomo i nge ile ngosel la, aka ru a toko na sengre oa lemimi, aka ru a Jisas itheki lemi.

**20** Ma Jisas i thepol ole lemioong ma i ria ve, “Teik, tho ria wong God ilemi simikal lom vothung kerengare lale.”

**21** Na Parisi tomo nge pamirealingare nge a Moses ile patorong osivenga olemi pompom ve, “Toko aken ini ao ake i kelelal a God, e? Toko e i pavurvur avele, God inga i pavurvur aka aro i patitepot toko ile vothung kerenga.”

**22** Ma Jisas i ate ole lemi rumong ma i ria ol or ve, “I vova ake lomumu i voth vene ake? **23** Riong

kathnga i semel ako aro tho ria i? Aro ve tho ria i ve, ‘God ilemi simikal lom vothung kerengare lale.’ Riong ake i semel, eneke thomu o pavurvur, aka aro o thopol lek riong potoi avele. Aveto aro ve tho ria i ve, ‘Plosa mo es.’ Riong ake i klip, eneke thomu o pavurvur aro o thopol lek riong potoi. <sup>24</sup> Maken aro tho ri riong klipnga aken, eneke tho sis aka ve, lomumu mire aka ve, Toko Pomnga Itun ile engenging ake ru a ulue, i voth, ma i pavurvur nge toko na sengre ole vothung kerengare patitepotnga.’” Mako i ria toko ni peti motungtunga ve, “Tho ria wong, ong mita mo ela lom ngosel mo es a lom vel.” <sup>25</sup> Na a ur e avele, nako i losa a toko na sengre otheki, na i ela ile ngosel aka ru i ngo nge na i es a ile vel la, na i paesa God iion roro. <sup>26</sup> Ma toko alavusnga o kukuk rintet nge. Ma o paesa God iion roro. Na o papomnga i. Ma o ria ve, “Na ponange them thepol ur aka i rel rintet.”

*Jisas i leng a Livai mo aro i panes i, na i oma riong agelalnga aka i ranga ve ini vuralinga.*

*(Matiu 9:9-13; Mak 2:14-17)*

<sup>27</sup> Lamako Jisas i espot ol, ma i thepol toko aka kene ini umtun elnga aka i men a ile umtun elnga a vel. Na iion a Livai,† ma Jisas i ria i ve, “Wong panes tho.” <sup>28</sup> Mako Livai i mita na i mothonglelu ile ur elonga, na i panes a Jisas.

<sup>29</sup> Na Livai i oma Jisas ia aning aolonga aka a ile vel. Na umtun elnga puluanga tomo mun nge tokokoe pelie, o voth ma o an tomo nge or paini. <sup>30</sup> Na Parisire tomo nge pamirealingare

---

† **5:27:** Livai iion aining ini a Matiu.

nge a Moses ile patorong, oni plong nge omaing aken, ma o ria ria nge a Jisas ile wainlangaere. Ma o ria ve, “I vava ake thomu o an tomo na o thin tomo nge tokokoe areko ini umtun elngare na areko ole vothung kerenga, e?”

<sup>31</sup> Ma Jisas i olal ole riong ve, “Areko olemi ve o sivenga, aro o es a vuralinga nge avele, ini inga areko oni multhang aro o es a i nge. <sup>32</sup> Tho velpol ako aro tho leng toko vengvengare mo aro o eksing ole mimiiong, kene avele. Tho velpol ako aro tho leng tokokoe areko ole vothung kerenga, mo aro o eksing ole mimiiong.”

*Jisas i ranga ve ini toko aka i peange ponganga.  
(Matiu 9:14-15; Mak 2:18-20)*

<sup>33</sup> Na tokokoe areken o ria mun a Jisas ve, “Na Jon ile wainlangaere o sem nge aning, na o nong mo o lotual nge a God. Na Parisire ole wainlangaere o oma mun venen aken. Aveto lom wainlangaere o an na o thin na o sem avele.”

<sup>34</sup> Ma Jisas i ria or nge riong agelalnga ve, “Aro ve toko peange ponganga, i voth tomo nge ilengare nge sungaling a aning, i pavurvur aro o sem avele. <sup>35</sup> Aveto panen aro o eltetpot toko peange ponganga aken a or nge. Naro nge wop lemi aken aro o sem ol e aning.”

*Jisas i patalor or nge aka ile pamirealing ponganga i pavurvur aro i es tomo nge ole patoraling neginga avele.*

*(Matiu 9:16-17; Mak 2:21-22)*

<sup>36</sup> Ma Jisas i oma mun riong agelalnga omole aka a or nge. Ma i ria ve, “Toko e aro i inrapot tekruk epee ponganga, naro i italalo i nge tekruk

neginga avele, aro vene mo i pakerenga tekruk ponganga aken na epee ponganga aken i ang tomo nge tekruk neginga avele. <sup>37</sup> Na toko e i mothong tova aro i save vain ponganga, nge thei pokin ako ini mekerem peti neginga, eneke i pavurvur aro i lowimpot avele, aro vene mo aro vain i lothunpot mo aro thei pokin aken aro i vupol, mo vain i lel pautet na thei pokin aro i kerenga. <sup>38</sup> Aveto i sivenga aka aro o save vain ponganga nge thei pokin ponganga. <sup>39</sup> Na aro ve toko e i thin vain neginga lale, aro i mothong ol vain ponganga thinnga, eneke aro i ri ve, ‘Nginga i sivenga nge thinong.’”

## 6

*Jisas i ria or ve ienga inga aka i mukal nge nang rialonga.*

*(Matiu 12:1-8; Mak 2:23-28)*

<sup>1</sup> Na nge nang rialonga omole Jisas i es a wit a ometa lemi. Na ile wainlangaere o vurpot wit monnga pelie na o sisa i nge omeni na o an i. <sup>2</sup> Ma Parisi pelie o ri ve, “Na i vava ake thomu o oma ur areko ler patorong i rial i nge nang rialonga, e?”

<sup>3</sup> Ma Jisas i olal ole riong ve, “Na thomu o tital tenesing nge ur areko Devit i oma i nomenga, nge wop lemi aka ome ile tokokoere mesipun or. <sup>4</sup> Ma Devit i eso a God ile vel lemi, ma i elpot bret aka o oma i ma ini sungong a God nge. Na Moses ile patorong i ri ve, bret aken tokokoere o rial nge, ini inga prisre oenga aro o an i. Aveto Devit i an i na i sungu mun i a ile tokokoere nge, aveto God i paomelal or avele.” <sup>5</sup> Ma Jisas i ria or ve, “Na Toko

Pomnga Itun i pavurvur ako aro i panes ilemi nge nang rialonga.”

*Nge nang rialonga Jisas i oma senu toko aka imeni morungrung.*

(Matiu 12:9-14; Mak 3:1-6)

<sup>6</sup> Na nge nang rialonga mun e aka Jisas i eso a Judare ole lotuonga a vel, ma i patoral toko na sengre. Na toko omole aka i voth aka imeni sivenga nge anga i morungrung, ma imeni omkolo. <sup>7</sup> Ma ine pamirealingare nge a Moses ile patorong, tomo nge Parisire o thopolrum senu nge a Jisas, eneke o kath ia tepun e aka aro o teltun ia nge tova ve i pamimi toko nge nang rialonga, akennga i leklek lale. <sup>8</sup> Aveto Jisas ilemi mire nge olemi, mako i ria toko meni morungrunga aken ma i ria i ve, “Wong mita mo espot a mukaling me.” Mako toko aken i mita ma i espot a mukaling.

<sup>9</sup> Ma Jisas i ria areko o thopolrum i, ma i ria or ve, “Tho sis aka ve, tho nina tel thomu, aro te oma uneke nge nang rialonga aka i panes ler patorong, aro te oma omaing sivenga, eve aro te oma omaing kerenga? Naro te pamimi toko nge, eve aro te pakerenga toko nge?”

<sup>10</sup> Na Jisas i theu thea a toko alavusnga nge, lamako i ria toko aken ve, “Pavengvengpot menum mo menum savelvelu.” Ma i oma i ranga ve aka Jisas i ria i nge, mako imeni i sivenga werer sele. <sup>11</sup> Aveto Parisire olemi kling rintet nge i, ma osivenga o ria pel ve, “Aro te oma vava nge a Jisas?”

*Jisas i paateal nge ile wainlanga or mule pa omole pothoi or aini.*

*(Matiu 10:2-4; Mak 3:16-19; Pakeke 1:13)*

<sup>12</sup> Nge nang omole ako Jisas i espot ma i esa a tete mo i nong a God nge. Ma i mosal inga non-gong nge pemlik lollonga aken makola rulpopou.

<sup>13</sup> Ma nang i toa ol me, ma i leng ile wainlangaere a i nge me. Ma i ateal or mule pa omole pothoi or aini a or nge mo o velpol ini ile pakekere, ako o apet or ini aposelre. <sup>14</sup> Ma oion vene: Na omole ini a Saimon, na Jisas i sungu mun iion aininga a Pita. Na Andru ako ini a Saimon itein. Na Jems na Jon na Pilip na Bartolomiu. <sup>15</sup> Na Matiu na Tomas na Jems ako ini a Alpius itun, na Saimon ako i voth a toko avlung ako o apet i ve ini a Selot.\*

<sup>16</sup> Na Judas ako ini a Jems itun. Na Judas Iskariot ako aro panen i sungu a Jisas a ngarangre omeni.

*Jisas i pamimi werer toko na seng pulua.*

*(Matiu 4:23-25)*

<sup>17</sup> Ma Jisas ome ile pakeke areken, o esu a tete me. Ma o esu ma o mitu a pen vovovnga. Na ile wainlangaere pulua ako ru o voth mun. Ma tokokoe pulua ako ini Judia angare na pelie ini Jerusalem angare na pelie ako o es telek a thev epee ako a Tair ome a Saidon, o voth mun. <sup>18</sup> Ma o es ako me ve aro o nongpol ile riong naro i pamimi werer or nge oa ni multhanging. Na toko na sengre ako tamata kerengare o voth a or nge, o es mun a i nge ma i wistetpot tamata kerengare

---

\* **6:15:** Selot i mirenga ako ve, i voth e toko avlung ako o sis ve aro o pun tomo nge Romre ole gavman mo osivenga o theal ol or.

a or nge. <sup>19</sup> Ma toko alavusnga o tongporum ako aro o vugiro i, eneke ile engenging aolonga i eso e areko o vugiro i, mako o senu werer.

*Jisas i ri nge sapaseong na lemi kerereong.  
(Matiu 5:3-12)*

<sup>20</sup> Ma Jisas i the a ile wainlangae nge, na i ria ve,

“Sapase thomu toko le ur avelengare,  
eneke God i theal thomu na ini lomu Nepes  
lale.

<sup>21</sup> Sapase thomu tokokoe areko o men mesi po-  
nange,

eneke panen aro God i sung ur elonga a  
thomu nge,

naro osa pup ol.

Sapase thomu tokokoe areko o tang ponange,  
eneke panen aro thomu o ngenge sise ol.

<sup>22</sup> Sapase thomu tova ve,

tokokoere aro oni silal thomu

na okime lelal thomu,

na o voltet thomu,

na o apet tangatun iomu,

na o oma venen aken,

eneke thomu o panes a Toko Pomnga  
Itun.

<sup>23</sup> “Na nge nang ako aro o oma venen aken nge  
thomu, aro lomumu i ngo sivenga rintet nge, na  
lomumu aro i ngo pis. Eneke God aro i olal i a  
thomu nge, nge sungong a urvet ako ro a Pen a  
Urvet. Naro o oma vene ake a thomu nge, eneke  
nomenga otiteviere o oma mun re venen aken  
nge a God ile riong elngare. <sup>24</sup> Aveto

“Patong thomu toko le urngare,

na panen marati aro thomu o el ol kereng-gaing,  
eneke thomu o el mimiong sivenga lale.

- <sup>25</sup> Patong thomu tokokoe areko o an na osa pup ponange,  
eneke panen aro thomu o men mesi.  
Patong thomu tokokoe areko thomu o ngenge sise nge thomu ponange,  
eneke panen aro thomu o tang na thekumu einga aro i lel.
- <sup>26</sup> Patong thomu tokokoe areko, toko alavusnga o paesa iomu roro,  
eneke nomenga otiteviere o oma mun vene aken  
nge riong elnga le apaltetongare.”

*Vothung ako ar sagu ler ngarangre.*  
*(Matiu 5:39-42)*

- <sup>27</sup> Na Jisas i ria or vene: “Aveto tho ria thomu areko o nongpol lek riong. Aro omu sagu lomu ngarangre. Naro thomu o oma vothung sivenga nge areko oni silal thomu. <sup>28</sup> Naro thomu o ria God mo aro i oma senu nge tokokoe areko o oma tungtang nge thomu. Naro thomu o nong a God nge, nge tokokoe areko o ri tangatun e thomu. <sup>29</sup> Na aro ve toko e i so wom pun, aro eksing mun wom pun epee mo i so mun i. Na aro ve toko e i elteta lom seltun, ong mothong tova pamumutal i nge i, tova ve i elteta mun lom tekruk. <sup>30</sup> Na aro ve toko e i nong ur e a wong nge, aro o sungu inga a i nge. Na aro ve toko e i ela lom ur e, o mothong tova nin werer mun i nge. <sup>31</sup> Na vothung

ako wong sis ve aro tokokoere o oma i a wong nge,  
aro wong oma inga vothung aken a or nge.

<sup>32</sup> Na aro ve omu sagu inga tokokoe areko oa  
sagu thomu, aro o paesa iomu nge vothung aken  
avele. Eneke tokokoe areko ole vothung kerenga,  
oa sagu mun tokokoe areko oa sagu mun or. <sup>33</sup> Na  
aro ve thomu o oma vothung sivenga inga nge  
tokokoe areko o oma vothung sivenga nge thomu,  
aro o paesa iomu nge vothung aken avele. Eneke  
tokokoe areko o oma vothung kerenga or mun  
o oma mun venen aken. <sup>34</sup> Na aro ve thomu o  
sungu inga thangaroong nge areko lomumu ve  
aro o olal werer i, aro o paesa iomu nge vothung  
aken avele, eneke tokokoe areko o oma vothung  
kerenga o sung mun thangaroong nge tokokoe  
areko o oma vothung kerenga mo aro o el werer  
mun oa thangaroong aken. <sup>35</sup> Aveto thomu, aro  
omu sagu lomu ngarangre. Naro thomu o oma  
vothung sivenga a or nge. Naro thomu o sungu  
thangaroong a or nge. Naro thomu o mothong  
tova lomumu ve aro o olal werer i. Na aro ve  
thomu o oma venen aken, God aro i olal i a thomu  
nge, nge sungong a urvet. Naro thomu o velpol  
ini a God, ako i aolonga rintet, itutunre. Eneke i  
oma vothung sivenga mun nge tokokoe areko o ri  
sivengaing a i nge avele, na nge areko ole vothung  
kerenga. <sup>36</sup> Aro thomu o themosal tokokoere  
ranga ve ako Titemer i themosal tokokoere.”

*Thomu o mothong tova o avrum toko relnga  
pelie ole vothung ako i sivenga eve i kerenga.*

*(Matiu 7:1-5)*

<sup>37</sup> Ma Jisas i ria mun ve, “Na aro ve thomu o  
avrum toko ile vothung avele, aro God i avrum

mun lomu vothung avele. Na aro ve thomu o paomelal toko avele, aro God i paomelal mun thomu avele. Na aro ve lomumu simikal tokokoere ole vothung kerenga, aro God ilemi simikal mun lomu vothung kerenga. <sup>38</sup> Aro ve thomu o sung menumu a tokokoere nge, aro God i olal mun sungong aken a thomu nge. Na ile sungong aro i mengmeng avele, aro i vual taktak rintet na i pavurvur aro o mit roal i avele. Sungong ako ong sung i a tokokoere nge, aro God i sung mun i a ong nge, ranga ve ako ong sung i a tokokoere nge.”

<sup>39</sup> Ma Jisas i sung mun riong agelalnga omole a or nge ve, “I pavurvur aro theki prosnga e aro i wol rum theki prosnga e, kene avele, aro vene mo or paini o matu a vol lemi. <sup>40</sup> Na wain ako i men nge pamirealing i pavurvur aro i aolo leltun ile pamirealinga avele. Aveto aro ve i pavus senu ile pamirealing kena aro i velpol, mo i ranga ve ini mun i ile pamirealinga.

<sup>41</sup> “Na mothong tova wong thepol won amum i voth a teum itheki, aveto ong kene ong thopol tel wong avele ako won epee i ngo sopal thekum. <sup>42</sup> Na aro ve wong thepol won epee aken avele, ong mothong tova ong ria teum ve, ‘Teik, aro tho eltetpot won amum atiken i ngo a thekum.’ Wong ini pokononga. Aveto i sivenga ako ong eltetpot tel won epee aken ru i ngo sopal thekum, lamo aro wong the senu, moro aken wong eltetpot won amum ako i ngo a teum itheki.”

*Won kerenga aro imonnga i kerenga mun.  
(Matiu 7:16-20)*

**43** Na Jisas i ria mun ve, “Won sivenga i pavurvur aro imonnga i kerenga avele. Ranga ve mun i ako won kerenga i pavurvur aro imonnga i sivenga avele. **44** Na tokokoere o ate won ako nge imonnga. Naro i pavurvur aro wong vurpot pupos monnga a we wopuponga nge, kene avele. Na o vur vain monnga a we wopuponga nge avele. **45** Na toko sivenga i paespot ur sivenga ako i voth a ilemi. Na toko kerenga mun i paespot ur kerenga ako i voth a ilemi. Eneke toko iwo i ripot vengveng ur aka i voth a ilemi.”

*Riong agelalnga nge toko or aini aka or ini vel omangare.*

*(Matiu 7:24-27)*

**46** Na Jisas i ria mun ve, “I vova ake thomu o apet tho ve Toko Pomnga, Toko Pomnga, aveto thomu o panes lek riong avele, e? **47** Na aro ve toko i es a tho nge me, na i nongpol lek riong na i panes i, moro aken aro tho ria thomu nge toko aken ile vothung. **48** Na toko aken i ranga ve ini toko aka i ri ve aro i ari vel. Na a mukaling i to vol lukulukunga, aka i esu a ulue lemi. Lamako i aria vel nge roro, ma thei awonga aolonga i velpol ma i es a vel aken nge ma i tik i, ma vel aken i vulpesa vet avele, eneke toko aken i ari vel sivenga aka i engeng. **49** Aveto toko aka i nongpol lek riong na i panes i avele, i ranga ve ini toko aka i aria vel, na i men polpola inga a ulue nge. A ur e avele na thei awonga i velpol ma i opthesa vel aken, ma i matu, mako i kerenga selele.”

## 7

*Jisas i pasenu werer Rom a punongare ole mukalinga ile umonga.*

(Matiu 8:5-13)

<sup>1</sup> Ma Jisas i patoral vus toko na sengre nge ur areken. Lamako i eso a rem a Kaperneam. <sup>2</sup> Na punongare ole mukalinga ako ini toko Rom i voth, ma ile toko umonga omole ako ia sagu rintet i, ini multhang ma i toth ol aka aro i rin. <sup>3</sup> Ma punongare ole mukalinga aken i nongpola aka Jisas i voth a Kaperneam. Mako i pake Judare oa pompomere mo o ria i mo i es a i nge la, mo aro i pasenu werer ile umonga aken. <sup>4</sup> Ma o velpol a Jisas nge ma o nong engeng a i nge. Ma o ri ve, “Na mukalinga aken ini toko sivenga na i pavurvur aka aro wong opoesal i, <sup>5</sup> eneke ia sagu it Judare. Mako ranga ve i aria ler lotuonga a vel.” <sup>6</sup> Lamako Jisas i es tomo nge or la.

Lama nge aka i totho ol a vel aken nge, ma punongare ole mukalinga aken i pakepot ithangangaere, mo o el riong a Jisas nge la ve, “Toko Pomnga, wong mothong tova sabrepal wong nge esoong a lek vel lemi, eneke tho ini toko sivenga avele. <sup>7</sup> Na e mun e aka tho pavurvur aro tho es a wong nge wot avele, aveto aro wong ria inga, naro lek umonga aro i sivenga werer. <sup>8</sup> Na tho ri vene ake, eneke tho voth mun a tokokoe pelie osa thewo. Na tho mun, punonga pelie aka o voth a sek thewo. Na aro ve tho ria toko e ve, ‘Wong es la.’ Aro i es la. Na aro ve, tho ria toko e ve, ‘Wong es me.’ Aro i es me. Na aro ve tho ria

lek toko umonga ve, ‘Wong oma omaing ake.’ Aro i oma i.”

<sup>9</sup> Ma Jisas i nongpol riong aken ma i kukuk rintet nge. Ma i eksinga ma i ria toko na seng pulua ako ru o panes i ve, “Na tho ria thomu, tho thopol toko Juda e avele aka ile lemioong i aolonga ranga ve ini toko ake.” <sup>10</sup> Na tokokoe areko punongare ole mukalinga i pake or, o lo werer a ile vel la, ma o thopol aka Jisas i pasenu werer ile umonga aken lale.

*Jisas i palos werera kulpo aka i rin.*

<sup>11</sup> Na palolou tie, lamako Jisas i es nge rem pomnga a Nain. Na ile wainlangaere tomo nge toko na seng pulua aka o es tomo nge i la. <sup>12</sup> Na aka i velpola ol a rem pomnga aken a lok thekia. Ma o thepol tokokoe pelie aka o potun vung ma o espot me. Na kulpo aken ru i rin lale, i re inga aka ini seng basu aken itun. Na toko na seng puluanga aka ru nge rem pomnga aken, o es tomo nge seng basu aken. <sup>13</sup> Ma Toko Pomnga i thepol seng basu aken, ma ilemi esal rintet i. Ma i ria i ve, “Wong mothong tanging.”

<sup>14</sup> Ma i es totho la, ma i krima ring aka ru o potun vung aken nge. Ma tokokoe areko ru o potun i, o mitu. Ma Jisas i ria ve, “Wong kulpo ake, tho ria wong, ong losa.” <sup>15</sup> A ur e avele, na vung aken i mimi werera, mako i mena ol, ma i patea ol leng lenging, mako i voth tomo werer ol a inina nge.

<sup>16</sup> Ma tokokoere o kukuk na o risea God. Na o ri ve, “God ile riong elnga aolonga e ake i velpol a it nge lale. Na God i velpol lale aka aro i opoal

ile tokokoere.” <sup>17</sup> Ma Jisas ile omaing aken i kima ol a pen elonga, ako ru a epee a Judia, na a rem mun pelie ako o voth tothal i.

*Jon aka ini toko paninuonga i voth a mang a midenga, mako i pake ile wainlanga or aini a Jisas nge la.*

*(Matiu 11:2-19)*

<sup>18</sup> Ma Jon ile wainlangaere o ria i, nge ur alavusnga ako Jisas i oma i. Ma Jon i lenga ile wainlanga or aini, <sup>19</sup> ma i pake or paini a Toko Pomnga nge mo o nina i ve, “Wong re ake ini toko aka God i ategal wong ve aro ong es me, eve them thealal ake ini toko relnga, e?”

<sup>20</sup> Lamako o velpol a Jisas nge, ma or paini o ria i ve, “Jon aka ini toko paninuonga i pake them paini a wong nge me, ma i sis aka ve, i nina wong ve, ‘Wong re ake ini toko aka God i ategal wong ve aro ong es me, eve them thealal ake ini toko relnga, e?’”

<sup>21</sup> Na nge nang aken Jisas i pamimi werer toko na seng puluanga aka ni multhanging kerenga i voth a or nge. Na i wistetpot tamata kerengare aka o voth a or nge. Na toko theki prosnga pulua aka i vles otheki ma o the werer mun.

<sup>22</sup> Mako Jisas i olal werer a Jon ile wainlanga or aini aken ole riong ve, “Naro thomu paini o lo werer mo o ria Jon, nge ur alavusnga aka thomu paini o thepol i na o nongpol i. Ako ranga ve theki prosngare o the werer, na toko eve lilngare o senu werer, na tokokoe areko putput i voth a oni peti, oni peti i riri werer, na tokokoe areko otelnga gut o nongpol werer, na tokokoe

areko o rin lale, o mimi werer mun. Na toko le ur avelengare, o nongpol Panongpolong Sivenga. <sup>23</sup> Na sapase tokokoe areko o thepol lek omaing na ole lemioong i matu avele.”

<sup>24</sup> Na Jon ile pakekere o lo werer lale, lamako Jisas i patea ile riong nge a Jon a tokokoere nge, ma i ria or ve, “Nge wop lemi aton thomu o es a Jon nge a pen polpolnga la, na thomu o es la mo o thepol uneke, e? Thomu o es la mo o thepol inga pilil ako thue i thuu thua i? Avele. <sup>25</sup> Na thomu o es la mo o thepol uneke, e? Thomu o es la mo o thepol toko i teun tekruk sivesivengare? Avele, tokokoe areko oa malmaling i vene aken na ole ur elonga pom o voth inga ako ro a nepesre ole velre.

<sup>26</sup> Na thomu o es la mo o thepol uneke, e? Thomu o es la mo o thepol a God ile riong elnga omole, e? I re aken, na tho ria thomu, ina God ile riong elnga aken i aolo leltun a God ile riong elnga alavusnga.

<sup>27</sup> Na Jon ini toko aton ru nomenga God ile erere i ri nge vene:

‘God i ri vene:

Aro tho pake lek pakeke  
mo i mukal tel nge wong.

Naro i monsi nge lom sovengalo.’ *Malakai 3:1*

<sup>28</sup> Na tho ria thomu, Jon ile panongpolong i aolonga nge toko alavusnga ake ru a ulue ole panongpolong, aveto toko ako i posnga rintet nge areko o voth a God ile menong e nepes, toko aken ile panongpolong, i aolonga nge a Jon ile panongpolong.”

<sup>29</sup> Na toko na seng tomo nge umtun elngare, or alavusnga o nongpol riong aken ma o ri ve, “God

ile sovengalo kene i vengveng rintet.” Na o ri venen aken, eneke o panes a God ile sovengalo, ako o el paninuong a Jon nge lale. <sup>30</sup> Aveto Parisire na pamirealingare nge a Moses ile patorong, o el paninuong a Jon nge avele, mako ranga ve okime lelpot sovengalo aka God i pathengal i a or nge lale.

<sup>31</sup> Na Jisas i ria mun ve, “Na aro ve tho paton-grum toko na seng ake ru nge wop lemi ake ole vothung, aro tho oma i nge riong agelalnga le vanga ol, e? Na o ranga ve ini toko le vanga, e?

<sup>32</sup> O ranga ve ini wainlangare aka o arongrong nge pen aka ini pathunonga. Na wainlanga avlung relnga areko ru o leng a or ve,

‘Them vo lemi sivengaing a voing a thomu nge,  
aveto thomu o ri ve numu plong nge sesing,  
eneke lomumu kerere.

Mako them vo voing aka o voal rinongare  
nge,

aveto thomu o ri ve numu plong mun nge  
ngilelong,  
eneke lomumu sivenga.’

<sup>33</sup> Na thomu o venen aken, eneke Jon aka ini toko paninuonga i velpol, ma i an bret avele na i thin mun vain avele, aveto thomu o ri ve, ‘Tamata kerenga i voth a i nge.’ <sup>34</sup> Lamako Toko Pomnga Itun i velpol, ma i an na i thin, aveto thomu o ri ve, ‘O thopol toko aken! Ini toko aka i an rinrin na i thin rinrin vain. Na ini umtun elngare tomo nge toko le vothung kerengare othanga.’ <sup>35</sup> Aveto toko na seng areko o panes vengveng a God ile mire, ole vothung i pathengal it aka ve, o panes a God ile mire aka i vengveng, aveto lomu vothung

aken i pathengal it ako ve, thomu o panes toko ulue angare ole mire.”

*Jisas i voth a Saimon ile vel aken i Parisi.*

<sup>36</sup> Ma ine Parisi omole i nongpoo a Jisas mo i an tomo nge i, ma Jisas i eso a ile vel la ma i menu ma i an. <sup>37</sup> Ma seng omole aka i oma vothung kerenga i voth nge rem pomnga aken, ma i nongpol aka Jisas i an a Parisi aken ile vel, mako seng aken i ela botol sivenga aka o oma i nge anral aka sanda i voth nge, na i una vro rintet ma i es tomo nge i la. <sup>38</sup> Ma i es la ma i mitu a Jisas ikime totho aka ru a ieve tepun, na i tang ma i papis a Jisas ieve nge itheki einga, ma i girtet i nge isivenga ipounga thoi. Na i angongoal a Jisas ieve, na i ela sanda aken ma i taul i a Jisas ieve.

<sup>39</sup> Ma Parisi aken ru i nongpoo a Jisas, i thopol i, ma ilemi aka ve, “Aro ve toko ake ini a God ile riong elnga nunganga, aro ilemi mire nge seng aken ru i vugir i, ini seng aka i oma vothung kerenga pulua.”

<sup>40</sup> Ma Jisas ilemi mire nge toko aken ilemi, ma i ria i ve, “Saimon, lek riong omole ake ru i voth, aka aro tho ria wong nge.”

Ma Saimon i ria ve, “Pamirealinga, i sivenga aka aro ong ria tho nge.”

<sup>41</sup> Ma Jisas i ria i ve, “Na toko or aini aka oa thangaroong nge umtun a toko aka ini umtun sunga. Ma omole aka ia thangaroong or 5,000\* Kina, na toko aininga ia thangaroong i pavurvur inga nge 500† Kina. <sup>42</sup> Na or paini o pavurvur

---

\* **7:41:** Grik 500 Denarius. † **7:41:** Grik 50 Denarius.

aro o olal werer oa thangaroong areken avele. Mako toko aken i ria or paini ve, ‘Aro thomu o mothong tova olal werer omu thangaroong nge umtun areken.’ Na lomum vava? Or paini aken, kathnga aro ia sagu rintet i?”

<sup>43</sup> Ma Saimon i olal ile riong ve, “Lemik ako ve, ini toko ako ru ia thangaroong kene i aolonga, ma toko aken i ria ve aro i mothong ol olalnga.”

Ma Jisas i ria ve, “Lom riong aken i nunganga.”

<sup>44</sup> Ma Jisas itheki lel a seng aken nge, na i ria Saimon nge ve, “Wong thepol seng ake? Na tho eso a lom vel lemi, na wong theal senu tho avele, ranga ve aka wong sung thei avele aka aro ini ekek pautnga, aveto seng ake, kene i paut ekek nge isivenga itheki einga. Na i girtet ekek nge isivenga ipounga thoi. <sup>45</sup> Na wong nongpoo tho, aveto ong papomnga tho avele, aka ranga ve wong angongoal tho avele, aveto aka tho eso nge me, na seng ake i mosal inga aka ini ekek angongoalnga. <sup>46</sup> Na wong taul poungek avele, aveto seng ake i taul ekek nge sanda. <sup>47</sup> Na tho ria wong ve, seng ake kene ia sagu rintet tho na i pathengal i aka ve, God ilemi simikal ile vothung kerenga puluanga aken lale. Aveto toko aka ile vothung kerengare i pospos, ma God ilemi simikal i, aken ile asaguong i pospos mun inga.”

<sup>48</sup> Ma Jisas i ria seng aken ve, “Tho ria wong, God ilemi simikal lom vothung kerenga lale.”

<sup>49</sup> Na tokokoe areko ru o men tomo nge i ma o an, o nongpol riong aken ma o ri ol pel a osivenga nge ve, “Toko ake ini ao, aka i ri ve God ilemi simikal lom vothung kerenga lale, e?”

**50** Na Jisas i ria seng aken ve, “Na lom lemioong inga ako i pamimi wong, nge a God ile paomelaling lale. Na wong es na lomum i ngo pis.”

## 8

*Seng pelie ako o panes a Jisas ma o es tomo nge i.*

**1** Na nge kimenga mun e ako, Jisas i esu esa mun a rem pomngare na rumremre nge, na i panongpol nge Panongpolong Sivenga aka nge a God ile menong e nepes. Na ile wainlanga or mule pa omole pothoi or aini aton o es tomo mun nge i. **2** Na seng pelie aka nomenga Jisas i wistetpot tamata kerenga a or nge, na pelie i pamimi or nge ni multhanging, aka o es tomo nge i. Na omole aka ini a Maria Makdala anga. Na nomenga Jisas i wistetpot tamata kerenga or limai a i nge. **3** Na Kusa aka ini thealinga nge a Herot ile vel iewo sengenga aka iion a Joana, ome a Susana na seng mun pelie aka o es tomo mun nge a Jisas. Ma ine seng areken o sung ole ur elonga mo aka o opoal a Jisas tomo nge ile wainlangaere.

*Jisas i oma riong agelalnga nge toko aka i o wit monnga a ometa.*

*(Matiu 13:2-9; Mak 4:1-9)*

**4** Ma toko na seng pulua a rem pomnga elonga o velpol a Jisas nge. Ma toko na seng pulua rintet o pathun a i nge. Na Jisas i oma riong agelalnga a or nge ve, **5** “Na toko omole aka i es mo i ul vathar wit monnga a ia ometa. Ma i es na i ul vathar i, ma pelie o matmatu a sovengalo, ma tokokoere

o tepetuntun i na menre o koktet i, ma o an i.  
<sup>6</sup> Na wit monnga pelie ako o matmatu a wop ako ini um pipo ma wit monnga areken o metaploa, aveto o menine, mako o rin rin, eneke o metaploa a ulue ako thei nge avele. <sup>7</sup> Na wit monnga pelie ako o matmatu a kiki lemimi, ma kiki areken o plo tomoa nge or, ma o otuntun or. <sup>8</sup> Na wit monnga pelie ako o matmatu a ulue sivenga, ma o plo senu, ma o mon ma omonnga pulua. Ma or omole omole omonnga or mule pa mule nge or alavusnga.” Ma Jisas i oma riong agelalnga aken ma i vus, mako i pator mun or nge ve, “Na aro ve toko e i sis ve aro ilemi mire senu nge lek riong, mo i sivenga ako aro i ta senu itelnga nge lek riong ake.”

*Jisas i ritet riong agelalnga ako nge wit monnga mirenga a ile wainlangaere nge.*

*(Matiu 13:10-23; Mak 4:10-20)*

<sup>9</sup> Ma Jisas ile wainlangaere o nina i nge riong agelalnga aken mirenga. <sup>10</sup> Ma i ria or ve, “Na God i ri ve, i sivenga ako aro tho panine lomumu nge riong ako i ngo kine, nge a God ile menong e nepes, aveto tho panine toko na sengre olemi avele, mako tho ria or, nge riong ako i ngo kine, nge riong agelalnga inga mo aro Aisaia ile riong aro i velpol nunganga na ile riong i vene:

‘Aro o nak theu theaing,

aveto aro o thepol senu i avele.

Naro o ta senu otelnga,

aveto aro olemi mire nge mirenga avele.’”

*Aisaia 6:9*

<sup>11</sup> Ma Jisas i ria ve, “Riong agelalnga aken mirenga i vene: Ine wit monnga ake i paateal ako

ini a God ile riong. <sup>12</sup> Na ine wit monnga pelie ako o matmatu a sovengalo, ma o ranga ve ini toko na seng areko o nongpol a God ile riong, aveto Satan i es ma i eltetpot riong aken a or nge. Mako o pavurvur aro olemio ol nge avele, aken aro God i pamimi or avele. <sup>13</sup> Na wit monnga pelie ako o matmatu nge wop aka ini um pipi, ma o ranga ve ini toko na seng areko o nongpol a God ile riong na o el i ma olemi sivenga nge, aveto riong aken i teu avele a oopo lemi, mako ole lemioong i voth palolo vet avele. Na nge nang aka tongporumong i es a or nge ma o matu selele. <sup>14</sup> Na wit monnga pelie ako o matmatu a kiki lemimi, ma o ranga ve ini toko na seng areko o nongpol a God ile riong, aveto palolo avele na vothung ulue anga i velpoltun or, ranga ve olemio ol nge ur elonga na umtun na lemi sivengaing. Na ur areken i pasidal werer ole lemioong a God nge, ma o ranga ve ini wit monnga aka i vunvun avele. <sup>15</sup> Na wit monnga areko o matmatu a ulue sivenga, o ranga ve ini toko na seng areko olemi i nine na o nongpol a God ile riong, na o krim senu i. Na i ngo thau a oopo lemi na o nongal i na o mit engeng, ranga ve ini wit aka i mit engeng, na omonnga i voth.”

*God ile riong i ranga ve ini the lalainga aka o pamona i roro mo tokokoere o thepol i.*

<sup>16</sup> Ma Jisas i ria mun or ve, “Na aro ve toko e i pasise the lalainga, i mothong tova i pasopalu i nge alal, na i mothong mun tova i pango kineu i a ring thewo. Avele, aro o pamona i roro, na aro ve tokokoe o eso a vel lemi, aro o thepol inga

the lalainga aken. <sup>17</sup> Eneke panongpolong nge a God ile menong e nepes i ngo kine nomenga, aveto panen aro i ngo pat a lalanga. Na ur areko tokokoere olemi mire nge avele, panen aro i ngo patu mo toko alavusnga aro olemi mire nge. <sup>18</sup> Maken aro thomu o naktet thomu mo o nongpol senu riong, eneke aro ve toko e i krim engeng a God ile riong, aro God i sungu mun mire pom a i nge, nge ile riong. Na aro ve toko e i nongal a God ile riong avele, mire ako ilemi ve i voth a i nge, God aro i eltet werer i a i nge.”

*Areko o nongal a Jisas ile riong, ini ilengare.*  
*(Matiu 12:46-50; Mak 3:31-35)*

<sup>19</sup> Ma nge nang aken Jisas inina ome ititeinre o es a i nge mo o thepol i, aveto toko na seng pulua ako ru o mit kalual i ma o pavurvur aro o eso a i nge avele. <sup>20</sup> Ma toko omole ako i ria Jisas ve, “Ninom ome titeumre or ako ru o mit a lalanga, ma o ri ve aro o thepol wong.”

<sup>21</sup> Aveto i ria or ve, “Na tokokoe areko o nongpol a God ile riong mo o panes i, or re aken ini ok ninaere na titeikre.”

*Jisas i akrisal thue, mako thei i ngo thau.*  
*(Matiu 8:23-27; Mak 4:36-41)*

<sup>22</sup> Ma nge nang omole ako Jisas i ro a wok nge tomo nge ile wainlangaere, ma i ria or ve, “Aro te mon a thei a pamonlel wo epee.” Mako o patea ol moning. <sup>23</sup> Ma o mon makola Jisas i nokolkol a wok lemi. Ma palolo avele na thue aolonga i mita telek a thei stha nge anga me. Ma thei i limteto a wok lemi ma pa omole re ako aro o vlu.

**24** Mako o pavurpola a Jisas, ma o ri ve, “Toko Pomnga, Toko Pomnga, toth re ake aro te rin.”

Ma Jisas i losa ma i akrisal thue na thei le lolikong, ma thue ome thei le lolikong o poreng na thei i ngo thau ol. **25** Ma i nina or ve, “I vava, lomu lemioong i voth a kath?”

Ma o kukuk na o ngeip na o ria ol pel ve, “Na toko ake ini ao ake i akrisal thue na thei le lolikong ma o nongal inga ile riong, e?”

*Jisas i wistetpot tamata kerenga a toko omole nge.*

*(Matiu 8:28-34; Mak 5:1-20)*

**26** Lamako Jisas ome ile wainlangaere o mon, makola o velpol a epee a Gerasa, wop aken ini Judare ole avele. Na pen epee aken i voth a thei a pamonlel wo epee na pen epee a Galili i voth a wo epee. **27** Lamako Jisas i ru a wok nge ma i mitu a thei wopo, na toko omole ako nge pen epee aken i es ma i velpol a i nge. Na tamata kerenga pelie ako o voth a toko aken nge. Na nomenga vet ako me, i ne vet teunong e avele na i lila inga. Na i voth nge vel e avele, i voth inga ako a vuvepun a silkep. **28-29** Na nge nang pulua tamata kerengare o rero toko aken. Na nomenga tokokoere o tongporum imitroalnga, na o kin ieve na imeni nge sen, na mit tetalongare o theal tetal i, aveto i uriro ur alavusnga areken. Ma tamata kerengare o paes i a pen polpolnga aka toko e i voth nge avele. Ma toko aken i thepol a Jisas. Na Jisas i ria i ve, “Thomu tamata kerengare o lopot a toko aken nge.” Ma toko aken i wal na i matu toth a Jisas ieve tepun, na i presa viringa ve, “Jisas, wong ini a God aka i aolonga rintet kene Itun. Na

lom neke i voth a tho nge? Na tho nong ong ve mothong tova pakerenga tho.”

<sup>30</sup> Ma Jisas i nina i ve, “Iom anga?”

Ma i olal ile riong ve, “Iok a Pulua.” Eneke tamata kerenga pulua o voth a i nge. <sup>31</sup> Ma tamata kerenga areken o tangoso a Jisas nge ve, i mothong tova i pakeu or a paomelalinga a pen.

<sup>32</sup> Na kie avlung ako o an toth a pen sa thewo. Ma tamata kerengare o nong engeng a Jisas nge ve, “Aro ong pakeo inga them mo them rero inga a kiere nge.” Mako Jisas i pakepot or, ma o es. <sup>33</sup> Lamako tamata kerenga areken o lopot a toko aken nge ma o rero kie areken. Ma kie areken o thou thou a ruprup, makola o matu a thei a pamonlel lemi ma o vlu, mako ini ole rinong.

<sup>34</sup> Ma kie thealngare o thepol ur aken ako i velpol, mako o lo ma o pakima ol ur aken a rem pomnga na nge pen elonga areko o toth nge rem pomnga aken. <sup>35</sup> Mako toko na sengre o es mo o thopol ur nekenga ako i velpol. Ma o velpol a Jisas nge, ma o thepol toko aka tamata kerengare o lopot a i nge ako i men a Jisas ieve tepun na i teunu ol teunong na ilemi nineu ol, mako o ngeip nge. <sup>36</sup> Ma tokokoe areko o thepol ur areko i velpol, o rurumpot i a toko na sengre nge, nge ur aka Jisas i oma i, aka i pamimi toko aka nomenga tamata kerengare o voth a i nge. <sup>37</sup> Lamako toko na seng areko ru a pen epee a Gerasa, o ri engeng nge a Jisas ve, aro i lo lelpot or, eneke o ngeip rintet nge i. Mako Jisas i ro a wok nge mo aro i lo werer.

<sup>38</sup> Na toko aken ru tamata kerengare o lopot a i nge, i tangoso a Jisas nge ve, “Aro tho panes

wong!” Aveto Jisas i pake werer i, na i ria i ve,  
 39 “Wong es werer a lom rebo, na wong es mo  
 wong panongpol toko na sengre nge ur alavusnga  
 areko God i oma i a wong nge.” Mako toko aken  
 i es ol, ma i panongpol riong a toko na seng  
 alavusnga a ile pen. Ma i ri nge ur alavusnga  
 areko Jisas i oma i a i nge lale.

*Jisas i pamimia seng or aini.  
 (Matiu 9:18-26; Mak 5:22-43)*

40 Lamako Jisas i mon werer a thei a pamonlel wo epee. Ma toko na seng olemi sivenga nge ile velpoling, eneke or alavusnga o men tetal re ako ini i. 41 Na toko omole ako i velpol, iion a Jairus. Na ini Judare ole lotu a mukalinga e. Ma i es la ma i koru ieve na ipo tiru totho ako ru a Jisas ieve tepun. Ma i tangoso a Jisas nge ve aro i es tomo nge i a ile vel la. 42 Eneke itun omole inga ako ini seng i toth re ako aro i rin. Na ia tovu po or mule pa omole pothoi or aini.

Mako Jisas i es ol la. Ma toko na seng pulua ako o es tomo nge i ma o mumrongtuno i. 43 Mako seng omole ako i voth tomo nge or, na sengre oa ni multhanging ako o thopol ngov i pesrou a i nge avele. Ma i pavurvur nge tovu po or mule pa omole pothoi or aini. Na toko e avele i pavurvur aka aro i pavus ia ni multhanging aken. 44 Na seng aken i es ma i mito a Jisas ikime, ma i vugiro a Jisas ia teunong ongepo. Na a ur e avele, nako ia ni multhanging aken i vus.

45 Mako Jisas i nina ve, “Anga i vugir tho?”

Aveto or alavusnga o lela. Mako Pita i ria ve, “Toko Pomnga, pulua pomnga ake o mumrongtun ong.”

<sup>46</sup> Aveto Jisas i ria ve, “Toko omole i vugir tho, lemik mire ako engengeng pelie i espot a tho nge lale.”

<sup>47</sup> Mako seng aken i thopol i ako i pavurvur ako aro i mit kine avele, ma sawir i, mako i espot ma i koru ieve a Jisas ieve tepun. Ma i pamilempot a tokokoere otheki nge tepun ako i vugiro i ma i ria ve, “A ur e avele, nako nik multhanga aton i vus.” <sup>48</sup> Ma Jisas i ria i ve, “Luk, ong mimi re lale aken, eneke lomumo ve, tho pavurvur ako aro tho pamimi ong. Na ong es la na opom lemi aro i vual nge a God ile lemi moring.”

<sup>49</sup> Ma rongan Jisas i ri, na toko omole ako i plosa a Jairus ile vel ma i velpol, ma i ria Jairus ve, “Mothong tova kenkeno ol nge pamirealinga aken, eneke tum kene i rin lale.”

<sup>50</sup> Ma Jisas i nongpola riong aken, ma i ria Jairus ve, “Mothong tova wong ngeip, lomumo inga nge tho naro tum aro i mimi werer.”

<sup>51-53</sup> Na Jisas i velpola ol a Jairus ile vel. Na toko na seng alavusnga ako ru o voth a vel aken ma o tang ma o walal nge wain aken. Aveto Jisas i ria or ve, “Thomu o mothong tova o tang. Wain atiken i rin avele, i nokolkol aken.”

Na tokokoere o nongpol riong aken ma o ngenge lital i, eneke olemi mire ako ve, wainlanga atiken i rin lale. Aveto Jisas i wenalo toko na seng e avele ako aro i es tomoo nge i a vel lemi la. Aveto i wolo inga ako ini a Pita na Jems na Jon na wain aken inina ome itema, or inga ako o es tomoo nge

i. <sup>54</sup> Na i krima wain aken imeni na i lenga i ve, “Wainlangga, losa!” <sup>55</sup> A ur e avele na wainlangga aken ion i lo werero mun a i nge. Mako i losa, mako Jisas i ria or ve aro o sungu aning pelie a i nge mo i an i. <sup>56</sup> Ma itema ome inina o kukuk rintet nge, aveto Jisas i pator engeng or paini ve, “Na thomu o mothong tova o ria toko pelie nge ur ake i velpol.”

## 9

*Jisas i sung omaing a ile wainlangga or mule pa omole pothoi or aini nge.*

*(Matiu 10:9-15; Mak 6:8-11)*

<sup>1</sup> Na Jisas i leng ile wainlangga or mule pa omole pothoi or aini a i nge me. Ma i sungu engeng-ing aolonga a or nge, mo ako aro o wistetpot tamata kerengare na o pamimi ni multhanging kerengare. <sup>2</sup> Na i pakepot or mo o panongpol nge a God ile menong e nepes, mo o pamimi ni multhangingare. <sup>3</sup> Ma i ria or ve, “Na thomu o mothong tova o el ur pelie nge lomu esong, ako ranga ve ini eel, na alal, na aning, na umtun. Na thomu o mothong tova o el mun lomu teunong pelie. <sup>4</sup> Na aro ve thomu o velpol a rem e, na toko i nongpoo thomu a ile vel, aro thomu o ngo inga nge vel aken, i pavurvur nge nang ako aro thomu o plos lelpot nge rem aken. <sup>5</sup> Na aro ve tokokoere o nongpoo thomu avele, aro thomu o los lelpot nge rem aken. Na o tepluspot rem aken a yuvus a evomu salemi a tokokoere otheki, mo ini ole paatealinga ako o nongal nge a God ile riong avele, mo aro ole vothung kerenga i ngo

reletun a or nge.” <sup>6</sup> Lamako Jisas ile wainlangga areken o losa ma o esu esa a rumremre. Na o panongpol nge Panongpolong Sivenga na o pamimi ni multhangingare a pen elonga.

*Herot i nongpola a Jisas ile omaing ma ilemi ngo pelekpol nge.*

(Matiu 14:1-2; Mak 6:14-16)

<sup>7</sup> Na Herot ako ini Galili angare ole nepes, i nongpola ur alavusnga aka i velpol ol. Ma ilemi ngo pelekpol, eneke toko pelie aka o ri ve, “Jon aka ini toko paninuonga i mimi werera a vuvepun.” <sup>8</sup> Na oa pelie aka o ri ve va ini a Elaija i velpol werer. Na oa pelie o ri mun ve, “Ava ini a God ile riong elnga nomenganga omole aka i mimi werera mun.” <sup>9</sup> Mako Herot i ri ve, “Na Jon ake tomo tho ria mo o sorotetpot ikei lale, na toko aken kene ini ol i anga aka tho nongpol omaing engenga aka i oma i, e?” Na i kath sovengalo aka aro i thepol a Jisas nge.

*Jisas i paan tokokoere aka oa titaling i aoselea 5,000.*

(Matiu 14:13-21; Mak 6:32-44; Jon 6:5-13)

<sup>10</sup> Ma Jisas ile pakekere o lo werer ol, ma o ria Jisas nge ur alavusnga aka o oma i. Ma Jisas i wola or ma oenga inga aka o es a pen polpolnga aka i toth nge rem pomnga aka iion a Betsaida. <sup>11</sup> Aveto toko na seng o nongpol i aka i es lale, mako o paneso sele i, ma o velpol a i nge. Ma i nongpoo or, ma i panongpol or nge a God ile menong e nepes. Na i pamimi toko na seng areko oni multhang.

**12** Na toth nge nang le sivlukong na Jisas ile wainlanga or mule pa omole pothoi or aini aken o es a i nge, ma o ria i ve, “Na i sivenga ako aro wong pakepot toko na seng a rumremre la mo aro o el aning nge, na o nokolkol nge, eneke wop ake te voth nge ini pen polpolnga.”

**13** Aveto Jisas i ria or ve, “Thomu re ake aro o sungu aning a or nge.”

Ma o olal ile riong ve, “Aveto emem aning pom avele. Na ini inga bret or lim na silang or aini. Na aning ake i pavurvur avele tova them es mo them ol pulua pomnga ake oa aning.” **14** Eneke totomonere inga oa titaling i mul nge 5,000.

Ave Jisas i ria ile wainlangaere ve, “Thomu o ria or mo o men nge avlung avlung mo mule pa lim nge avlung omole omole.” **15** Mako Jisas ile wainlangaere o ria or venen aken, lamako o menu ol. **16** Lamako Jisas i ela bret or lim aken, na silang or aini aken, ma ipo watha a sepsa la ma i ri sivengaing a God nge. Mako i inreku bret na i insisau silang ma i sungu i a ile wainlangaere nge, mo o sung sung ol i a toko na sengre nge. **17** Ma or alavusnga o an, ma osa pup. Ma oa aning uluo o patu i nge alal aolonga or mule pa omole pothoi or aini.

*Pita i ritet nge a Jisas ako ini toko ako God i ateal i ve aro i el werer ile tokokoere.*

*(Matiu 16:13-16; Mak 8:27-29)*

**18** Ma nge nang omole ako Jisas ienga i voth ma i nong. Na ile wainlangaere o velpoltun i. Ma i nina or ve, “Na toko na sengre o ri ve va, tho ini ao?”

<sup>19</sup> Ma o olal ile riong ve, “Na oa pelie o ri ve, wong ini a Jon aka ini toko paninuonga. Na pelie mun o ri ve, wong ini a Elaija. Na pelie mun o ri ve, wong ini a God ile riong elnga nomenganga omole aka i mimi werera mun.”

<sup>20</sup> Ma i nina or ve, “Na thomu kene o rivenga, tho ini ao?”

Ma Pita i olal ile riong ve, “Wong ini toko aka God i ateal ong mo aro ong el werer ile tokokoere.”

<sup>21</sup> Ma Jisas i ri engeng a or nge ve, o mothong tova o rimilimlem riong aken a tokokoere nge.

*Jisas i ritet nge ile rinong na nge ile los wereraing.*

(Matiu 16:21-28; Mak 8:31–9:1)

<sup>22</sup> Na Jisas i ri ve, “Naro Toko Pomnga Itun aro i el sisisong puluanga. Naro Judare oa pom-pomere, na pris kimangare, na pamirealingare nge a Moses ile patorong, aro o pilalpot i naro o pun rin i. Naro nang or me aro i vus lamo i los werera mun a vuvepun.”

<sup>23</sup> Ma i ria or alavusngare ve, “Na aro ve toko i sis ve i panes tho, aro i paesu i ruru na i mothong tova i panes isivenga ilemi, naro i potun isivenga ia won ngoronga nge nang elonga mo aro i panes tho.

<sup>24</sup> Eneke toko aka i krim engeng isivenga ile mimiong, aken aro ile mimiong aro i penthal. Aveto toko aka i mothong isivenga ile mimiong panesnga, mo aro i panes tho, aro i el mimiong aka aro ile vusonga avele.

<sup>25</sup> Na aro ve toko e i el ile ur elonga pulua ake ru a ulue, aveto panen nge ile rinong, aro ve ion i kerenga, aro ile ur elonga aro i opoal i vava?

<sup>26</sup> Na aro ve toko e aka

ile maral nge tho na lek riong, aro Toko Pomnga Itun ile maral mun nge toko aken, tova i velpol ini nepes tomo nge ile engenging na ile tolilisong na tomo mun nge Itema na ensel riringare ole engenging and ole tolilisong mun. <sup>27</sup> Na tho ri nunganga a thomu nge, thomu pelie ake ru o mit aro thomu o rin rongan naro thomu o thopol a God ile menong e nepes aken.”

*Jisas ini peti i eksing rintet ma i tolilis.*

*(Matiu 17:1-8; Mak 9:2-8)*

<sup>28</sup> Ma Jisas i oma riong aken, lama nang or limme i vus, ma i wola a Pita, Jems na Jon ma o esa a tete polemi la, mo aro o nong nge. <sup>29</sup> Ma i nong na itheki lemi i eksing ma i rel rintet na ia teunong i velpol ma i tolilis na i veleles rintet. <sup>30</sup> Na a ur e avele na toko or aini ako o velpoltun i ma o ri tomo nge i. E ini a Moses na e ini a Elaija. <sup>31</sup> Na or paini o velpol tomo nge a God ile tolilisong. Na or paini o ri tomo nge a Jisas nge ile rinong ako i toth aro i velpol a Jerusalem. <sup>32</sup> Na Pita ome ithangangaere otheki nong nong, mako o nokolkol. Ma o vurpol werera na o thepol a God ile tolilisong aka i velpol a Jisas nge na o thopol mun toko or aini ako o mit tomo nge i. <sup>33</sup> Na toth ol aka aro toko or aini aken o los lelpot ol nge a Jisas mo o es, na Pita i ria Jisas ve, “Pamirealinga, i sivenga ake them voth inga ake, naro them aria valvale or me, naro omole ini lom na omole ini a Moses ile na omole ini a Elaija ile.” Na Pita ilemi mire senu nge uneke aka i ri nge, kene avele.

<sup>34</sup> Na rongan Pita i ri na songen aolonga aka i pavlestun or ma o ngeip rintet, eneke i vlestunu

or. <sup>35</sup> Ma lenging ako i espot a songen aken lemi ma i ri ve, “Ake ini Tuk, aka tho ateal i lale ve aro i oma lek omaing. Naro thomu o nongal ile riong.” <sup>36</sup> Na lenging aken i vusu, lamako o thepol a Jisas ienga aka ru i mit ol. Na nge wop lemi aka Jisas rongan i mimi, ile wainlangga or me aken o ria toko e avele nge uneke aka o thepol i lale.

*Jisas i pamimi wainlangga aka tamata kerenga i voth a i nge.*

(Matiu 17:14-18; Mak 9:14-27)

<sup>37</sup> Na nge erangunga ma o losa a tete aken ma o esu me. Ma toko na seng pulua aka o thepolo or. <sup>38</sup> Na toko omole aka ru nge toko avlung aken i presa ve, “Pamirealinga, tho nong wong, wong thepol tel tuk tomonnga ake, eneke tuk re inga omole ake. <sup>39</sup> Na tamata kerenga e aka i rero i nge nang elonga ma i walal kerere, ma tamata kerenga aken i rero i ma sawirwir i na ia molpe i palalas a iwo. Na i pakerenga rintet ini peti, na i lopot virial a i nge avele. <sup>40</sup> Na tho tangoso a lom wainlangaaere nge ve, aro o wistetpot tamata kerenga aken, aveto o pavurvur avele.”

<sup>41</sup> Ma Jisas i olal ile riong ve, “Na thomu toko na seng ake o mimi nge wop lemi ake, lomu lemioong tie avele. Na lomu vothung i kerenga. Na tho potun lomu matheong evelelnga naro tho voth tomo e thomu palolo avele. Na penva aro lomu lemioong aro i engeng?” Na i ria wain aken itema ve, “Wol tum aken a tho nge me.”

<sup>42</sup> Na wainlangga atiken i es toth ol a Jisas nge me, ma tamata kerenga aken i pamatu i ruru ma sawirwir rintet i, aveto Jisas i vol tamata kerenga

aken, ma i pamimi werer wainlanga aken, mako i pake werer i a itema nge la. <sup>43</sup> Ma or alavusnga o kukuk rintet nge a God ile engenging aolonga aken.

*Jisas i ri mun paininga nge ile rinong.  
(Matiu 17:22-23; Mak 9:30-32)*

Ma toko na seng rongan olemi pelekpol nge ur alavusnga ako Jisas i oma i. Ma Jisas i ria ile wainlangaere ve, <sup>44</sup> “Naro thomu o ta senu telngomu mo o nongpol riong ake, aro o sung Toko Pomnga Itun a toko kerengare omeni.” <sup>45</sup> Aveto ile wainlangaere olemi mire nge riong aken tepun mirenga e avele. Eneke God i parong kine riong aken mirenga a or nge. Ma o ngeip nge ininnga, aka aro i ria or nge riong aken mirenga.

*Jisas ile wainlangaere o ser pel nge anga aka aro i mukal ole.  
(Matiu 18:1-5; Mak 9:33-37)*

<sup>46</sup> Ma nge nang omole e aka Jisas ile wainlangaere o ser pel nge aka aro oa kathnga aro i aolonga nge or. <sup>47</sup> Ma Jisas ilemi mire nge olemi, mako i wola wain atiko ma i pamitu i totho a ilo sei. <sup>48</sup> Ma i ria ile wainlangaere ve, “Na toko aka i paruru isivenga na i nongpoo wain ti e ranga ve ini wainlanga atike, eneke ilemio nge tho, akennga kene i nongpoo aka ini tho. Na toko aka i nongpoo tho, kene i nongpoo aka ini a God aka i pake tho me, eneke toko aka ilemi ve ini toko polpolnga aka ru a thomu nge, aken ini toko aolonga a God itheki.”

*Jisas i ri ve toko ako ini lomu ngarang avele, aken ini thongomu.*

*(Mak 9:38-40)*

<sup>49</sup> Ma Jon i ria ve, “Toko Pomnga, them thepol toko e aka i wistetpot tamata kerenga nge iom, ma them rial vet i nge, eneke i voth tomo nge it avele.”

<sup>50</sup> Aveto Jisas i ria i ve, “Na thomu o mothong tova o rial i nge, eneke toko aka ini lomu ngarang avele, aken aro ini thongomu.”

## **Jisas i patea ile esong a Jerusalem la, tomo nge ile wainlangaere**

*(Vonge 9:51-19:27)*

*Samaria angare oni plong ve aro Jisas i eso a ole pen.*

<sup>51</sup> Na i toth lale aka aro Jisas i esa a Pen a Urvet la, mako ile lemi rumong i engeng ol aka aro i esa a Jerusalem. <sup>52</sup> Mako i pake tokokoe pelie mo aro o mukal mo o eso a rem e aka a Samaria mo aro o thopol vet vel pelie aka aro o ngo nge.

<sup>53</sup> Aveto rem lemiare, oni plong ve aro o nongpoo a Jisas. Eneke olemi mire aka aro i es a Jerusalem la, mo i lotu nge.\* <sup>54</sup> Na ile wainlanga or aini aka ini a Jems ome a Jon o thepol tokokoe Samaria angare ole vothung aken, ma or paini o nin a Jisas ve, “Toko Pomnga, wong sis aka aro them paini them lengu won sesenga a sepsa me mo i ongtun

---

\* **9:53:** Samaria angare ole Lotu Tepun a Vel i voth a Gerisim. Aveto Judare ole Lotu Tepun a Vel i voth a Jerusalem. O thopol a Jon 4:20. Na Samaria angare o ri ve Judare o panes vengveng lotuong avele, mako oni plong ve aro o opoal toko e aka i es a Jerusalem mo aro i lotu nge.

tokokoe areke?” <sup>55</sup> Aveto Jisas i eksing werera ma i vol or paini. <sup>56</sup> Mako o es ol a rem relnga ol la.

*Jisas i ri nge vothung ako tokokoere aro o oma i mo aro o panes i.*

*(Matiu 8:19-22)*

<sup>57</sup> Na Jisas tomo nge ile wainlangaere o es a sovengalo la. Na toko omole aka i ria i ve, “Na pen alavusnga aka aro wong es nge, aro tho panes wong nge.”

<sup>58</sup> Ma Jisas i ria i ve, “Na nanau kleng lemimi anga ile silkep i voth. Na menre ole ring i voth. Aveto Toko Pomnga Itun imei avele aka aro i ngo nge.”

<sup>59</sup> Ma Jisas i ria toko relnga mun e aka ve, “Wong es me mo panes tho.”

Aveto toko aken i ria ve, “Toko Pomnga, som wompot tel tho, mo tho es mo tho tetun tel ok vovo.”

<sup>60</sup> Ma Jisas i olal ile riong ve, “Na tokokoe areko ooni i rin lale, aro osivenga o tetun olengare aka o rin mun. Aveto aro wong es mo wong panongpol nge a God ile menong e nepes.”

<sup>61</sup> Na toko relnga mun e aka i ria mun a Jisas ve, “Toko Pomnga, aro tho panes wong, aveto aro som wompot tel tho, mo tho lo werer mo tho paioal tel lek vel lemiare.”

<sup>62</sup> Na Jisas i olal ile riong ve, “Na aro ve toko e i patea ia ometa omanga, aveto ilemi rum mun omaing relnga mun e, toko aka i venen aken i pavurvur aro i oma omaing nge a God ile menong e nepes, kene avele.”

# 10

*Jisas i pakepot toko or 72 nge ile omaing.*

<sup>1</sup> Lamako Jisas i atealpot ile wainlangga or mule pa limai pothoi or aini, ma i pakepot or mo o es aini aini mo o mukal tel nge rem pomnga na rumrem areko ilemi ve aro i es nge. <sup>2</sup> Na i ria or ve, “Na aning pulua aka i motutet aka a ometa, aveto umonga pulua avele aka aro o el aning areken. Naro thomu o nong engeng nge ometa tokoninga mo aro i pake toko umonga pelie mo o veliloala aning areken. <sup>3</sup> Naro thomu o es! Tho pakepot thomu ranga ve ini sipsip tutun areko o voth a nanau kleng angare oa lemimi. <sup>4</sup> Naro thomu o mothong tova o el umtun le ngoinga, na alal na evomu salemia. Naro thomu o mothong tova o pathokeal tokokoere a sovengalo aro vene mo o mit roal thomu.

<sup>5</sup> “Na aro ve thomu o eso a vel e lemi, aro a mukaling aro thomu o ri vene, ‘Aro God ile lemi moring aro i voth a thomu nge.’ <sup>6</sup> Na aro ve toko lemi mornga e i voth nge vel aken, aro lemi moring aken ru thomu o ri nge, aro i es a toko aken nge. Aveto aro ve toko lemi mornga e avele aka i voth, aro lemi moring aken ru thomu o ri nge, aro i lo werer a sivengomu nge me. <sup>7</sup> Naro thomu o voth inga nge vel aken, naro thomu o an na o thin ur inga areko o sungu i a thomu nge, eneke toko umonga aro i el iolonga. Na thomu o mothong tova o koru kora a vel elonga, mo o theo theo oa ur pelie.

<sup>8</sup> “Na aro ve thomu o eso a rem pomnga e, na aro ve o nongpoo thomu, aro thomu o an inga

aning ako ru o sungu i a thomu nge. <sup>9</sup> Naro thomu o pamimi ni multhangingare ako ru o voth nge, naro thomu o ria or ve, ‘God ile menong e nepes, i toth ol a thomu nge lale.’ <sup>10</sup> Aveto aro ve thomu o eso a rem pomnga e, naro o nongpoo thomu avele, aro thomu o es a rem pomnga aken lemi pat na o ria or ve, <sup>11</sup> ‘Na lomu rem pomnga a vuvus i tetuno a evemem, aro them tepluspot i mo them pathengal thomu aka vothung aken thomu o oma i kene i sivenga avele. Aveto aro lomumu mire aka ve, God ile menong e nepes, i toth ol a thomu nge lale.’ ” <sup>12</sup> Na Jisas i ria mun ile wainlangaere ve, “Na tho ria thomu, nge nang aka God i ateal i lale ve aro i pamit toko na seng nge riong, paomelaling aka aro God i sungu i nge rem pomnga aken, aro i aolo leltun paomelaling aka aro i sungu i nge rem pomnga a Sodom.” \*

*Jisas i ritet nge paomelaling aka aro i velpol nge rem pomnga areko o lel okime nge i.*

(Matiu 11:21-23)

<sup>13</sup> Mako Jisas i ria mun ve, “Patong toko na seng Korasin angare, na tomo mun nge toko na seng Betsaida angare. Eneke tova ve toko e i es a rem pomnga a Tair na Saidon† na i oma pathepolong pulua aka ranga ve tho oma i ake ru a thomu nge lale, aken aro palolo vet avele na Tair na Saidon angare aro o eksing olemi, na o teuna teunong aka ini lemi kerereong a teunong na o vor vor

---

\* **10:12:** Nomenga Sodom angare ole vothung i kerenga rintet, mako God i pakerenga sele or alavusnga. O thopola Luk 17:29 na Stat 19:24-28, na Jut 1:7. † **10:13:** Judare o rivenga Tair na Saidon angare ole vothung alavusnga i kerenga selele.

vuvus a opounga ako aro i paateal ve, o lel okime nge ole vothung kerengare lale. Aveto thomu, kene avele. <sup>14</sup> Na nge nang ako aro God i pamit toko na seng alavusnga nge riong, paomelaling ako aro God i sungu i a thomu nge, aro i aolo leltun paomelaling ako aro i sungu i a toko na sangre nge ako a Tair na Saidon. <sup>15</sup> Na thomu tokokoe Kaperneam angare aro God i papomnga thomu mo o roro rintet avele, aro i paesu rintetu thomu ruru!"

<sup>16</sup> Ma Jisas i ria mun ile wainlanga or mule pa limai pothoi or aini aken ve, "Toko aka i nongal thomu, akennga i nongal ake ini tho. Na toko aka ikime lelapot thomu, akennga ikime lelapot ake ini tho. Na toko aka ikime lelapot tho, akennga ikime lelapot ake ini a God aka i pake tho me."

*Toko or 72 aka Jisas i pake or, o lo werer.*

<sup>17</sup> Lamako tokokoe or mule pa limai pothoi or aini aka Jisas i pake or, o lo werer ma olemi sivenga rintet, ma o ri ve, "Toko Pomnga, ine tamata kerengare o nongal mun inga them aka them wistetpot or nge iom."

<sup>18</sup> Ma Jisas i olal ole riong ve, "Tho thopol a Satan aka God i asespot i a sepsa me ranga ve ini pen kitnga. <sup>19</sup> Na o nongpol, tho sung engenging a thomu nge lale. Na thomu o pavurvur aka aro o tepetuntun pilimo kerenga na telenga. Na thomu o pavurvur aka aro lomu mong lomu ngarangre ole engenging alavusnga. Na ur e avele i pavurvur aro i pakerenga thomu. <sup>20</sup> Aveto thomu o mothong tova lomumu sivenga nge aka tamata kerengare o nongal thomu, aro lomumu

sivenga ako God i watu iomu a ile erere nge lale  
ako a Pen a Urvet.”

*Jisas ilemi sivenga rintet ma i paesa a God iion roro.*

(Matiu 11:25-27; Matiu 13:16-17)

<sup>21</sup> Na nge ole lo wererong Oni Riringa i pavual a Jisas nge lemi sivengaing ma i ria ve, “Vovo, ong ini Toko Pomnga nge Pen a Urvet na ulue. Na tho ri sivengaing a ong nge, eneke ong parong kineal ur areken nge toko powe ninengare tomo nge areko ole mire i aolonga. Na ong pathengal inga i nge toko areke o es nge pamirealing avele. I nunganga, Vovo, ong panes inga ako ini lomum, mako ong oma i venen aken.”

<sup>22</sup> Na Jisas i ria ile wainlangaere ve, “Na Vovo i sungu ur alavusnga a menik lale. Na toko e avele ilemi mire nge Itun, Itema inga ilemi mire nge i. Na toko e avele ilemi mire nge ok Vovo aken, ini Itun tomo nge tokokoe areko Itun i ategal or ve aro i pathengal i a or nge. Na or inga ako aro olemi mire nge ok Vovo.”

<sup>23</sup> Lamako Jisas i eksing a ile wainlangaere nge, ma i ria inga oenga nge ve, “Sapase thomu, eneke thomu o thepol ur areko thomu o thepol i lale. <sup>24</sup> Na tho ria thomu, nomenga God ile riong elngare na nepesre o sis aka ve, o thepol ur areko thomu o thepol i, aveto o thepol ol i avele. Na o sis aka ve, o nongpol riong areko thomu o nongpol i, aveto o nongpol ol i avele.”

*Jisas i oma riong agelalnga nge toko Samaria anga aka i oma vothung sivenga.*

(Matiu 22:34-40; Mak 12:28-31)

<sup>25</sup> Nge nang omole e ako toko omole ako ini pamirealinga nge a Moses ile patorong, i mita ma ia pun ako ve, i tongporum a Jisas, ma i nina i ve, “Pamirealinga, aro tho oma neke ako aro tho el mimiong ako aro ile yusonga avele, e?” <sup>26</sup> Na Jisas i nina i ve, “Moses ile patorong i ri neke? Na ong tital i ma i ria ong vava?”

<sup>27</sup> Na toko aken i olal ile riong ve, “Aro omu sagu a God, aka ini omu Pomnga, nge opomu alavusnga, na nge onumu alavusnga, na nge lomu engenging alavusnga, na nge lomumu alavusnga.” ‡ Naro ‘Omú sagu thongongomuere ranga ve aka omu sagu sivengomu.’ ” §

<sup>28</sup> Ma Jisas i ria i ve, “I nunganga, ong olal vengveng re i aken. Na aro ve ong oma i venen aken, aro ong el mimiong.”

<sup>29</sup> Aveto pamirealinga nge a Moses ile patorong aken ini plong ve ile maral nge ile ninong aken, mako i nin a Jisas ve, “Na anga aka ini then-gengekre, e?”

<sup>30</sup> Na Jisas ilemi ve aro i pathengal or nge toko kathnga areko aro oa sagu or, mako i ri riong agelalnga ake a or nge ve, “Toko Juda omole aka i lospot a Jerusalem, ma i esu a rem pomnga a Jeriko la. Ma i thopolو toko kemongare a sovengalo ma o siso i, ma o kem ile ur elonga na o lo, na i ngo a sovengalo ma i toth ol nge ile riong.

<sup>31</sup> Na ur aken i velpol vengtun nge nang aka Juda a pris omole aka i es rum nge sovengalo aken. Ma i thepolo toko aken, aveto i geltet inga a sovengalo wo peti epee na i es la. <sup>32</sup> Na nge sovengalo mun

---

‡ **10:27:** Lo 6:5    § **10:27:** Wok Pris 19:18

re aken lotuonga a omainga ako ini toko Juda, i es mun nge, ma i velpol nge wop aken, ma i thepol toko aken ma i geltet mun a sovengalo epee ma i es la. <sup>33</sup> Aveto toko Samaria\*\* omole ako i panes mun sovengalo aken, ma i velpol a toko aken nge. Ma i thepol i ma ilemi esal rintet i. <sup>34</sup> Ma i eso a i nge la, ma i odorok wel tomo nge vain a ia soroing areken nge, na i wistuno i re. Ma i visloa toko aken, ma i pangoa i a isivenga ia donki nge. Ma i pasong i a ngoaloinga a vel omole ako nge, ma i theal senu i nge. <sup>35</sup> Lama nge erangunga i ela 20† Kina ma i sungu i a ngoaloinga a vel aken tokoninga nge, ma i ria i ve, ‘Aro ong theal senu toko ake, na aro ve ong ulpot lom umtun pelie nge ithealnga, panen aro tho lo werer mun vene ake me, aro tho olal werer mun lom ur elonga areken.’ ”

<sup>36</sup> Ma Jisas i pavus ile riong agelalnga, mako i nina mun pamirealinga nge a Moses ile patorong aken ve, “Lomum vava? Nge toko or me aken oa kathnga i thanga aken ru kemongare o siso i, e?”

<sup>37</sup> Ma i olal a Jisas ile riong ve, “Ine toko aka ru ilemi esal rintet i ma i opoal i.”

Ma Jisas i ria ve, “Ong es mo ong oma mun vothung aka i venen aken.”

### *Jisas i voth a Marta ome a Maria ole vel.*

<sup>38</sup> Na Jisas ome ile wainlangaere o es la. Ma o eso e rem e. Ma seng omole aka iion a Marta i nongpoo or a ile vel la. <sup>39</sup> Na Marta itein omole aka iion a Maria i es me ma i menu totho aka

---

\*\* **10:33:** Samaria angare na Judare oni silal pel.    †† **10:35:** Grik 2 Denarius.

ru a Toko Pomnga ieve tepun mo i nongpol ile pamirealing. <sup>40</sup> Aveto Marta ilemi ngo pelekpol, eneke ienga inga ako i monsi aning omanga. Mako i es a Jisas nge ma i ria i ve, “Toko Pomnga, teik posnga i lo lelpot ok, ma ini inga engek ake ru tho oma aning. Na lomum nge ake avele? Na ong ria i mo i es mo i opoal tho.”

<sup>41</sup> Aveto Toko Pomnga i olal ile riong ve, “Marta, Marta, lomum i ngo pelekpol na lomum pompom nge ur puluangare omanga. <sup>42</sup> Aveto ur omole inga aken aro i pavurvur. Na Maria i sis aka ve, i oma ur aka i sivenga, na toko e aro i eltetpot ol i a i nge avele.”

## 11

*Jisas i pamireal nge nongong.*  
*(Matiu 6:9-13; Matiu 7:7-11)*

<sup>1</sup> Nge nang omole aka Jisas i nong nge pen e aka, ma i nong ma i vus ma ile wainlanga omole i ria i ve, “Toko Pomnga pamireal them nge nongong ranga ve aka Jon i pamireal ile wainlangaere nge.” <sup>2</sup> Ma Jisas i ria or ve, “Na nge lom nongong aro ong ri vene,

‘Vovo, aro tokokoere o papomnga iom. Na lom menong e nepes aro i esu me mo i theal toko ulue angare.

<sup>3</sup> Na nge nang omole omole aro ong sung emem aning aka i pavurvur nge lemem mimiong.

<sup>4</sup> Na lomum simikal lemem vothung kerenga, eneke lemimem simikal toko alavusnga ole vothung kerenga aka o oma i a them nge.

Na mothong tova sung tongporumong a them nge.’”

<sup>5</sup> Na Jisas i ri mun a or nge ve, “Na aro ve omu e i es a ithanga e ile vel la, nge pemlik lopat, mo i ria i ve, ‘Teik, sungu tel bret or me a tho nge me, <sup>6</sup> eneke thengek i es me nge sovengalo lollonga, ma i velpol a tho nge, ave ok aning avele ako aro tho sungu i a i nge.’ <sup>7</sup> Na ithanga aka i voth a vel lemi i olal ile riong ve, ‘Mothong tova pavothal tho. Vel thekia i pupal lale, ma them e tutukre them ngo a ngoinga lale. I pavurvur aro tho plosa ol avele, mo tho sungu ur e a wong nge.’ <sup>8</sup> Na tho ria thomu, i nunganga toko aka ini thongom, aveto aro i plosa avele mo i sung ur e a wong nge, aveto aro i plosa mo i sungu ur alavusnga aka ong oror nge, tova ong nin ororo i nge, na lom maral avele.

<sup>9</sup> “Mako tho ria thomu, nin a God naro i sungu i a ong nge. Kath ur e naro God i pathengal i a wong nge. Na leng leng tomo nge a God naro i theppot vel thekia mo i opoal wong. <sup>10</sup> Eneke toko alavusnga aka o nin a God, aro i sungu i a or nge. Na toko e aka i kath ur e, aro God i pathengal i a i nge. Na toko aka i leng leng tomo nge a God, aro i theppot vel thekia mo i opoal i.

<sup>11</sup> “Om u e aka ini wain a vovo, aro ve tum i nina wong nge silang, aro wong sung eli a i nge avele. <sup>12</sup> Na aro ve i nina wong nge otel, aro ong sung telenga\* mun a i nge avele. <sup>13</sup> Thomu ini toko aka lomu vothung kerenga, aveto thomu o pavurvur aro thomu o sung sungong sivenga a tutumuere

---

\* **11:12:** O thepol telenga ia sei nge a Luk 10:19 nge pes 172.

nge. Na omu Vovo aka i voth a Pen a Urvet ile vothung i sivenga nge lomu vothung, naro i sung sungong aka i sivenga rintet aka ini Oni Riringa nge areko o nina i nge.”

*Toko pelie o ri ve Satan i opoesal a Jisas nge ile omaing.*

*(Matiu 12:22-29; Mak 3:23-27)*

<sup>14</sup> Na Jisas i wistetpot tamata kerenga aka i rises, lamako tamata kerenga i lopot a toko risesnga aken nge, mako i leng leng werer, na toko na sengre o kukuk nge. <sup>15</sup> Aveto toko pelie a or nge o ri ve, “I wistetpot tamata kerengare nge a tamata kerengare oa pomnga aka ini a Belsebul,<sup>†</sup> ile engenging.” <sup>16</sup> Na pelie mun a or nge, o ri ve o tongporum i, ma o nina i ve aro i oma pathepolong aka i pathengal or ve God i ateal i.

<sup>17</sup> Aveto Jisas ilemi mire nge olemi ma i ria or ve, “Aro ve rem omole o thomreu osivenga mo o pun werer mun pel, aro rem aken aro o vus. Na aro ve vel lemiare o pun werer mun pel osivenga, aro i vus mun. <sup>18</sup> Na aro ve Satan ilengare o siso werer mun pel osivenga, aro o voth palolo avele. Thomu o ri ve tho wistetpot tamata kerengare nge a Belsebul ile engenging. <sup>19</sup> Na aro ve i nunganga aka Belsebul i sung engenging a tho nge mo tho wistetpot tamata kerengare a tokokoere nge, anga i sung engenging aken a lomu wainlangaere nge mo o wistetpot tamata kerengare a tokokoere nge, e? Mako lomu wainlangaere o pathengal thomu aka ve, lomu riong i nunganga avele. <sup>20</sup> Aveto tho wistetpot tamata kerengare nge a

---

† **11:15:** Belsebul iion mun a Satan.

God ile engenging, na omaing aken i pathengal thomu ako God ile menong e nepes i velpol a thomu nge lale.

<sup>21</sup> “Na aro ve toko engenga tomo nge ile punonga alavusnga i theal total ile vel, aro ile ur elonga aro i ngo senu. <sup>22</sup> Aveto, aro ve toko aka ile engenging i aolonga rintet, i pun tomo nge toko aken, aro ile mong i, naro i potunpot toko aken ile punonga alavusnga aka o opoesal i, naro i kem ile ur elonga mo aro i sung sung i a ithangangaere nge.

<sup>23</sup> “Toko e aka ini thengek avele, ini lek ngarang. Na toko e aka i um tomo e tho na i wol tokokoere a tho nge me, kene avele, akennga i wistet or.

*Tamata kerenga ile lo wererong.  
(Matiu 12:43-45)*

<sup>24</sup> “Na aro ve tamata kerenga i lopot a toko omole nge, aro i esu esa a pen klangklanga mo i kath pen e aka aro i thau i nge. Ave i thopolo e avele ma i ria ienga nge ve, ‘Aro tho lo werer a lek vel la.’ <sup>25</sup> Mako i lo werer ma i thepol aka ile vel ilemi pro na ur alavusnga i ngo vengveng. <sup>26</sup> Lama i es ma i wol tamata kerenga or limai aka o kerenga rintet nge i, ma or alavusnga o rero a vel aken ma o voth nge. Mako toko aken ile mimiong i kerenga rintet nge ile mimiong nomenganga.”

*Jisas i patalor or nge lemi sivengaing nunganga.*

<sup>27</sup> Ma Jisas ile riong aken i vusu inga, mako seng omole aka a lemi pat i ripot, ma i ria i ve, “Sapase seng aka i pop wong na i pasusu wong.”

**28** Aveto Jisas i olal ile riong ve, “Ena, aveto sapase rintet areko o nongal a God ile riong na o panes i.”

*Jisas ini plong nge pathepolong omanga.  
(Matiu 12:39-42)*

**29** Na toko na seng pulua o mit kalalual a Jisas ma i ria or ve, “Toko na seng alavusnga ako o mimi ponange, ole vothung i kerenga rintet, eneke o engeng ve aro o thepol pathepolong aka ini God ile paatealing, aveto paatealing e avele aro i velpol, ini inga paatealing omole aka God i oma i a Jona nge. **30** Uneke aka i velpoltun a Jona<sup>†</sup> kene, ini paatealing a Ninive angare nge, ranga ve ini mun i, uneke aka aro i velpoltun a Toko Pomnga Itun, aro ini paatealing a toko na seng alavusnga aka o mimi ponange. **31** Na panen nge nang aka God aro i pamit tokokoere nge riong, aro seng aka ini nepes a Seba<sup>§</sup> aka ini seng Juda avele, aro i mita mo i kenkeno nge thomu Juda areko o mimi ponange teltunngomu, nge lomu nong rerong. Eneke nomenga seng aken i es nge rem melanga rintet mo i nongpol a Solomon ile riong ninenga aka God i sungu i a i nge. Na o nongpol, ponange toko omole aka i pomnga rintet nge a Solomon, i aka ru i voth, ake ini tho, aveto thomu o ri ve o nongpol tho

---

<sup>†</sup> **11:30:** Na Jona i voth a silang aolonga iopo lemi nge nang or me, lamako i velpol werer ma i panongpol Ninive angare. Na Jisas aro i voth a vuvepun lemi nge nang or me mun, lamako i plos werera na toko pulua o thopol i. Ake ini paatealing aka i pathengal tokokoere aka God i ateal a Jisas ve aro i el werer tokokoere. <sup>§</sup> **11:31:** Tenesing nge seng aka ini nepes a Seba i voth a 1 King 10:1-10.

avele. <sup>32</sup> Na e mun e ako, panen nge nang ako God aro i pamit tokokoere nge riong, aro toko Ninive angare ako or ini Judare avele, aro o mita, mo o kenkeno mun nge thomu Juda areko o mimi ponange, nge lomu nong rerong. Eneke nomenga o nongpol a Jona ile panongpolong, mako okime lelal ole vothung kerenga. Naro thomu o nongpol, ponange ur omole ako i pomnga rintet nge a Jona, i ako ru i yoth, ake ini tho, aveto thomu o ri ve o nongpol tho avele.”

*Jisas ile riong i ranga ve ini the lalainga aka i panine toko ilemi.*

(Matiu 6:22-23)

<sup>33</sup> Na Jisas i ria ve, “Na aro ve toko e i pasise the lalainga, i mothong tova i parong kineu i a wop e, na i mothong tova i pasopalu i nge alal. Aveto aro i pamona i a imei mo aro tokokoere aro o thopol iannga tova o eso a vel lemi. <sup>34</sup> The lalainga i eso a thekum na ong ate a lomum. Na aro ve thekum i nine, aro lomum alavusnga i nine. Aveto aro ve thekum i mideng, aro lomum alavusnga ia mideng. <sup>35</sup> Naro wong naktet wong, mo aro lomum i nine inga na i mothong tova ia mideng. <sup>36</sup> Na aro ve lomum alavusnga i nine, na lomum epee tie ia mideng avele, aro ong ate ur alavusnga ranga ve ini the lalainga aka i totun ur elonga aka a vel lemi.”

*Jisas i kenkentuno Parisire tomo nge pamire-alingare nge a Moses ile patorong.*

<sup>37</sup> Ma Jisas i pavus ile riong lama Parisi omole i nongpoo i mo i an tomo nge i. Mako i eso a vel

le<sup>mi</sup> ma i menu mo aro i an. <sup>38</sup> Na Parisi aken i kukuk nge ako Jisas i paut imeni avele ma i an.

<sup>39</sup> Mako Jisas i ria i ve, “Thomu Parisire o papis omu thinonga ome anonga okime mo thomu o riri a God itheki, aveto lomumu i vual nge vothung kerenga tomo nge pamumutaling. <sup>40</sup> Thomu ini pepere, God i oma ikime tomo nge ilemi. <sup>41</sup> Aveto aro thomu o sung lomu ur elonga, aka ranga ve ur aka i ngo a omu thinonga ome anonga le<sup>mi</sup> a toko le ur avelengare nge. Naro lomu omaing aken aro i pariripot thomu a God itheki, ma lomu ur elonga aro i riri mun.

<sup>42</sup> “Patong thomu Parisire, thomu o rivenga aka thomu ini toko riringa a God itheki, eneke omu aning rongolinga alavusnga aka i pota a ometa, thomu o omreu i nge epee or mule, na epee omole thomu o sungpot i a God nge mo ini lomu sungong. Aveto thomu o oma vothung vengvenga a tokokoere nge avele, na omu sagu a God avele. Na i sivenga aka aro thomu o oma vothung vengvenga a tokokoere nge, naro omu sagu a God, na o mothong tova o modop vothung sivenga aka thomu o oma i lale.

<sup>43</sup> “Patong thomu Parisire, eneke thomu o sis aka ve, aro thomu o men nge menonga mukalinga, aka toko mukalingare o men nge aka ru a Judare ole lotuonga a vel le<sup>mi</sup>. Na thomu o sis aka ve, aro tokokoere o pathokeal thomu a rem le<sup>mi</sup>.

<sup>44</sup> “Patong thomu, eneke thomu o ranga ve ini vuvepun aka tokokoere o ate i avele na o tepelos

i, aveto olemi mire nge avele, aken i paakop toko aken a God itheki.” \*\*

<sup>45</sup> Na pamirealinga omole nge a Moses ile patorong i ria i ve, “Pamirealinga, ong ri venen aken a Parisire nge, ma ong pakerenga mun iomem.”

<sup>46</sup> Ma Jisas i olal ile riong ve, “Patong thomu mun pamirealingare nge a Moses ile patorong, eneke thomu o oma a Moses ile patorong panesnga ma i klipalaltun na sivengomu o opoesal tokokoere nge patorong panesnga avele.

<sup>47</sup> “Patong thomu, eneke titovumuere olemi mire nge a God ile riong elngare, aveto o pun rin or. Na thomu mun, thomu o oma vuvepun sivenga a or nge, aveto thomu o nongal mun ole riong avele. <sup>48</sup> Mako sivengomu o pathengal ako lomumu ve, titovumuere ole vothung i sivenga, eneke o ate or ini a God ile riong elngare, aveto o nongal ole riong avele, mako o pun rin or. Na thomu o oma oa vuvepun mo i sivenga rintet, aveto thomu mun o nongal ole riong avele. <sup>49</sup> Mako God ile lemi rumong sivenga i ri vene: ‘Aro tho pake lek riong elngare tomo nge lek pakekere, a Israelre nge, mo o panongpol or nge lek riong, aveto aro o nongal or avele, mako aro o pun rin pelie na o pakerenga pelie.’ <sup>50-51</sup> Na titovumuere o pun rin a God ile riong elnga pulua ako i patea nge ulue ile pateaing ako nge a Abel ipunrinnga, mako o patopalal

---

\*\* **11:44:** Judare ole patorong i ri ve, aro ve toko e i tepelos vuvepun, aken i paakop i a God itheki. Na aro ve toko e i panes a Parisire ole vothung, i leklek mun lale, eneke ur kerenga i voth kine a olemi, ranga ve ako vung i ngo kine a vuvepun lemi, na or paini o paakop toko a God itheki.

i nge a Sekaraia ipunrinnga ako o pun rin i a sungong a lekleka na Lotu Tepun a Vel a wop lemi. Na paomelaling nge a God ile riong elnga alavusngare opunrinnga aro thomu tokokoere ako o mimi ponange aro o el paomelaling aken panen. Eneke lomu lemi rumong i ranga ve ini titovumuere ole lemi rumong.

<sup>52</sup> “Patong thomu pamirealingare nge a Moses ile patorong, eneke thomu o eltetpot vel thekia thepnga lale aka i es a God ile mire elnga nge. Na sivengomu thomu o eso nge avele. Na thomu o mit roal tokokoe areko o ri ve o eso a lemi.” <sup>53</sup> Na Jisas i lo lelpot vel aken, mako pamirealingare nge a Moses ile patorong tomo nge Parisire ole mi kerenga rintet nge i, mako o nin ororo i mo i ri nge ur pulua. <sup>54</sup> Eneke o sis aka ve, aro i ripot riong aka i vengveng avele mo o pamita i nge riong.

## 12

*Jisas i ri ve o mothong tova lomu apaltet, eneke ur alavusnga aro i ngo pat panen.*

*(Matiu 10:26-27)*

<sup>1</sup> Na tokokoere o veliloalo pel ma o pom rintet ma o tepetuntun osivenga. Ma Jisas i panakal ile wainlangaere ve, “Thomu o nakalal thomu nge pokonongare aka ini Parisi ole le apaltetong aka i ranga ve ini yis aka o parong posngati a bret nge, aveto i pawima pen elonga, aro vene mo ole pamirealing a thomu nge, aro i paaolonga lomu vothung kerenga. <sup>2</sup> Na vothung aka i ngo kine, aro i ngo pat panen, na riong aka i ngo kine, aro panen aro or alavusnga ole mi mire nge. <sup>3</sup> Na lomu riong alavusnga aka thomu o ria i nge

pemliknga, panen aro o nongpol i nge eranga, na lomu riong alavusnga aka thomu o ri ngunngun a engomu nge a vel lemi, panen aro o panongpol i a rem lemi pat.”

*Jisas i ri ve o mothong tova o ngange nge toko ulue anga, aro thomu o ngange nge a God.*  
*(Matiu 10:28-31)*

<sup>4</sup> Na Jisas i ria ile wainlangaere ve, “Tho ria thomu thengengekre, o mothong tova o ngange nge areko o pun rin numu peti, aveto aro o oma ur e avele mun a thomu nge. <sup>5</sup> Aveto aro tho pathengal thomu nge toko aka aro thomu o ngange nge i. Aro thomu o ngange nge a God, eneke i pavurvur aka aro i pun rin toko ini peti, na nge ile engenging i pavurvur aka aro i asesi a won sesenga nge aka aro ile vusonga avele. I nunganga aro thomu o ngange nge i. <sup>6</sup> Na tokokoere o ol men posnga or lim nge toea or aini, ranga ve or ini ur polpolnga. Aveto God ilemi simikalu men omole e avele. <sup>7</sup> Na God ilemi mire senu nge thomu, i pavurvur nge poungomu thoi omole omole titalnga. Na thomu o mothong tova o ngange nge tokokoere, eneke thomu toko omole omole o aolonga nge men puluanga a God itheki.”

*Mothong tova lom maral ve ong ini a Krais ile toko.*  
*(Matiu 10:32-33)*

<sup>8</sup> Na Jisas i ria ile wainlangaere ve, “Tho ria thomu, aro ve toko e i ripot a pulua oa lemimi na i ri ve, ‘Tho ini a Jisas ile’ aro Toko Pomnga Itun aro i ria God ile enselre ve, ‘Toko aken ini lek.’ <sup>9</sup> Aveto aro ve toko e ikime lelaltun tho, aro

Toko Pomnga Itun aro ikime lelaltun mun toko aken a God ile enselre otheki. <sup>10</sup> Toko e ako i riong kerenga nge a Toko Pomnga Itun, panen i pavurvur aka aro God ilemi simikal ile vothung kerenga aken. Aveto toko e ako i kelelal a God Ioni Riringa, panen aro God ilemi simikal ile vothung kerenga aken avele.

<sup>11</sup> Nge wop lemi aka tokokoere o pamit thomu nge riong, aka a Judare ole lotuonga a vel lemi eve a gavman ole mukalingare otheki, thomu o mothong tova lomumu rit nge lomu lelong aka aro thomu o ri. <sup>12</sup> Eneke nge wop lemi aka aro thomu oma lelong, God Ioni Riringa aro i opoesal thomu nge riong aka aro thomu o ria or nge.”

*Riong agelalnga nge toko le urnga aka ilemi rum a God avele.*

<sup>13</sup> Na toko omole aka ru a pulua oa lemimi i ri a Jisas ve, “Pamirealinga, ria teik pomnga mo aro i omreu emem vovo aka i rin lale ile ur elonga mo i sungu lek.”

<sup>14</sup> Na Jisas i olal ile riong ve, “Teik, lek engeng-ing avele aka aro tho omreu ur areken a thomu paini nge.” <sup>15</sup> Lama Jisas i ria or alavusnga ve, “Thomu o nakalal thomu na o mothong tova o theseal, eneke i pavurvur aro thomu o el mimiong nge lomu ur le pomong avele.”

<sup>16</sup> Na i ri riong agelalnga a or nge ve, “Toko omole aka i voth kene ia ometa i pavelpol wit monnga pulua. <sup>17</sup> Lama i ria isivenga ma i ri ve, ‘Pen e aka i pavurvur avele aka aro tho parong lek wit monnga nge. Naro tho oma vava?’

<sup>18</sup> “‘Aro tho oma vene, aro tho teu lek wit a velre mo aro tho ari mos or alavusnga mo i aalonga. Naro tho parong lek wit monnga nge, tomo nge lek ur elonga. <sup>19</sup> Mako aro tho ria sivengek ve, “Lek ur elonga pom rintet ako i pavurvur nge tovu po pulua. Naro tho thau ol tho nge omaing naro tho an ol inga, na tho thin ol inga, na lemi sivengaing aalonga ako aro i voth a tho nge.””

<sup>20</sup> “Aveto God i ria i ve, ‘Wong ini ngongong, pan pemlik aro tho eltetpot lom mimiong. Lamo toko e ako aro i el lom ur elonga ako ong krim tuntun i.’”

<sup>21</sup> Na Jisas i patopalal ile riong vene, “I vene re ako nge tokokoe areko o parong velilo ole ur elonga na o krim tuntuno i, aveto or ini toko le ur avelengare a God itheki.”

*God i theal senu itutunre.*  
*(Matiu 6:25-33)*

<sup>22</sup> Lamako Jisas i ria ile wainlangaere ve, “Na tho ria thomu, o mothong tova lomumu rit nge omu aning ako thomu o el mimiong nge. Na o mothong tova lomumu rit nge lomu teunong ako thomu o teun i a numu peti. <sup>23</sup> Na mimiong i aalonga nge aning, na toko ini peti i aalonga nge ile teunong. <sup>24</sup> Thomu o thopol vet kakrotre, aka o o won monnga avele na o veliloal won monnga avele, na ole vel avele, aka aro o parong oa aning nge. Aveto God i sung aning a or nge. Na thomu tokokoere o aalonga nge menre aka ro a God itheki. <sup>25</sup> Aro ve toko e ilemi rit nge mimi lolloing, i pavurvur aro ile lemi ritong aken aro i pokespot ile mimiong nge nang omole avele.

**26** Na mimiong pokespotnga nge nang omole, ini ur posngati, aveto thomu o pavurvur omanga avele. Maken o mothong tova lomumu rit nge ur relnga pelie.

**27** “Thomu o thopol vet ine won punpolngare ole mitong, ako o um avele na o oma ole teunong avele. Aveto tho ria thomu, Solomon ia nepes a malmaling i pavurvur nge won punpolnga omole ia malmaling avele. **28** Na God i pateun pilil polpolnga aka i voth ponange, na i penthal lelken, eneke tokokoere o ongtuna i. Na aro ve God i pateun pilil polpolnga aken, aro i pateun rintet senu thomu. Lomu lemioong a God nge kene i posngaingati. **29** Na o mothong tova lomumu rit nge ur kathnga aka aro thomu o an i, na o thin i. **30** Eneke toko ulue angare aka o lemio a God nge avele, or alavusnga olemi rit nge aning na thinong, aveto omu Vovo ilemi mire nge thomu, aro ve thomu o el ur areken avele, aro thomu o mimi senu avele. **31** Aveto aro lomumu rum nge a God ile menong e nepes, naro i sung ur areken a thomu nge.”

*Jisas i patalor nge aka aro o pango ur pulua a Pen a Urvet.*

**32** Na Jisas i ria ile wainlangaere ve, “Tho theal total thomu ranga ve ini sipsipre, na o mothong tova o ngange, eneke omu Vovo ilemi sivenga ve aro i sungu ile menong e nepes a thomu nge. **33** Thomu o sungu lomu ur elonga a toko le ur avelengare nge, mo lomu ur sivesivenga aka ro a Pen a Urvet aro i penthal avele, eneke aro i ngo nge umtun le ngoinga aka aro i minra avele. Naro

lomu ur sivesivenga aro i vus avele, eneke toko kemonga aro i eso nge avele, naro inan i ariris i avele. <sup>34</sup> Aro thomu o oma venen aken, eneke lomumu i voth nge pen ako lomu ur sivenga i ngo nge.

*Jisas i ria ile wainlangaere ve aro o thealal.  
(Matiu 25:1-13; Mak 13:33-37)*

<sup>35</sup> “Na thomu o teun engeng omu teunongre, mo thomu o monsi nge umong, naro lomu the lalainga aro i to <sup>36</sup> ranga ve ini umongare ako o men tetal ole mukalinga aka i lo werer nge sungaling a aning, aro ve i velpol a vel thekia, aro o theppot vel thekia nge i viri viri. <sup>37</sup> Na sivengaing i voth nge umongare aka ole mukalinga i thopol or aka o the inga, makola i velpol. Tho ria thomu, aro i eltetpot ile tekruk seltunnga naro i ria ile umongare ve aro o menu naro i sung aning a or nge. <sup>38</sup> Na aro ve i velpol nge pemlik lopat, ma i thopol ile umongare aka o monsi lale, aro sivengaing i voth nge umonga areken. <sup>39</sup> Naro lomumu rum lek riong ake, aro ve vel tokoninga ilemi mire nge nang aka toko keminga aro i es me, aro i mit roal toko keminga mo i eso a ile vel lemi avele. <sup>40</sup> Na thomu mun, thomu o thealal, eneke Toko Pomnga Itun aro i es me nge nang aka lomumu rum ve aro i velpol nge, kene avele.”

*Thomu mukalingare o oma senu, i mulal aka aro omu Pomnga i lo werer.  
(Matiu 24:45-51)*

<sup>41</sup> Na Pita i nin a Jisas ve, “Toko Pomnga, ong ri riong agelalnga aken a them nge eve a toko alavusngare nge?”

**42** Na Jisas i olal ile riong ve, “Anga ini toko umonga ako ile lemi rumong i sivenga na i nongal nge ile mukalinga ile riong, e? Ini toko aka ile mukalinga i ria i ve, aro i theal senu ile vel lemiare naro i sung aning a toko umongare nge, nge nang aka i paateal i a or nge. **43** Na aro ve ile mukalinga i lo werer na i thopol aka toko aken i panes senu ile riong, aro i oma vothung sivenga nge toko umonga aken. **44** Tho ri nunganga a thomu nge, aro i sung omaing a toko umonga aken nge mo aro i theal ile ur elonga alavusnga. **45** Aveto aro ve toko umonga aken i ria iengga nge ve, ‘Lek mukalinga i voth palolo naro i lo werer viri viri avele.’ Mako i siso toko umongare tomo nge seng umongare, na i an na i thin thei engenga, mako itheki vaisis. **46** Na aro ve ile mukalinga i lo werer nge nang aka toko umonga ilemi rum ile mukalinga ile velpoling nge avele, aro ile mukalinga aken aro i paomelal rintet i naro i pasong i a toko kerengare ole pen.

**47** “Toko umonga aka ilemi mire nge ur aka ile mukalinga i sis ve aro i oma i, aveto i monsi nge ur aken omanga avele, aro i el paomelaling aolonga rintet nge. **48** Aveto toko umonga aka ilemi mire nge ur aka ile mukalinga i sis ve aro i oma i, kene avele, na i oma vothung kerenga, aro i el paomelaling posngati. Na aro ve God i sung ur pulua a toko e nge, aken aro God i engeng ve aro toko aken i olal werer i, nge ur pulua. Na aro ve God i sung ur pulua rintet a toko e nge, aken aro God i engeng ve aro toko aken i olal werer i, nge ur pulua rintet.”

*Jisas ile pamirealing i pakerenga tokokoere ole menong sivenga.*

(Matiu 10:34-36)

<sup>49</sup> Jisas i ria or ve, “Tho velpol mo aro tho sungu a God ile won sesenga a tokokoere nge ake ru a ulue. Na lemk ako ve, won sesenga aken i anlel lale. <sup>50</sup> Naro matheong i seltun tho ranga ve ini thei ako i seltun toko ako i el paninuong. Na lemk kerere, i pavurvur ako aro matheong areken i vus.\* <sup>51</sup> Lomum rum ako ve, tho velpol mo aro tho pavelpol lemi moring a ulue ake? Avele, aro tho omreu tokokoere. <sup>52</sup> Na i patea ponange na evelengna ol, ako a vel omole toko or lim ole ngarang pel naro or me oa epee na or aini oa epee na or aini ole ngarang or me, eneke pelie olemio a tho nge, na pelie avele. <sup>53</sup> Avovoengaere aro ole ngarang otutunre, naro otutunre ole ngarang otitemaere. Na aninaengaere ole ngarang otutun sengengaere, na otutun sengengaere ole ngarang oninaere. Na sengre ome otiteviere aro ole ngarangtun pel.”

*Tokokoere o ate senu nge ur ako God i oma i, kene avele.*

(Matiu 16:2-3)

<sup>54</sup> Na Jisas i ria toko puluangare ve, “Thomu o thopol vit theki ako i esa me, na thomu o ate i ma o ri ve, ‘Aro vit i mol.’ Mako vit i molu. <sup>55</sup> Na thomu o rov thue ako i thu me, na thomu o ate aki ini nang po, ma o ri ve, ‘Aro pen i velvel.’ Mako i velpol ma i velvel. <sup>56</sup> Thomu ini toko le

---

\* **12:50:** Matheong areko i seltun a Jisas ini matheong aki i el i nge ile rinong.

apaltetongare, thomu o thopol ulue na sepsa ma o ate ur ako aro i velpol. Na thomu o thopol lek omaing, aveto numu plong ve aro o ate ur ako God aro i oma i, nge wop lemi ake.”

*Pavengveng tel riong tomo nge a God aka aro i pamit ong nge riong.*

(Matiu 5:25-26)

<sup>57</sup> Jisas i ria or ve, “Numu plong ve aro thomu o panes vothung vengvenga. <sup>58</sup> Aro ve toko e i ri ve i pamit ong nge riong, na i wol ong a rionga a vel, aro ong pavengveng rum so lom riong tomo nge i. Aro vene mo, aro i ti wong a rionga a vel la, naro riong nongpolnga aro i sung wong a lososthonga imeni, naro i paeso wong a mang a midenga lemi. <sup>59</sup> Tho ria wong, aro wong voth nge, i pavurvur aka aro, sivengom, wong pavus umtun aka o paateal i a wong nge.”

## 13

*Aro ve toko ikime lel ile vothung kerenga avele, aro i rin.*

<sup>1</sup> Na nge wop lemi aken tokokoe pelie o voth, ma o ritet a Jisas nge tokokoe Galili angare, aka o oma ole sungong a God nge, mako Pailat ile punongare o pun rin or. <sup>2</sup> Na Jisas i olal ole riong ve, “Lomumu ve tokokoe areko o rin venen aken, eneke ole vothung kerenga i mukal nge Galili alavusngare? <sup>3</sup> Avele, tho ria thomu, aro ve kimomu lel lomu vothung kerengare avele, aro o pun rin rin mun thomu alavusnga. <sup>4</sup> Na lomumu rum nge toko or mule pa omole pothoi or limme aka o voth a Jerusalem a wop epee aka o apet i

ve ini Siloam. Na vel roronga i mata a or nge, mako o rin rin. Na lomumu vava? Lomumu ve ur kerenga ako i velpoltun or i pathengal thomu ve, ole vothung kerenga i mukal nge Jerusalem alavusngare? <sup>5</sup> Avele, tho ria thomu, aro ve kimomu leltun lomu vothung kerengare avele, aro thomu alavusnga o rin rin mun venen aken.”

*Riong agelalnga nge pupos ako i mon avele, i ranga ve ini toko aka i eksing ile mimiong avele.*

<sup>6</sup> Na Jisas i ria riong agelalnga a or nge. Na i ria ve, “Toko omole aka i o pupos a ia ometa. Lamako i sis ve aro i kath pupos aken monnga. Aveto i thopolon monnga e avele. <sup>7</sup> Mako i ria ia ometa thealnga nge ve, ‘Thopol, tovu po or me i vus lale, aka tho kath pupos ake monnga, aveto tho thopol e avele. Na tetela i mo i pua. Eneke i an polpol ulue.’

<sup>8</sup> “Aveto ia ometa thealnga i olal ile riong ve, ‘Toko Pomnga, aro i mit tel venen, nge tovu po omole mun aro tho to kalalual i mo tho parong vareo tan pelie nge. <sup>9</sup> Na aro ve i mon nge tovu po aken aro i sivenga, na aro ve avele aro o tetela i mo i pua.’ ”

*Jisas i pamimi werera seng aka ikime loo nge nang rialonga.*

<sup>10</sup> Nge nang rialonga omole Jisas i pamireal tokokoere a Judare ole lotuonga a vel lemi. <sup>11</sup> Na seng omole aka i voth aka tamata kerenga i voth a i nge, i pavurvur nge tovu po or mule pa omole pothoi or limme. Na tamata kerenga aken i oma i ma ikime i loo, ma i pavurvur aro i pavengveng ikime avele. <sup>12</sup> Na Jisas i thopol seng aken, ma

i lenga i, ma i ria i ve, “Wong seng aken, num multhanga i vus re aken.” <sup>13</sup> Na i ronga imeni alaini a i nge, na a ur e avele na seng aken ikime i vengveng werer, ma i risea God iion roro.

<sup>14</sup> Aveto mukalinga nge Judare ole lotuonga a vel aken, ilemi klingtun a Jisas, eneke i pamimi werera seng ako nge nang rialonga. Mako i ria tokokoere ve, “Nang or limae aka i voth aka aro te um nge, naro thomu o es mo o pamimi thomu nge nang elonga, aveto nge nang rialonga avele.”

<sup>15</sup> Mako Toko Pomnga i olal ile riong ve, “Thomu ini le apaltetongare, nge nang rialonga thomu omole omole o kekrispot lomu bulmakau ome donki mo o ti or a thei mo o thin. <sup>16</sup> Na seng ake ini a Abraham itevinga aka tamata kerenga i kintuntun i, i pavurvur nge tovu po or mule pa omole pothoi or limme. I vova aka aro tho kekrispot i nge nang rialonga avele, e?”

<sup>17</sup> Na ile riong olalnga i palemara ile ngarangre. Na tokokoere olemi sivenga nge ile omaing a urvet aka i oma i.

*Jisas ile riong agelalnga nge won monnga aka i posnga rintet.*

*(Matiu 13:31-32; Mak 4:30-32)*

<sup>18</sup> Lamako i nina or ve, “God ile menong e nepes i ranga ve ini neke? Naro tho patongrum ol i nge uneke ol e, mo aro lomumu mire nge, e? <sup>19</sup> God ile menong e nepes i ranga ve ini won monnga, aka i posnga rintet aka o apet i ve ini ‘Mastet’. Na toko omole i ela i mo i o i a ia ometa. Ma i metaplo, makola i velpol ini won aolonga aka menre o oma ole klu a imeninire nge.”

*Jisas ile riong agelalnga nge yis ako o parong posngati a bret nge, aveto i pawima pen elonga.*  
*(Matiu 13:33)*

<sup>20</sup> Na Jisas i nina mun or ve, “Aro tho paton-grum a God ile menong e nepes e ur nekenga ol e, mo aro lomumu mire nge, e? <sup>21</sup> I ranga ve ini yis ako seng omole i parong posngati a plaua aka i mathenga i pavurvur nge 20 kilo lemi, mako i pawima pen elonga.”

*Toko pelie inga aro o eso a God ile menong e nepes nge lok thekia aka i tunti.*

<sup>22</sup> Na Jisas i es nge ile esong a Jerusalem ma i patoral tokokoere a rumrem areko i es nge. <sup>23</sup> Na toko e i nina i ve, “Toko Pomnga, aro ini toko pelie inga aka aro o el mimiong aka aro ile vusonga avele?”

Na Jisas i ria or ve, <sup>24</sup> “Aro thomu o um engeng mo aro o eso nge vel thekia aka i posngati, eneke toko pulua o engeng ve aro o eso nge, aveto o pavurvur avele. <sup>25</sup> Na nge wop lemi aka vel tokoninga i mita ma i pupal bibim vel thekia, aro thomu o mit a lalanga mo o sis ve aro o eso nge, mo o lenga ve, ‘Mukalinga, thepu vel thekia nge them.’

“Aveto aro i olal lomu riong ve, ‘Lemik mire nge thomu avele.’

<sup>26</sup> “Ma aro thomu olal ile riong ve, ‘Nomenga them an, na them thin tomo nge wong, na wong patoral them a lemem rebo.’

<sup>27</sup> “Aveto aro i olal mun lomu riong ve, ‘Lemik mire nge thomu avele. Thomu alavusnga lomu vothung kerenga aro thomu o lo lelpot tho.’

**28** “Naro thomu o thopol ol a Abraham, Aisak, Jekop na God ile riong elngare ako o men nge a God ile menong e nepes, aveto aro thomu o voth a lalanga. Naro thomu o wal na o atitet womu pupo, eneke thomu o rov sisisong aolonga. **29** Naro tokokoere o plosa nge rem elonga ake ru a ulue, naro o eso a God ile menong e nepes mo o men nge aning aolonga. **30** Na toko Israel pelie ako o mukal tel nge a God ile riong nongpolnga aro ole ol a rumongaling, naro o eso a God ile menong e nepes avele, aveto toko pelie ako o rumongal nge a God ile riong nongpolnga, aro ole ol a mukaling, naro o eso ol a God ile menong e nepes lemi.”

*Jisas ilemi esal Jerusalem angare.  
(Matiu 23:37-39)*

**31** Na nge wop lemi aken Parisi pelie o es a Jisas nge na o ria i ve, “Lolelpot pen ake mo es a pen relnga e, eneke Herot i sis ve aro i pun rin wong.”

**32** Na Jisas i olal ole riong ve, “Thomu o es la mo o ria toko le apaltetonga aken ve, ‘Aro tho wistetpot tamata kerengare naro tho pamimi tokokoere, nge nang pelie i pavurvur ako aro tho pavus lek omaing nge nang ako God i ateal i.’ **33** Aveto aro tho es nge lek esong ponange na lelken na lela, eneke i sivenga ako aro God ile riong elngare aro o rin inga a Jerusalem, na nge rem ol e avele.

**34** “Jerusalem angare, Jerusalem angare patong thomu, God i pake ile riong elngare a thomu nge, aveto thomu o so rin or, na i pake ile tokokoere a thomu nge, aveto thomu o pun rin or nge um. Nang pa pova ako tho sis ve aro tho rekolo thomu

a tho nge me, ranga ve ini vareo ninanga ako i rekolo itutunre a ini giniti thewo, aveto numu plong. <sup>35</sup> Naro lomu velre aro ilemi meninin na tho ri nunganga a thomu nge, aro thomu o thopol tho avele, i pavurvur nge nang ako aro thomu o ria tho ve, ‘Sapase toko aka i velpol, aka Toko Pomnga i sung ile engenging a i nge.’ ” \*

## 14

*Jisas i pamimi werer toko omole nge nang rialonga.*

<sup>1</sup> Nge nang rialonga omole, Jisas i eso a Parisire ole mukalinga omole ile vel, mo aro i an tomo nge i. Na tokokoere o thopolrum senu i nge ile omaing. <sup>2</sup> Na toko aka ini peti elonga i wim wim, i es ma i mitu a Jisas itheki lemi. <sup>3</sup> Na Jisas i nina pamirealingare nge a Moses ile patorong, tomo nge Parisire ma i nina or ve, “Nge a Moses ile patorong, i pavurvur aka aro te pamimi toko nge nang rialonga eve avele?” <sup>4</sup> Aveto o men porengreng. Na Jisas i krima toko aken ma i pamimi werera i, ma i pake i la.

<sup>5</sup> Lama i ria or ve, “Aro ve omu e itun eve ile bulmakau i matu a volo lemi nge nang rialonga, aro wong monteta i viri viri nge nang rialonga eve avele?” <sup>6</sup> Aveto o pavurvur aro o olal ile ninong avele.

*I sivenga aka aro toko i paruru isivenga.*

<sup>7</sup> Na Jisas i ate tokokoe pelie aka o seral nge menonga mukalinga. Mako i ria riong agelalnga

---

\* **13:35:** Buk Song 118:26

a or nge ve,<sup>8</sup> “Aro ve toko e i nongpoo wong nge sungaling a aning, wong mothong tova seral nge menonga mukalinga, eneke aro ve i nongpoo toko aka i pomnga nge wong, na i velpol,<sup>9</sup> aro toko aka i nongpoo thomu paini aro i es me mo i ria wong ve, ‘Sungu menonga ake a i nge.’ Naro lom mara na wong men ol nge menonga rumongalinga.<sup>10</sup> Aveto aro ve o nongpoo wong nge aning, aro wong men nge menonga rumongalinga. Mako toko aka i nongpoo wong aro i es me mo i ria wong ve, ‘Teik, es me mo men a mukaling.’ Aro i papomnga wong a tokokoe areko o es nge aning otheki.<sup>11</sup> Na tho ri venen aken, eneke tokokoe areko o papomnga osivenga, aro God i paruru or. Na tokokoe areko o paruru osivenga, aro God i papomnga or.”

<sup>12</sup> Lama Jisas i ria aning tokoninga ve, “Nge nang aka wong oma aning, mothong tova nongpoo thongongomre eve titeumre eve lom netre eve toko le ur pomngare, eneke aro o nongpoo werer wong mo wong el om aning olalnga.<sup>13</sup> Aveto nge nang aka ong oma aning, aro wong nongpoo toko le ur avelengare tomo nge toko kime lotorngare tomo nge toko eve lilngare, tomo nge toko theki prosngare,<sup>14</sup> naro God i oma senu nge wong, eneke o pavurvur aro o olal werer om aning avele. Naro God i olal werer i a wong nge, nge nang aka aro toko vengvengare o plos werera nge rinong.”

*God i nongpoo tokokoere nge ile menong e nepes, ranga ve ini toko aka i nongpoo tel Israelre*

*nge ia aning aolonga.*

(Matiu 22:2-14)

<sup>15</sup> Na toko omole ako i men tomo nge or nge aning, i nongpol a Jisas ile riong ma i ria i ve, “Sapase tokokoe areko o men nge aning ako a God ile menong e nepes lemi.”

<sup>16</sup> Na Jisas i olal ile riong ve, “Na toko omole i monsi nge aning aolonga na i nongpoo toko pulua. <sup>17</sup> Na nge nang aka i monsi ia aning lale, i pake ile toko umonga mo aro i ria tokokoere aka i nongpoo or mo i ria or ve, ‘O es me, ur alavusnga tho monsi i lale.’

<sup>18</sup> Aveto or alavusnga oni plong. Na toko teltelnga i ria vene, ‘O, ponange re ake tho ol ulue epee naro tho es mo tho thopolrum i. Tho pavurvur aro tho es wot avele.’

<sup>19</sup> Na toko mun e i ria vene, ‘O, ponange re ake tho ol bulmakau or mule aka ini lek umongare, naro tho es mo tho tongporum vet or nge omaing. Tho pavurvur aro tho es wot avele.’

<sup>20</sup> Na toko mun e i ria vene, ‘O, ponange re ake tho peange. Tho pavurvur aro tho es wot avele.’

<sup>21</sup> Na toko umonga aken i lo werer a ile mukalinga nge, na i ritet i nge or alavusnga ole riong. Na aning tokoninga ilemi kling rintet na i ria ile toko umonga ve, ‘Paviripot nge sovengalo elonga aka a rem pomnga na wong wola werer toko le ur avelengare tomo nge toko kime looloon-gare tomo nge toko eve lilngare tomo nge toko theki prosngare.’

<sup>22</sup> Lamako ile toko umonga i ria i ve, ‘Toko Pomnga tho oma ur alavusnga aka wong ri nge, aveto pen pelie aken ru rongan i voth.’

<sup>23</sup> Lama aning tokoninga i ria ile toko umonga ve, ‘Espot a rumrem a sovengalo tomo nge ometa a sovengalo na ri engeng tokokoere mo aro o eso a lek vel lemi mo i vual. <sup>24</sup> Na tho ria wong, tokokoe areko tho nongpoo tel or, e avele aro i an rum ok aning aolonga ako tho monsi i.’”

*Toko aro ilemi rum senu tel nge uneke ako aro i mothong i, mo i velpol ini a Jisas ile wainlanga.*  
*(Matiu 10:37-38)*

<sup>25</sup> Na nge nang omole toko puluanga rintet o es tomo nge a Jisas, na Jisas i eksinga ma i ria or ve, <sup>26</sup> “Na toko e ako i sis ve aro i panes tho, aro ile asaguong nge tho, aro i aolonga rintet nge ile asaguong ako nge itema, inina, iewo sengenga, itutunre, ititeinre, ilulunre na isivenga ile mimiong mun, aro vene mo i velpol ini lek wainlanga avele. <sup>27</sup> Na toko e ako i panes tho, aveto ini plong ve aro i potun isivenga ia won ngoronga, toko aken i pavurvur aro i velpol ini lek wainlanga avele.

<sup>28</sup> “Na aro ve omu e ako ilemi rum nge vel omanga aro i men tel mo i oma senu tel vel olonga mo ilemi mire nge ile umtun, i pavurvur ako aro i pavus vel aken eve avele. <sup>29</sup> Na toko e aro ve i oma senu tel vel olonga avele, aro i patea vel aringa, aveto i pavurvur aro i pavus i avele. Naro tokokoere o thopol ile vel aringa naro o ri silil i. <sup>30</sup> Naro o ria ve, ‘Toko aken i patea vel aringa, aveto i pavurvur aro i pavus i avele.’

<sup>31</sup> “Na aro ve nepes omole i es tomo nge ile toko punonga or 10,000 mo aro i pun tomo nge nepes ako i estun i nge punong tomo nge ile toko

punonga or 20,000 aro i men tel mo ilemi rum senu tel ile punongare, o pavurvur nge punong eve avele. <sup>32</sup> Na aro ve o pavurvur avele, aro i pake ile riong elnga mo i sangpolo nepes aken rongan i voth melanga naro i nina i ve, ‘Aro them oma neke mo te voth lemi moring?’ ” <sup>33</sup> Na Jisas i patopalal ile riong na i ri ve, “I venen re aken nge thomu. Aro ve omu e i sis ve aro i velpol ini lek wainlanga aro i mothonglelu ur alavusnga ako ini ile.”

*Toko aka i panes senu a Jisas avele i ranga ve ini au aka i mosisen avele.*  
*(Matiu 5:13; Mak 9:50)*

<sup>34</sup> Na Jisas i ria mun or ve, “Au ini ur sivenga, aveto aro ve imosisennga i vus, i pavurvur aro i mosisen werer ol avele. <sup>35</sup> Au aka imosisennga avele ol, i pavurvur aro i opoal ur e avele. Aro te asespot i.

“Na aro ve toko e i sis ve aro ilemi mire nge lek riong, mo i sivenga aka aro i ta senu itlenga nge lek riong ake.”

## 15

*Riong agelalnga nge sipsip omole aka i penthal.*  
*(Matiu 18:12-14)*

<sup>1</sup> Na nge nang omole, tokokoe areko or ini umtun elngare tomo nge areko ole vothung kerenga o es mo o nongpol a Jisas ile riong. <sup>2</sup> Aveto Parisire tomo nge pamirealingare nge a Moses ile patorong o ri pompom nge a Jisas na o ri ve, “Toko ake i vova ake i nongpoo tokokoe areko ole vothung kerenga ma i an tomo nge or, e?”

<sup>3</sup> Lama Jisas i ri riong agelalnga a or nge, ma i ri ve, <sup>4</sup> “Aro ve omu e ile sipsip or mule pa mule i voth, na aro ve omole i penthal, aro i oma i va? Aro i mothonglelu tel sipsip or mule pa limpenel pothoi or limpenel a pen lalanga naro i es mo i ortet sipsip omole ako i penthal, i pavurvur ako aro i thopoloi i. <sup>5</sup> Ma nge ako i thopoloi i, na ilemi sivenga rintet na i potuna i. <sup>6</sup> Na i lo werer a ile vel. Lamako i leng veliloalo ithangangaere na i ria or ve, ‘Aro lemire sivenga, eneke tho thopoloi werer lek sipsip aka i penthal.’ <sup>7</sup> Na tho ria thomu, i vene re aka a Pen a Urvet, olemi sivenga rintet nge toko omole aka ikime lelal ile vothung kerenga, na lemi sivengaing aken i aolonga rintet nge lemi sivengaing aka nge toko or mule pa limpenel pothoi or limpenel aka ole vothung i sivenga.

### *Riong agelalnga nge umtun aka i penthal.*

<sup>8</sup> “Na aro ve seng omole ile umtun or mule i voth na omole i penthal, aro i oma i va? Aro i pasise the lalainga, naro i athe ile vel, naro i the senu senu a pen elonga i pavurvur aka la, i thoai. <sup>9</sup> Na nge aka i thoai i lale, lamako i leng veliloalo ithangangaere na i ria or ve, ‘Aro lemire sivenga, eneke tho tho werera lek umtun aka i penthal.’ <sup>10</sup> Na tho ria thomu, i vene re aka nge a God ile enselre, aka olemi sivenga rintet nge toko omole e aka ikime lelaltun ile vothung kerenga.”

### *Riong agelalnga nge wainlanga aka i penthal.*

<sup>11</sup> Jisas rongan i ri na i ri mun ve, “Toko omole i voth aka itun or aini. <sup>12</sup> Na itun opisoinga i ria itema ve, ‘Vovo, ong rin rongan, aveto tho sis aka

ve, aro wong thomreu lom ur elonga na sungu lek a tho nge.'

<sup>13</sup> "Na nang pelie i lutetu na itun opisoinga i ela ile ur elonga na i tepolal i nge umtun, mako i lo lelpot ole rebo, na i es nge rem melanga. Na nge rem aken i pavus polpol ile umtun nge magoning. <sup>14</sup> Ma ile umtun i vus lale, ma mesi aolonga i velpoltun rem aken ma i men polpol na ia aning avele. <sup>15</sup> Mako i es mo i ri ve i velpol ini umonga nge toko omole ako nge rem aken. Na toko aken i pake i mo i paan ile kiere.\* <sup>16</sup> Aveto aning ako o sungu i a i nge i aolonga avele, na mesipun i ma i pavurvur ako aro i an kiere oa aning, aveto toko e avele i sung ur e a i nge.

<sup>17</sup> "Lamako lemi rumong sivenga i velpol werer a i nge, ma i ria isivenga nge ve, 'Ok vovo ile toko umonga alavusngare osa pup nge oa aning, na oa aning uluo i ngo, aveto tho voth ake, na toth aro tho rin nge mesipuniong. <sup>18</sup> Aro tho plosa mo tho lo werer a vovo nge, naro tho ria i ve, "Vovo, tho oma vothung kerenga nge a God tomo nge wong. <sup>19</sup> Na tho ini toko sivenga avele, aka aro wong apet tho ini tum. Oma lom vothung a tho nge ranga ve ini lom toko umonga." ' <sup>20</sup> Mako i plosa ma i lo werer a itema nge la.

"Ave rongan i voth melanga nge itema ile vel, na itema i thopol i melanga ma ilemi esal i, ma i thopot a i nge, mako i rekukalo i ma i angongoalo i.

---

\* **15:15:** Judare o pavothal nge kie annga na theal tetalnga, aveto toko aken kene mesipun rintet i, mako i el inga omaing aken.

**21** “Na itun i ria i ve, ‘Vovo, tho oma vothung kerenga nge a God tomo nge wong. Na tho ini toko sivenga avele, aka aro wong apet tho ini tum.’

**22** “Aveto itema i ria ile umongare ve, ‘Paviri, ela tekruk seltunnga sivenga rintetnga mo seltuna i nge. Na pateunu paspas a imeni. Na pateunu i nge esonga a ieve. **23** Na ela bulmakau tun sivenga rintetnga mo pun rin i. Naro lemir sivenga nge aning aolonga. **24** Eneke tuk ake i ranga ve i rin lale, aveto i mimi werer, na i penthal, aveto i lo werer.’ Mako o patea ol nge aning.

**25** “Na itun apamukong i oma a ometa lemi. Na nge ile lo wererong i es totho a vel ma i nongpol voing na sesing. **26** Mako i lenga toko umonga omole ma i nina i ve, ‘O oma neke?’ **27** Na i olal ile ninong ve, ‘Teum i lo werer, na tomom i pun rin bulmakau tun sivenga rintetnga omole, eneke teum i lo werer senu inga.’

**28** “Na itun apamukong ilemi kling ma i mothong esoong a vel lemi. Na itema i espot a i nge ma i ri riong mosnga a i nge, mo aro i eso a vel lemi. **29** Aveto i ri werer a itema nge ve, ‘Thopol, nge tovu po pulua tho um a wong nge ranga ve ini toko umonga, na tho nong sirik lom riong e avele. Aveto wong sung meme tun e a tho nge avele, mo aro tho oma aning tomo nge thengengekre. **30** Aveto tum kerenga ake i pavus lom ur elonga tomo nge seng sovengalo angare. Na nge ile lo wererong wong pun rin bulmakau tun sivenga rintetnga nge i.’

**31** “Na itema i olal ile riong ve, ‘Tuk, nge nang elonga wong voth a tho nge na ur alavusnga ako

ini lek ini lom. <sup>32</sup> Aveto i sivenga ako aro te oma aning aolonga mo lemir sivenga, eneke teum posnga i ranga ve ako i rin lale, aveto i mimi werer, na i penthal, aveto i lo werer.’ ”

## 16

*Riong agelalnga nge vel ololonga thealnga le apaltetonga ako i theal senu nge ile menong.*

<sup>1</sup> Na Jisas i ria ile wainlangaere ve, “Na vel ololonga tokoninga omole e ako i voth na ile toko umonga i theal tetal ile vel ololonga aken. Na tokokoere o ri ve ine vel ololonga theal tetalnga i kem vel aken tokoninga ile umtun. <sup>2</sup> Mako i leng i ma i ria i ve, ‘Ole riong i nunganga ako wong kem? Sung lom erere ako i ritet tho nge lom omaing. Eneke i pavurvur aro wong theal tetal ol lek vel ololonga aken avele.’

<sup>3</sup> “Na toko umonga aken i ria isivenga nge ve, ‘Aro tho oma ol va? Eneke lek mukalinga aro i eltetpot tho, nge lek omaing. Na lek engenging i pavurvur nge ulue tonga avele, na lek mara nge ur pelie nonga. <sup>4</sup> Lemik mire ol nge ur aka aro tho oma i mo aro tokokoere o nongpoo tho a ole vel, tova tho vus nge omaing.’

<sup>5</sup> “Mako i leng toko omole omole aka oa thangaroong i voth a ile mukalinga nge. Na i nina toko aka i velpol tel ve, ‘Om thangaroong or pova i voth a lek mukalinga nge?’

<sup>6</sup> “Na i olal ile ninong ve, ‘Wel imei aolonga or mule pa mule.’

“Ma i ria i ve, ‘Ake ini erere ako om thangaroong i voth nge, na menu mo ong wat or mule pa lim viri viri.’

<sup>7</sup> “Lama i nina toko aininga ve, ‘Na wong, om thangaroong or povा?’

“Na i olal ile ninong ve, ‘Ok wit a alal or 1,000.’

“Ma i ria i ve, ‘Ela lom erere ake na pakriku ol i nge 800.’

<sup>8</sup> “Na ile mukalinga i risea ile theal tetalonga ako ini le apaltetonga, eneke i oma omaing ako i paesa ile mukalinga iion roro tomo nge ako aro i theal senu ile menong panen.” Na Jisas i ria or ve, “Tokokoe areko o panes vothung ulue anga, olemi mire senu nge sovengalo aka aro o sung umtun a tokokoere nge mo o velpol ini othanga, aveto tokokoe areko o panes vothung aka ini a God ile, olemi mire nge vothung aken avele. <sup>9</sup> Na tho ria thomu, thomu o opoal tokokoere nge lomu ur ulue anga mo o elo a Toko Pomnga a ole mimiong, mo aro o velpol ini thongomu, naro panen tova lomu ur elonga i vus, God aro i nongpoo thomu nge rem aka mimiong i voth nge naro ile vusonga avele.

<sup>10</sup> “Na toko aka i theal senu ur posalnga, aro i theal senu mun ur aka i pulua. Na toko aka i theal senu ur posalnga avele, aro i theal senu ur aka i pulua avele. <sup>11</sup> Na aro ve thomu o theal senu ur ulue anga avele, aro thomu o pavurvur avele mun nge a God ile ur sivesivenga ithealtetalnga. <sup>12</sup> Na aro ve thomu o theal senu toko relnga ile ur elonga avele, aro toko e aro i sung ur e mo ini lomu, kene avele.

<sup>13</sup> “Toko umonga omole i pavurvur aro i velpol ini toko or aini ole umonga, kene avele, eneke aro ia sagu omole, naro ini silal aininga, eve aro ini silal omole, naro ia sagu aininga. Thomu o pavurvur aro o velpol ini a God ile umonga na tomo mun nge umtun ile umonga, kene avele.”

<sup>14</sup> Na Parisire o nongpol a Jisas ile riong aken, na o ri sililal i, eneke oa sagu rintet umtun elnga. <sup>15</sup> Na Jisas i ria or ve, “Thomu ini tokokoe areko o oma thomu ve thomu ini toko vengvenga a tokokoere otheki, aveto God ilemi mire nge lomumu ako i vengveng avele. Eneke ur aka i pomnga rintet a tokokoere otheki, ur aken kene God ini silal rintet i.”

*God ile patorong nge ile menong e nepes i sivenga nge a Moses ile patorong.*

*(Matiu 5:8; 11:12-13; Mak 10:11-12)*

<sup>16</sup> Na Jisas i ria or ve, “Moses ile patorong tomo nge a God ile riong elngare ole wating a erere nge, kene tokokoere o patoria or nge ma i mulal nge a Jon aka ini toko paninuonga ile velpoling. Aveto Panongpolong Sivenga aka nge a God ile menong e nepes, i patea ol nge a Jon ile velpoling na i es ol la. Na toko alavusnga olo vurtun inga nge esoong nge. <sup>17</sup> Aveto Moses ile patorong rongan i sivenga. Ulue na sepsa aro i penthal, aveto wating epee tie nge a Moses ile patorong aro i penthal avele.

<sup>18</sup> “Ranga ve nge patorong ake. Toko e aka i mothongpot iewo sengenga na i peange werer mun nge seng relnga e, aken i aom seng. Na toko e aka i peange nge seng aka iewo teltelinga i mothongpot i, aken i aom mun seng.”

*Riong agelalnga nge a Lasarus tomo nge toko le urnga.*

**19** Na Jisas i ri vene, “Toko le urnga e ako i voth. Na nge nang elonga i malmal nge te-unong sivesivengare, na i an aning sivesivengare evelelnga. **20** Na ako ru a ile vel thekia, toko ni akolikloknga ako iion a Lasarus, i men na ile ur e avele. **21** Na i men mo i an toko le urnga ia aning epipeere ako i matmatpot a ia aning le ngoinga thewo. Na nanaure o es me ma o aromal ini akoliklokre.

**22** “Lamako toko ako ile ur e avele i rin na God ile enselre o ela i a Pen a Urvet la, na o pamenu i a Abraham ilo sei. Na toko le urnga aken i rin mun ma o tetun i. **23** Ma i eso a toko kerengare ole pen ma i el sisong aolonga nge. Na i thea la, ma i thopol a Abraham ako i voth melanga na Lasarus i men a ilo sei. **24** Ma i lenga a i nge ve, ‘Vovo Abraham, lomum esal tho, na pake a Lasarus mo i paesu imeni pupo a thei lemi, mo aro i pameriru lek muma, eneke tho voth nge sisong aolonga ake ru a won sesenga lemi.’

**25** “Aveto Abraham i olal ile riong ve, ‘Tuk, aro lomum rum werer nge lom mimiong ako nomenga ako wong el ur sivesivengare, na Lasarus i el ur kerekereengare, aveto ponange ol i voth ol nge lemi sivengaing, na wong, wong voth ol nge sisong. **26** Na e mun e ako ruprup lukulukunga i voth a ar wop lale, na areko o sis ve aro o plosa ake ru a them nge mo o es a thomu nge wot, aro o pavurvur avele, na omu e i pavurvur avele aro i es kora ol a them nge me.’

<sup>27</sup> “Na toko le urnga i olal ile riong ve, ‘I vene re aken, na tho nong engeng a wong nge Vovo Abraham, pake a Lasarus a ok vovo ile pen la. <sup>28</sup> Eneke teik or lim aken ru o voth. Na Lasarus aro i es mo i panakal ole nge ve, o mothong tova o es nge rem ake ru sisisong i voth nge.’

<sup>29</sup> “Na Abraham i ria i ve, ‘God ile riong elngare tomo nge a Moses, ole riong i ngo lale, na i sivenga ako aro titeumre o nongal ole riong.’

<sup>30</sup> “Na toko le urnga i olal ile riong ve, ‘Aken i pavurvur avele, Vovo Abraham, aveto aro ve toko e ako i los werera nge rinong naro i es a or nge, aken aro o lel okime nge ole vothung kerenga.’

<sup>31</sup> “Aveto Abraham i ria i ve, ‘Aro ve o nongal a God ile riong elngare tomo nge a Moses, ole riong avele, i pavurvur mun avele ako aro o nongal toko ako i los werera nge rinong, ile riong mun.’”

## 17

*God aro i paomelal areko o oma vothung kerenga.*

*(Matiu 18:6-7, 21-22; Mak 9:42)*

<sup>1</sup> Na Jisas i ria ile wainlangaere ve, “Ur pulanga ako aro i velpol mo i pamatu tokokoere nge vothung kerenga omanga. Aveto patong toko ako i pavelpol ur areken, aro matheong aolonga aro i el i. <sup>2</sup> Na aro ve toko aken i toth ako aro i paleklek toko aka ile lemioong i motu rongan, i sivenga inga nge i tova ve tokokoere o kino anral aolonga a ikei na o asesu i a thev lemi, mo i vlu, moro aken i paleklek or avele, naro God i sung paomelaling aolonga a i nge avele. <sup>3</sup> Na thomu o naktet sivengomu!

“Na aro ve teum e i oma vothung kerenga, aro wong vol i nge ile vothung aken, na aro ve i pamilem ile vothung aken, aro lomum simikal ile vothung kerenga aken. <sup>4</sup> Na aro ve i oma vothung kerenga a wong nge pa or limai nge nang omole, na pa or limai i es a wong nge na ilemi kerere na i ri mosing a wong nge, aken aro lomum simikal ile vothung aken.”

*Lemioong ako i posngati na i panes a God ilemi, i pavurvur nge omaing aolonga.*

<sup>5</sup> Na Jisas ile pakekere o ria Toko Pomnga ve, “Aro wong oma lemem lemioong mo i aolonga.”

<sup>6</sup> Na Toko Pomnga i ria or ve, “Aro ve lomu lemioong i posnga ranga ve ini won monnga ako i posnga rintet ako iion a ‘Mastet’, aken thomu o pavurvur ako aro o ria vero ve, ‘Lelrisa sivengom alariripia mola o sivengom a thev.’ Naro won aken aro i panes inga ako ini lomu riong.”

*Jisas i ri nge toko umongare ole vothung.*

<sup>7</sup> Na Jisas i ria tokokoere ve, “Aro ve omu e ile toko umonga ako i oma a ometa eve i theal sipsipre, na aro ve toko umonga aken i lo werer a lom vel, aro wong ria i ve, ‘Paviri me, mo ong an?’ <sup>8</sup> Avele, aro ong ria i ve, ‘Aro ong monsi ok aning na ong nea om teunong sivenga na theal tetal tho, tova tho an na tho thin, lamo wong an ol na wong thin ol.’ <sup>9</sup> Na toko umonga i nongal inga ile mukalinga ikei, aveto ile mukalinga i ri sivengaing a i nge avele, na aka ini ole vothung vet aken. <sup>10</sup> Na i venen re aken nge thomu, tova ve thomu o oma ur alavusnga aka tho ria thomu nge,

aro thomu o ri ve, ‘Them ini toko umonga inga na them oma inga ur areko ong ria them nge.’ ”

*Jisas i pamimi toko or mule pa omole ako putput i el or.*

<sup>11</sup> Na Jisas i es nge sovengalo aka i es a Jerusalem, nge sovengalo aka i thopot a Samaria na Galili oa wop. <sup>12</sup> Na i es totho nge rem omole na toko or mule pa omole aka putput i voth a or nge, o es na o thopol tetal a Jisas na o mit mela nge i. <sup>13</sup> Na o pres a i ve, “Jisas, Toko Pomnga lomum esal them.”

<sup>14</sup> Na Jisas i thopol or ma i ria or ve, “Thomu o es a prisre nge mo o pathengal numu peti a or nge, mo aro o panunganga riong nge thomu ve, ‘Putput i vus.’ ” Ma o es. Na rongan o voth a sovengalo lopat na oni peti i sivenga werer na o riri werer a God itheki.

<sup>15</sup> Na oa omole aka a or nge i thopol aka ini peti i sivenga werer, mako i lo werer a Jisas nge, na a sovengalo i pres viringa na i risea a God iion roro. <sup>16</sup> Na toko aken i lo werer a Jisas nge ma i ulu isivenga a ulue a Jisas ieve tepun na i ri sivengaing a i nge. Na toko aken ini toko Samaria anga.

<sup>17</sup> Na Jisas i thopol toko aken, ma i ria ve, “Toko or mule aka o sivenga werer, na thongom or limpenel kala? <sup>18</sup> I vava ake toko rem relnga inga ake i lo werer a tho nge me, ma i ri sivengaing a God nge, e?” <sup>19</sup> Mako Jisas i ria toko aken ve, “Mita mo wong es. Lom lemioong inga aka i pasenu wong.”

*Tokokoere aro o mostun inga nge ur elonga omanga i pavurvur nge nang ako aro Toko Pomnga Itun aro i velpol nge.*

(Matiu 24:37-39)

<sup>20</sup> Na Parisi pelie o nin a Jisas ve, “God ile menong e nepes aro i velpol penva?” Ma Jisas i olal werer Parisire ole ninong ve, “God ile menong e nepes, ile velpoling i pavurvur aro te thopol ur pelie aka i paateal ile pateaing, kene avele. <sup>21</sup> Na toko e avele aro i ria nge ve, ‘Thopol i, i voth ake, eve i voth aka la.’ Nongpol i, God ile menong e nepes, i voth a thomu nge lale.”

<sup>22</sup> Na i ria ile wainlangaere nge ve, “Matheong aolonga aro i velpoltun thomu, ma i oma thomu mo o sis rintet ve aro thomu o thopol inga Toko Pomnga Itun ile nang omole aken, aveto thomu o pavurvur aka aro thomu o thopol i tova i es me, kene avele. <sup>23</sup> Naro tokokoere o ria thomu ve, ‘Toko Pomnga Itun i lo werer lale, thopol i, i aka la, eve i ke me.’ Aveto thomu o mothong tova o espot mo o panes or. <sup>24</sup> Eneke nang aka aro Toko Pomnga Itun aro i velpol nge, aro i velpol ranga ve ini pen lemnga aka i kit ma i lala a sepsa elonga, ma toko alavusnga aro o thopol i. <sup>25</sup> Aveto aro a mukaling nge nang aken, Toko Pomnga Itun aro i el matheong puluanga naro tokokoe areko o mimi nge wop lemi ake aro o lel okime nge i.

<sup>26</sup> “Na nomenga nge wop lemi aka Noa i mimi nge, tokokoere ole mi tuntun inga ole omaingre na ole mi simikal a God, naro i vene mun re aken nge a Toko Pomnga Itun ile nang. <sup>27</sup> Na nge wop lemi aken toko na sengre o anan na o thinin na o peange, i mul nge nang aka Noa i eso a imot

lemi nge, mako thei awonga aolonga i velpol ma i pavusu or alavusnga.

<sup>28</sup> “Na i vene mun nomenga nge wop lemi ako Lot i mimi nge, tokokoere o mosal inga aning na thinong, na o olol pel ole lulu na o o aningre na o ari velre, <sup>29</sup> makola i pavurvur nge nang ako Lot i lospot a Sodom, na a ur e avele nako won sesenga na uk aka ini misep anga i matmatpot a sepsa lemimi me ma i pavusu or alavusnga.

<sup>30</sup> “Naro i vene mun re aken nge Toko Pomnga Itun ile nang, aro o oma ole omaingre i mul nge nang ako Toko Pomnga Itun aro i velpol a pen lalanga. <sup>31</sup> Naro nge nang aken, toko aka i thau i a ile vel polemi aka i thatha,\* i mothong tova ilemi rum werer ile ur elonga aka i voth a ile vel lemi. Naro i vene mun nge toko aka i voth a ometa, i mothong tova i es werer a ile vel nge la, i sivenga aka aro ilemi simikal ur ulue anga na i panes inga Toko Pomnga Itun. <sup>32</sup> Naro lomumu rum werer nge ur aka i velpol a Lot iewo sengenga nge. Nge aka ilemi rum werer nge ile menong nomenganga ma i the singal werer, mako i rin.† <sup>33</sup> Na aro ve toko i krim engeng isivenga ile mimiong, aken aro ile mimiong aken aro i penthal. Aveto toko aka i mothong isivenga ile mimiong panesnga, aro i el mimiong aka aro ile vusonga avele. <sup>34</sup> Na tho ria thomu ve, ‘Nge pemliknga aka Toko Pomnga Itun i velpol nge, na toko or aini aka o ngo nge ring omole, aro God i elteta omole na omole aro i ngo reletun. <sup>35</sup> Na

---

\* **17:31:** O thepol vel polemi ia sei nge pes 121.      † **17:32:** Tenesing ake i voth a Stat 19:26.

seng or aini ako o omlotun oa aning omanga, naro God i elteta omole na omole aro i voth reletun.  
<sup>36</sup> [Na toko or aini ako o um a ometa, aro God i elteta omole na omole aro i voth reletun.]”

<sup>37</sup> Na ile wainlangaere o nina i ve, “Toko Pomnga, ur areken aro i velpol a kala?”

Na Jisas i olal ole ninong nge riong agelalnga ve, “Nge wop aka aning i ngo nge kene visore o rer kalalualtun i.” ‡

## 18

### *Riong agelalnga nge sang basu na riong nongpolnga kerenga.*

<sup>1</sup> Mako Jisas i ripot riong agelalnga a ile wainlangaere nge, mo aro i patalor or nge ve aro o nong evelelnga na o mothong tova olemi i ngo pelekpol nge ole nongong. <sup>2</sup> Ma i ria ve, “Nge rem pomnga e aka, riong nongpolnga e aka i voth, ma i papomnga a God avele, na i pavothal mun tokokoere avele. <sup>3</sup> Na seng basu mun e aka i voth mun nge rem pomnga aken, opisleonga i es la ma i tangos nge riong nongpolnga aken, ve aro i opoal i nge tokokoe areko o teltun ia.

<sup>4</sup> “Ma nge nang elonga riong nongpolnga aken i oma vet ur e avele nge ile nonging aken, aveto nge nang e aka i ria isivenga ve, ‘I nunganga aka ve, tho papomnga a God avele, na tho pavothal mun

---

‡ **17:37:** Epee ake i mirenga ve, Tokokoere olemi mire aka visore oa aning i voth, tova ve o thopol visore o rer kalalualtun wop aken, aken ini ole paatealinga. Ranga ve mun i aka aro tokokoere aro olemi mire nge wop aka Toko Pomnga Itun aro i velpol nge, eneke or alavusnga aro o thopol paatealing nge Toko Pomnga Itun ile velpoling.

tokokoere avele. <sup>5</sup> Aveto seng basu aken i sung matheong puluanga a tho nge. Naro i sivenga ako aro tho opoal i nge ia teltunong aken. Aro vene mo evelenga aro i esu esa me, mo i oma tho mo i pamolosal tho.’”

<sup>6</sup> Na Toko Pomnga i ria mun ve, “Aro thomu o nongpol inga riong nongpolnga kerenga ile riong. <sup>7</sup> Na God i ranga ve ini riong nongpolnga kerenga aken avele! Aro ve ile tokokoere o avav i nge nang na mlik aro i opoal or, naro i opoal or viri viri. <sup>8</sup> Aveto nge nang aka Toko Pomnga Itun i lo werer nge, i sis aka aro i thopol toko na seng areko ole mio a i nge, kene rongan o mit engeng nge nongong.”

*Riong agelalnga nge toko aka ini Parisi na toko aka ini takis elnga.*

<sup>9</sup> Na Jisas i sung riong agelalnga nge toko pelie aka ole mi ve, or ini toko vengvenga na o paruru toko alavusngare. <sup>10</sup> Na i ria ve, “Toko or aini aka o es a Lotu Tepun a Vel mo o nong, oa omole ini Parisi na omole ini takis elnga. <sup>11</sup> Na Parisi aken i mita ma i nong nge isivenga ve, ‘God, tho ri sivengaing a wong nge, aka tho sung ses avele, na tho avsa patorong e avele, na tho aom seng mun avele ranga ve ini tokokoere. Na tho ri sivengaing a wong nge aka tho ranga ve ini takis elnga ake avele. <sup>12</sup> Na tho sem nge nang or aini nge wi k omole omole. Na nge ur elonga aka tho el i, tho panes a Moses ile patorong, mako tho omre u i mo epee or mule na tho sung epee omole a wong nge.’

<sup>13</sup> “Aveto toko aka ini takis elnga i mit gat na ini plong ve aro i thea roro a Pen a Urvet na ilemi

kerere nge ile vothung kerenga, mako i so ipakei ma i ria ve, ‘God, tho ini toko ako lek vothung kerenga, aro lomum esal tho.’”

<sup>14</sup> Ma Jisas i ria or ve, “Tho ria thomu, takis elnga aken ako i lo werer a ile pen, ienga inga ako i riri a God itheki, na Parisi aken aro avele. Eneke areko o papomnga osivenga, aro God i paruru or, na areko o paruru osivenga, aro God i papomnga or.”

*Jisas i ronga imeni a wainlanga tutunre nge.*

*(Matiu 19:13-15; Mak 10:13-16)*

<sup>15</sup> Na ine tokokoe pelie ako o mane povothvothre a Jisas nge mo i ronga imeni a or nge. Aveto Jisas ile wainlangaere o thepol or ma o vol or. <sup>16</sup> Aveto Jisas i leng wainlanga tutunre a i nge me, na i ria ile wainlangaere ve, “Somu wom wainlanga tutunre mo o es a tho nge me, na o mothong tova o mit roal or, eneke tokokoe areko olemio a tho nge, ranga ve ini wainlanga tutun areke olemio a tho nge, or kene o voth a God ile menong e nepes lemi. <sup>17</sup> Na tho ri nunganga a thomu nge, na aro ve toko ako i el inga a God ile menong e nepes ranga ve ini wain ako i ela itema ile sungong, ma ilemi pelekpol nge avele, aken aro i pavurvur ako aro i eso a God ile menong e nepes, aveto aro ve i el i ranga ve ini wain aken avele, aro i eso nge avele.”

*Jisas i ri tomo nge mukalinga ako ile ur elonga i pom.*

*(Matiu 19:16-29; Mak 10:17-30)*

**18** Na Juda a mukalinga e ako i nin a Jisas ve, “Pamirealinga sivenga, aro tho oma neke ako aro tho el mimiong ako aro ile vusonga avele, e?”

**19** Ma Jisas i ria i ve, “Lomum rum senu tel nge lom riong mirenga ako wong apet tho ve tho ini toko sivenga, eneke toko e avele ako i sivenga, ini inga a God ienga inga ako i sivenga. **20** Na lomum mire nge patorong alavusnga lale, ako ve: Thomu peangere o mothong tova o ngo tomo nge areko or ini ewomu avele. Na o mothong tova o so rin polpol toko. Na o mothong tova o kem. Na thomu o mothong tova lomu apaltet tova ve toko e i mit nge riong. Naro o papomnga titomomuere na ninomuere, naro o panes inga ole riong.” \*

**21** Ma mukalinga i olal ile riong ve, “I patea nge lek kulpoaing ma i pavurvur ponange, tho panes patorong alavusnga aken.”

**22** Ma Jisas i nongpol i veno ako, ma i ria i ve, “Aveto ur omole ako kene ong oror nge, aro ong tepolal lom ur alavusnga nge umtun na sungu i a toko le ur avelengare nge, na aro ve ong oma i venen aken, aro lom ur elonga pom, ako a Pen a Urvet lemi. Lamo ong es me mo ong panes tho.”

**23** Aveto toko aken i nongpola riong aken ma ilemi kerere rintet, eneke ini toko ako ile ur elonga i pom rintet. **24** Ma Jisas i thepol i ako toko aken ilemi kerere rintet, mako i ria ve, “I klip rintet nge toko le urngare ako aro o eso a God ile menong e nepes. **25** Na i klip nge mekerem aolonga ako ini Kamel ako aro i koro a italonga

---

\* **18:20:** Kisim Bek 20:12-16

tionga nge, aveto i klip rintet nge toko le urnga  
ako aro i eso a God ile menong e nepes.”

<sup>26</sup> Ma tokokoere o nongpola riong aken ma o ri  
ve, “Na aro ve i vene aken, anga ol i pavurvur ako  
aro i el mimiong ako aro ile vusonga avele, e?” †

<sup>27</sup> Ma Jisas i olal ole riong ve, “Ur ako tokokoere  
o pavurvur nge omanga avele, aken aro God i  
oma i.”

<sup>28</sup> Ma Pita i ria ve, “Them mothonglel lemem ur  
alavusnga a rebo lale, na them panes wong.”

<sup>29</sup> Ma Jisas i ria or ve, “I nunganga, toko ako  
i mothonglelu ile vel, eve iewo sengenga, eve  
ititeinre, eve ilengare na itutunre mo aro i opoal  
tokokoere mo ole mio nge a God ile menong e  
nepes, <sup>30</sup> aken aro i el ur puluanga nge mimiong  
ake ponange i voth nge, naro panen i el mun  
mimiong ako aro ile vusonga avele.”

*Jisas i ritet mun pa menga nge ile rinong.*

*(Matiu 20:17-19; Mak 10:32-34)*

<sup>31</sup> Ma Jisas i wol lelpot ile wainlanga or mule  
pa omole pothoi or aini aken ma i ria or ve, “O  
nongpol! Aro te esa a Jerusalem na ur alavusnga  
ako nomenga God ile riong elngare o wat i ma o ri  
nge a Toko Pomnga Itun, aro i velpol nunganga.

<sup>32</sup> Aro o sungu i a tokokoe areko or ini Judare  
avele omeni, mo aro o ri sililal i, naro o oma riong  
kerenga puluanga nge i, na o osuklel i. <sup>33</sup> Naro o  
so litlit i, naro o so rin i, aveto nang or me aro i  
vus, naro i mimi werera mun.”

† **18:26:** Na o kukuk nge a Jisas ile riong aken, eneke o rivenga  
God i oma senu nge toko mo i velpol ini toko le urnga.

**34** Aveto ile wainlangaaere olemi mire nge riong areken mirenga avele. Ine riong areken mirengare God i pango kine i nge or, ma olemi mire nge ur areko Jisas i ria or nge avele.

*Jisas i pasenu werer toko omole ako itheki pros ma i the werer.*  
*(Matiu 20:29-34; Mak 10:46-52)*

**35** Na Jisas i es ma i toth a rem pomnga a Jeriko, ma toko omole ako itheki pros i men a sovengalo wo peti na i nong ur elonga nge tokokoe areko o esu esa nge sovengalo aken. **36** Ma i nongpol pulua aolonga aka o es me ma i nina or ve, “Thomu o oma ur nekenga ake?” **37** Ma o ria i ve, “Jisas aka ini Nasaret anga i ake ru i es me.”

**38** Ma toko theki prosnga aken i lenga ve, “Jisas aka ini a Devit itevinga, aro lomum esal tho.”

**39** Ma tokokoe areko o mukal a Jisas ile, na o es toth a i nge, o vol i ma o ria i ve, “Wong poreng!” Aveto i lenga viringa rintet mun ve, “Ina Devit itevinga, aro lomum esal tho.”

**40** Mako Jisas i mitu ma i ria ve, aro o pasong toko aken a i nge me. Na toko aken i es totho inga ma Jisas i nina i ve, **41** “Wong sis nekenga aka aro tho oma i a wong nge, e?”

Na i olal ile riong ve, “Toko Pomnga, tho sis ve aro thekik i vles werer.”

**42** Mako Jisas i ria i ve, “Wong the werer, lom lemioong inga i pasenu wong.” **43** A ur e avele, nako i the werer, mako i panes ol a Jisas ma i risea a God. Ma tokokoere o thopol ur aka i velpol venen aken, mako o risea mun a God.

## 19

*Jisas i es a Sakius ile vel.*

<sup>1</sup> Ma Jisas i eso a Jeriko ma i sis ve aro i alpo selele. <sup>2</sup> Ma toko omole i voth nge rem aken iiion a Sakius, ini mukalinga nge takis elngare na ini toko le urnga. <sup>3</sup> Na i sis ako ve, i thepol a Jisas ako i ate vava, aveto ini toko orornga na pulua o pasipsopal a Jisas ma i pavurvur aro i thepol i avele. <sup>4</sup> Mako i lo lelpot pulua aolonga aken, ma i tho a mukaling ma i roa nge pupos mo aro i thepol a Jisas ako aro i es rum nge sovengalo aken me.

<sup>5</sup> Ma Jisas i es me ma i es vengtunpot wop aken, na i thea roro ma i thopol a Sakius, ma i ria i ve, “Sakius, wong ru me viri viri, eneke ponange aro tho voth tomo nge wong a lom vel.” <sup>6</sup> Mako i ru me viri viri ma i vual nge lemi sivengaing ma i wol ol i a ile vel la.

<sup>7</sup> Ma tokokoere o thepol ur aken ma o ri pom-pom nge. Ma o ri ve, “Toko aken i es long, ma i eso a toko ako i oma vothung kerenga ile vel.”

<sup>8</sup> Ma o voth ol a vel lemi ma Sakius i mita ma i ria Toko Pomnga ve, “Wong nongpol Toko Pomnga, aro tho thomreu lek ur elonga mo theki or ainiu, naro tho sungu epee nge toko le ur avelengare. Na nomenga lek apaltetpot toko pelie ma tho kem ole umtun naro tho olal werer ol i a or nge pa or penel.”

<sup>9</sup> Ma Jisas i ria or ve, “Ponange God ilemi simikal toko na sengre nge vel ake ole vothung kerenga lale. Na tho es a toko ake ile vel, eneke toko mun ake ini a Abraham itevinga nunganga.

<sup>10</sup> Na Toko Pomnga Itun i es me aka aro i or tokokoe areko o penthal mo i el werer or.”

*Riong agelalnga nge toko umonga or mule pa omole ako o el umtun.*  
*(Matiu 25:14-30)*

<sup>11</sup> Ma toko na seng o ta otelnga nge riong areken. Na Jisas i toth ol aro i velpol ol a Jerusalem, na o rivenga God ile menong e nepes i toth aka aro i velpol. Mako Jisas i ria mun riong agelalnga a or nge. <sup>12</sup> Ma i ri ve, “Ine toko pomnga omole e aka i es nge rem gatnga mo ia pomnga i papompom i mo i velpol ini nepes. Lamo i lo werer mun a ile rem tepun mo i theal ol ile tokokoere. <sup>13</sup> Na toth ol aka aro i es, ma i lenga ile toko umonga or mule pa omole ma i sung umtun gol\* omole omole a or nge. Na i ria a or nge ve, ‘Aro thomu o um nge umtun ake mo o pavelpol umtun nge mo i pavurvur nge nang aka aro tho velpol werer nge.’

<sup>14</sup> Aveto ile pen lemiare oni silal i, mako o pake riong elnga pelie ma o tho rum i a ikime ma o ria oa pomnga ve, ‘Nimem plong toko aken ve aro ini lemem nepes.’

<sup>15</sup> Ma i papompom i mo ini nepes. Lamako i lo werer. Ma ikei song ol ile umonga areton ru i sungu umtun a or nge nomenga, ve aro o es a i nge me. Eneke i sis ve aro i thepol umtun or pova aka o el i lale nge umtun aka i sungu i a or nge ma o um nge.

<sup>16</sup> Ma toko omole aka i mukal tel me ma i ri ve, ‘Toko Pomnga lom umtun aton ong sungu i a tho nge, tho um nge ma i pavelpol ol umtun gol or mule mun a we.’

---

\* **19:13:** Umtun gol ake i pavurvur nge toko omole iolonga nge ngov or me eve nge nang or mule pa mule.

<sup>17</sup> Ma nepes aken i ria i ve, ‘Wong ini umonga sivenga! Wong theal senu umtun atiken, make ponange aro tho papomnga ol ong, mo wong theal rem pomnga or mule.’

<sup>18</sup> Lama toko aininga i es me ma i ri ve, ‘Toko Pomnga lom umtun aton wong sungu i a tho nge, ma tho um nge ma i pavelpol ol umtun gol or lim mun a we.’

<sup>19</sup> Ma nepes aken i ria i ve, ‘Aro wong theal rem pomnga or lim.’

<sup>20</sup> Lama toko mun e ako i es mun me ma i ri ve, ‘Toko Pomnga, lom umtun aton ru wong sungu i a tho nge, i ke. Tho soala i ma tho paen kine senu senu i. <sup>21</sup> Na tho oma venen aken, eneke tho ngeip nge wong, eneke wong ini toko ako lomum esal avele. Na wong el ur areko wong o i avele.’

<sup>22</sup> Ma i ria i ve, ‘Wong ini umonga kerenga. Na lom riong ako wong ri kene aro tho paomelal wong nge! Na lomum mire nge ako tho ini toko ako lemik esal avele, na tho el ur ako ini lek avele, na tho lel ur ako tho o i avele. <sup>23</sup> Maken i vava ake wong paeno lek umtun aken a umtun a vel nge avele, e? Aro ve ong paeno i nge, na aro ve tho lo werer, aro tho el tomo i nge umtun pelie ako aro o rong esa i nge.’

<sup>24</sup> Ma i ria tokokoe areko o mit toth ve, ‘Thomu o elteta umtun aken a i nge, mo o sungu i nge toko umonga ako ile umtun or mule.’

<sup>25</sup> Aveto o ria i ve, ‘Toko Pomnga, toko aken ile umtun pom lale.’

<sup>26</sup> Ma nepes aken i ria or ve, ‘I nunganga, tokokoe areko o el ur pelie lale, aro God i sungu mun ur puluanga a or nge. Na tokokoe areko ole

ur posalnga, ur areken aro God i elteta i a or nge.  
<sup>27</sup> Na tokokoe areton ru ini lek ngarangre ako oni plong ve aro tho velpol ini ole nepes. Aro thomu o wol or me mo o pun rin or ake ru a thekik.’ ”

## **Jisas i velpol a Jerusalem na i pamireal toko na sengre ako a Lotuonga Tepun a Vel a lok lemi**

(Vonge 19:28–21:37)

*Jisas i eso a Jerusalem ranga ve ini nepes.*  
*(Matiu 21:1-9; Mak 11:1-10; Jon 12:12-15)*

<sup>28</sup> Ma Jisas i ri nge riong agelalnga areken ma i vus, lamako i plosa mun ma i mukal mun ole a Jerusalem la. <sup>29</sup> Ma i es ma i toth ol a Betpage na Betani, nge tete ako o apet i ini a Oliv, ma i pake ile wainlanga or aini mo o mukal tel. <sup>30</sup> Ma i ria or paini ve, “Aro thomu paini o es nge rem ako la na thomu o eso inga naro thomu paini o thepol donki aponga omole ako o pating i ma i mit na toko e i ro rum nge rongan. Aro thomu paini o inospot i mo o ti i ake me. <sup>31</sup> Na aro ve toko e i nin a thomu paini ve, ‘I vava ake thomu paini o inospot i, e?’ Aro thomu paini o ria i ve, ‘Ar Pomnga ile omaing i voth nge.’ ”

<sup>32</sup> Ma Jisas i pake or paini ma o es ma ur alavusnga aka o thepol i, i velpol ranga ve aka Jisas i ria or paini nge. <sup>33</sup> Ma or paini o inosos donki aponga aken patinga na itokoningare o nina or ve, “I vava ake thomu o inos donki aken, e?”

<sup>34</sup> Ma o olal ole riong ve, “Ar Pomnga ile omaing i voth nge.”

<sup>35</sup> Mako o pasong donki aponga aken a Jisas nge la. Ma o ela ole teunongre ma o vlesa i a donki iwe. Ma o opoal a Jisas nge iparonga a donki aken nge. <sup>36</sup> Ma i eses na tokokoere o ela oa teunong ma o vlesu i a sovengalo.

<sup>37</sup> Na Jisas i es totho a Jerusalem ma i ruru a tete a Oliv ma ile wainlangaere puluanga o patea lemi sivengaing na o onnga na o risea a God nge pathepolong alavusnga ako o thopol i. <sup>38</sup> Ma o ri ve,

“Sapase nepes ake i es nge Toko Pomnga iion me!”

*Buk Song 118:26*

“Te risea a God iion roro nge

ile omaing sivenga a it nge,

na nge men senuong ako i sungu i a it  
nge.” *Asaia 56:7*

<sup>39</sup> Lamako Parisi pelie ako a or nge o ria Jisas ve, “Pamirealinga, vol lom wainlangaere mo o poreng, o mothong tova o ri vene aken.”

<sup>40</sup> Ma Jisas i olal ole riong ve, “Tho ria thomu, aro ve o poreng, aro anralre osivenga aro o onnga.”

*Jisas i ritet nge a Jerusalem ile kerengaing panen.*

<sup>41</sup> Na Jisas i es totho a Jerusalem ma i thopol i ma ilemi esal tokokoe areko o voth nge ma i tang ol nge or. <sup>42</sup> Ma i ria ve, “Tho sis ve aro thomu mun lomumu mire nge ako tho pavurvur aro tho pamien senu thomu! Aveto ponange i ngo kine na thomu o pavurvur ako aro o thopol i avele. <sup>43</sup> Nang e ako aro i es me ako aro lomu ngarangre aro o re pen nge thomu, mo aro o mit

riroala thomu, naro o avalalo thomu. <sup>44</sup> Naro o pakerenga selele thomu alavusnga aka o voth a Jerusalem a lok lemi, naro o teu lok, naro o nangseal anral e avele aka aro i ngo a anral relnга e iwe. Na Jerusalem aro ong vus selele, eneke ong ate nang e aka aro God i es me mo i el werer ong nge, kene avele.”

*Jisas i wistetpot areko o tepolal pel nge ole lulu a Lotu Tepun a Vel a lok lemi.*

(Matiu 21:12-16; Mak 11:15-18; Jon 2:13-16)

<sup>45</sup> Na Jisas i eso a Lotu Tepun a Vel a lok lemi na i patea nge areko o tepolal pel nge ole lulu owistetpotnga. <sup>46</sup> Ma i ria or ve, “Nge a God ile erere i ri vene:

‘Lek Lotuonga a Vel aro ini nongonga a vel.’

*Aisaia 56:7*

Aveto thomu oma i ranga ve ini toko kemon-gare ole pen.”

<sup>47</sup> Na nge nang elonga Jisas i patorial toko na seng a Lotu Tepun a Vel a lok lemi. Na pris kimangare tomo e pamirealingare nge a Moses ile patorong tomo e toko na sengre ole mukalingare, o sis aka ve, o pun rin a Jisas. <sup>48</sup> Aveto o pavurvur avele, eneke toko na seng alavusnga o engeng nge ile riong nongpolnga ma oa pun aka ve, o nongpol ile riong alavusnga.

## 20

*Toko pelie o nin a Jisas ve, “Anga i ategal wong aka aro ong wistetpot areken, e?”*

(Matiu 21:23-27; Mak 11:27-33)

<sup>1</sup> Na nge nang omole ako Jisas i patoral toko na sengre aka a Lotu Tepun a Vel a lok lemi. Na i panongpol or nge Panongpolong Sivenga. Na pris kimangare tomo nge pamirealingare nge a Moses ile patorong na toko na sengre ole mukalingare o es a i nge me. <sup>2</sup> Na o nin a Jisas ve, “Wong ria them nge, anga i ateal wong aka wong wistetpot areken, e?”

<sup>3</sup> Ma Jisas i olal ole riong ve, “Tho mun tho sis aka ve, tho nina mun thomu nge ninong omole mo o olal i a tho nge me. <sup>4</sup> Anga i ateal a Jon mo aro i paninu tokokoere? God eve toko ulue anga?”

<sup>5</sup> Mako mukalingare o ria pel ve, “Aro ve te ri ve, ‘God i ateal i,’ ma aro i ria it ve, ‘Na i vava ake lomumuo nge i avele, e?’ <sup>6</sup> Aveto aro ve te ri ve, ‘Toko ulue anga i ateal i.’ Aken aro tokokoere o kras leltun it nge umre, eneke olemio nge a Jon aka ini a God ile riong elnga.”

<sup>7</sup> Mako o olal a Jisas ile ninong ve, “Lemimem mire nge avele.”

<sup>8</sup> Mako Jisas i ria or ve, “Tho mun aro tho ria mun thomu nge avele, aka anga i ateal tho ve aro tho oma omaing ake.”

*Riong agelalnga nge Judare aka o ranga ve ini ometa theal tetalingare.*

*(Matiu 21:33-46; Mak 12:1-12)*

<sup>9</sup> Mako Jisas i sung riong agelalnga a toko na sengre nge vene, “Toko omole aka i lesu vain a ometa, ma i pathealu tokokoe pelie ma o theal ia ometa aken. Na toko aken i es nge rem melanga ma i voth palolo nge. <sup>10</sup> Lama nge vain le

motuong,\* ma i pakepot ile umonga omole ma i es a tokokoere nge ako o theal tetal ia ometa aken, eneke i sis ve aro i ela aning epee mo ini imeni olonga. Aveto ometa theal tetalngare o siso i ma o wispot i na i es polpol werer inga la. <sup>11</sup> Mako i pake mun ile umonga omole mun e la. Aveto o siso mun i na o palemara i. Na o pake werer i ma i es polpol mun inga la. <sup>12</sup> Mako i pake mun ile umonga menga ma i es. Aveto tokokoere o siso mun i na ini peti ia mimla ma o ela i ma o asespot i a lalanga la.

<sup>13</sup> “Vene ako ma ometa tokoninga i ria vene, ‘Aro tho oma ol va? Aro tho pake tuk tomonnga omolenga ako ok sagu rintet i, eneke aro o nongal ol ile riong.’

<sup>14</sup> “Aveto ometa theal tetalngare o thopol i ako i es me, ma o ria pel ve, ‘Toko aken i es me aro i elespot itema ile ur elonga, aro te so rin i, mo aro te ela ile ur elonga areke mo ini ler ol.’ <sup>15</sup> Mako o rere i a ometa aken lemi, ma o asespot i a lalanga, mako o so rin i.

“Na thomu o rivenga, aro ometa tokoninga aro i oma or va? <sup>16</sup> Aro tho ria thomu ve, aro ometa tokoninga aro i so rin or naro i sungu ia ometa nge toko relnga pelie mo aro o theal ol i.”

Ma tokokoere o nongpol a Jisas ile riong aken, ma o ria ve, “I mothong tova aro i oma vene aken.”

<sup>17</sup> Aveto Jisas i the a or nge, na i ria or ve, “Ta, thomu o ria tho nge riong ake mirenga ako o wat i a God ile erere nge ako i ri vene:

---

\* **20:10:** Vain le motuong i pavurvur nge tovu po or lim.

“ ‘Um ako vel aringare o rivenga  
 i kerenga ma o siv lelpot i,  
 ake kene i velpol ini um a urvet ako i paen-  
 geng vel  
 ranga ve ini wovek sapatanga.’      *Buk  
 Song 118:22*

<sup>18</sup> Na toko alavusnga aro ve o mata a um aken  
 nge, aro o mout mout. Na aro ve um aken i mata  
 a toko e nge, aro i mopipara.”

<sup>19</sup> Na pamirealingare nge a Moses ile patorong  
 tomo nge pris kimangare olemi mire ako ve, Jisas  
 i ri aken nge or, nge ile riong agelalnga aken. Na o  
 ranga ve ini ometa theal tetalngare. Mako o ri ve  
 o rere sele i, aveto o ngange nge toko na sengre.

*Judare oni plong nge takis ulnga, mako o nin  
 a Jisas ve, aro o ul takis a nepes a Sisar nge, eve  
 avele?*

*(Matiu 22:15-22; Mak 12:13-17)*

<sup>20</sup> Mako pris kimangare tomo nge pamirealin-  
 gare nge a Moses ile patorong, o the senu senu  
 nge a Jisas. Na o ol toko pelie mo aro ole apaltet  
 ve or ini toko sivenga. Na o sis ve aro ole olo i  
 mo i ripot nge riong pelie ako tova i avsa Romre  
 ole patorongre mo aro o teltun ia mo Romre o  
 rere i mo aro o pamit i nge riong. <sup>21</sup> Mako toko  
 le apaltetongare o nin a Jisas ve, “Pamirealinga,  
 lemimem mire ako ve, lom riong kene i vengveng,  
 na lom patoraling kene i nunganga. Na wong  
 sung riong omole inga a toko na sengre nge, na  
 lomum nge toko kimanga na toko vulutngare mo  
 ong eksing lom riong a or nge, kene avele. Wong  
 patorial vengveng or alavusnga, nge sovengalo

ako aro o panes a God nge. <sup>22</sup> Na lemem ninong i vene: Na nge ler patorong, i vengveng ako aro te ul takis a nepes a Sisar nge, eve avele?”

<sup>23</sup> Aveto Jisas ilemi mire ako ve, aro ole olo i, mako i ria or ve, <sup>24</sup> “Pathengalu umtun alavatharnga omole a tho nge. Na anga ia sei ake na iion ake i voth nge, e?”

<sup>25</sup> Mako o ri ve, “Ini a nepes a Sisar ile.”

Mako Jisas i ria or ve, “Ur ako ini a Sisar ile, aro thomu o sungu vengveng i a Sisar nge. Na ur ako ini a God ile, aro thomu o sungu vengveng mun i a God nge.”

<sup>26</sup> Ma o kukuk nge ako i olal i a or nge. Na o pavurvur aro ole olo i avele, ako a tokokoere otheki. Ma o men porengrengaltun ol inga.

*Sadiusire o nin a Jisas nge toko aka aro i rin lamo i mimi werera mun.*

(Matiu 22:23-33; Mak 12:18-27)

<sup>27</sup> Ma ine Sadiusi pelie aka o es a Jisas nge me. Na Sadiusire ini tokokoe areko o ri ve, tokokoe areko o rin lale, o pavurvur aro o mimi werera ol avele. Na o nin a Jisas ve, <sup>28</sup> “Pamirealinga, nomenga aka Moses i wat patorong omole aka ve, aro ve toko omole i peange na i rin petetun iewo na otutun e avele, maken aro itein posnga aro i ewo werera mun itein pomnga ia basu mo aro i pavelpol wain e mo ini itein pomnga aka i rin lale ile, mo ilengare o mothong tova o vus.<sup>†</sup> <sup>29</sup> Na nomenga titeinpel or limai o voth. Na otein pomnga aka ini oa tengen i ewoa tel seng omole. Ma i rin petetun iewo sengenga na otutun

---

† **20:28:** Lo 25:5

e avele. <sup>30</sup> Mako itein opisoinga i ewoa i, ave i velpol venen mun re aken a i nge, <sup>31</sup> na otein menga i venen mun re aken, ma or alalimaipot oewo seng aken, na otutun e avele, nako o rin rin. <sup>32</sup> Lamako patopalalnga seng aken i rinpot mun. <sup>33</sup> Na lemem ninong i vene: Panen nge los wereraing, seng aken aro ini ol i kathnga iewo, eneke toko or alalimaipot o ewoa i?”

<sup>34</sup> Ma Jisas i olal ole riong ve, “Na nge wop lemi ol ake, toko na sengre o peange. <sup>35</sup> Aveto toko na seng areko God i ateal or mo i apet or ini toko sivenga, aro i palos werera mun or mo o voth tomo nge i a Pen a Urvet, naro o peange ol avele. <sup>36</sup> Naro o rin ol avele ranga ve ini a God ile enselre. Na or ini a God itutunre, eneke i palos werera or nge rinong. <sup>37</sup> Na tenesing nge a Moses i pathengal it nge areko o rin, aka aro o los werera mun. Na nge tenesing aka e won pok a vutvutnga aka won sesenga i apola nge, God i ria Moses vene:

‘Ponange tho ini a God aka ini a Abraham ile,

na Aisak ile

na Jekop ile.’ ‡ *Kisim Bek 3:6* <sup>38</sup> Na ake i pathengal i a it nge aka God ini rinongare ole God avele. Ini toko mimingare ole God. Na toko na seng alavusnga o mimi a itheki.”

<sup>39</sup> Na toko pamirealingare nge a Moses ile patorong pelie, o nongpol aka Jisas i ripot riong aken, mako o ria i ve, “Pamirealinga, ong olal senu ole ninong.” <sup>40</sup> Mako tokokoere o ngeip ol nge ninong pelie aka aro o nin a Jisas nge.

---

‡ **20:37:** Nge wop lemi aka Moses i mimi nge, Abraham, Aisak na Jekop o rin lale, aveto rongan ooni i voth.

*Toko aka God i ateal i ve aro i el werer ile tokokoere, ini ao?*

*(Matiu 22:41-46; Mak 12:35-37)*

**41** Lamako i ria or ve, “O ri ve Krais ini pamimionga aka i velpol a Devit ikime mo aro ini nepes ranga ve ini a Devit. Na i vava ake o ri vene ake? **42** Eneke Devit isivenga i watu riong ake a Buk Song nge, ma i ri vene:

“‘God i ria ok Pomnga ve:

“Ong meno a lok seik me, a menik sivenga nge anga,

**43** i pavurvur aka aro tho paesu ol lom ngarangre a som thewo,

mo aro lom mong or.”’ *Buk Song 110:1*

**44** Na nge riong inga aken, Devit i apet a Krais ini ‘ia pomnga.’ Na ile riong ake i pathengal it ve, Krais i voth tel lale. Na i vova ake o ri ve Krais ini inga a Devit itevinga na i velpol a rumongaling nge i, e?”

*Jisas i panakal tokokoere nge toko pamirealingare nge a Moses ile patorong ole vothung.*

*(Matiu 23:1-7; Mak 12:38-40)*

**45** Na toko alavusnga o nongpol ile riong na Jisas itheki lel a tokokoe areko o panes i ma i ria or ve, **46** “Thomu o nakalal thomu nge toko pamirealingare nge a Moses ile patorong, eneke o sis ve aro o magon tomo nge oa teunong lolloinga. Na oa sagu rintet aka ve, tokokoere o papomnga or mo o pathokeal or a pathunonga a pen. Na o sis ve aro o men inga nge menonga aka i voth a mukaling aka a Judare ole lotuonga a vel lemire, na nge menong nge aning aolonga, o sis vet aka ve, aro o men nge menonga aka aro o papomnga

or nge. <sup>47</sup> Aveto o pavus vet inga patong seng basbasuere ole ur elonga, na a toko puluanga otheki o sis ve aro o papomnга osivenga mo o oma ole nongong mo i lollo. Naro God ile paomelaling a or nge, aro i aolonga rintet.”

## 21

*Seng basu ako i oma ile sungong a God nge.  
(Mak 12:41-44)*

<sup>1</sup> Lama Jisas i theu thea ma i thopol toko le urnga pom aka o ulu umtun aolonga a umtun le ngoinga nge. <sup>2</sup> Ma i thopol aka patong seng basu aka i ulu ile umtun aini aka i posngaingati. <sup>3</sup> Ma Jisas i ria ve, “Tho ri nunganga a thomu nge, seng basu atike ile sungong i aolonga nge sungong alavusnga. <sup>4</sup> Eneke toko le urngare o ul inga ole umtun pothoingare, aveto patong seng basu atiken ile ur e avele, na i ul vustetpot ile umtun aini atiken. Na ile umtun ol e avele aka aro i olol ia aning nge.”

*Jisas i ritet nge Lotu Tepun a Vel aka a Jerusalem, panen aka aro ngarangre aro o teu i.  
(Matiu 24:1-2; Mak 13:1-2)*

<sup>5</sup> Na tokokoe pelie o ri nge um sivesivengare aka o ari Lotu Tepun a Vel nge, na nge ur sivesivenga areko o pamalmal i nge. Na Jisas i ria ve, <sup>6</sup> “Um areke ru thomu o thopol i ponange, nang e aka panen aro i velpol aka aro e avele aro i ngo ol a imei venen aken. Aro ngarangre aro o tevustetu um alavusnga areken.”

*Jisas i ritet nge matheong pulua ako aro i velpol panen.*

*(Matiu 24:3-14; Mak 13:3-13)*

<sup>7</sup> Lamako tokokoere o nin a Jisas ve, “Pamirealinga, ur aken wong ri nge aro i velpol penva? Na pathepolong kathnga aka aro i velpol tel, e?”

<sup>8</sup> Na Jisas i ria or ve, “Aro thomu o nakalal thomu, aro vene mo o paleklek thomu, eneke toko pulua aro o velpol mo o ri ve or ini tho na o ri ve, ‘Nang le vusonga i velpol lale.’ Aveto o mothong tova o panes or. <sup>9</sup> Na aro ve thomu o nongpol nge punpeeling na matheong o velpol, thomu o mothong tova o kukuk nge, eneke ur areken aro i velpol tel, aveto nang le vusonga ile velpoling rongan.”

<sup>10</sup> Lamako i ria mun a or nge ve, “Na pen epee or pulua aro o pun pel, na tokokoere okei rel rel aro o pun pel. <sup>11</sup> Naro wiring aolonga aro i velpol ake ru a ulue, naro nge rem pulua aro mesi i velpoltun or, na mousong mun. Na a sepsa lemi aro thomu o thopol ur aolonga pelie aka ranga ve ini pathepolong pelie aka aro i oma thomu mo o ngeip nge.

<sup>12</sup> Na nge nang areken aro ur areken i velpol rongan, aro lomu ngarangre aro o pakerenga thomu na o rere thomu mo o pamit thomu nge riong a Judare ole lotuonga a vel lemire. Naro o paeso thomu a mang a midenga lemi, naro o pamit thomu nge riong, a mukalingare na nepesre otheki, eneke thomu ini lek. <sup>13</sup> Na aken ini so aka aro thomu o panongpol nge Panongpolong Sivenga a or nge. <sup>14</sup> Na nge wop lemi aka o pamit thomu nge riong rongan, o mothong

tova lomumu rit nge riong ako aro o olal i a or nge. <sup>15</sup> Eneke aro tho ripot a womu, naro tho sungu mun mire aolonga a thomu nge. Naro areko olemi otun thomu, aro o pavurvur aro o kelelal na o paruru lek riong ako tho sungu i a thomu nge, kene avele. <sup>16</sup> Naro titomomu na ninomuere na titeumuere tomo nge lomungare na thongongomuere, or mun ako aro o sungu thomu a ngarangre omeni. Naro o pun rin omu pelie. <sup>17</sup> Na tokokoere alavusnga aro oni silalpot thomu, eneke thomu ini lek. <sup>18</sup> Aveto omu e avele aro i penthal. <sup>19</sup> Naro thomu o mit engeng nge lomu lemioong, naro thomu o el mimiong ako aro ile vusonga avele.”

*Jisas i ri nge a Jerusalem ile kerengaing.  
(Matiu 24:15-21; Mak 13:14-19)*

<sup>20</sup> Na Jisas i ria mun ve, “Aro ve thomu o thopol tova punongare o mit kalalual a Jerusalem, aken i mirenga ve, i toth ako aro o pakerenga a Jerusalem. <sup>21</sup> Lama nge nang ako o thopol ur aken, i sivenga nge areko ole a Judia aro o lo a tete la. Na tokokoe areko o voth a Jerusalem aro o lo lelpot rem pomnga aken. Na areko o voth a rem pomnga kime, aro o eso a lemi avele. <sup>22</sup> Na nge nang areken aro God i paomelal toko ulue angare mo ako i panunganga ile riong alavusnga ako i voth a ile erere lemi. <sup>23</sup> Patong seng areko oopo na seng areko o mane povothvothre, eneke panen matheong aolonga aro i velpol ake ru a ulue. Na God ile lemi klingong aro i vlestun toko na seng areken. <sup>24</sup> Naro ngarangre aro o es mo o pun rin pelie nge peang, na pelie aro o woltet

or mo o voth ol ini loomere a rumrem elonga ake ru a ulue. Naro tokokoe areko or ini Judare avele aro o tepetuntun a Jerusalem. Naro i voth a osa thewo i pavurvur nge nang ako God i ateal i lale.”

*Jisas i ritet nge nang ako Toko Pomnga Itun aro i lo wereru nge me.*

(Matiu 24:29-31; Mak 13:24-27)

<sup>25</sup> Na Jisas i ria mun vene, “Panen aro paatealing pelie aro i velpol nge nang theki, na nge ngov, na nge sivemitre. Na ake ru a ulue, toko pulua aro olemi kerere rintet. Naro o nongpol rua le punong aolonga ma olemi pelek pelek nge na o ngeip rintet nge. <sup>26</sup> Aro toko na seng pulua aro o thopol ur aka i seltunu ulue alavusnga, mako o ngeip rintet nge, mako o matu ma o rin penges nge, eneke sawirwir sivemitre aka ro a sepsa.

<sup>27</sup> Naro nge nang aken aro toko na sengre aro o thopol a Toko Pomnga Itun aka aro i espot tomou nge songen ake ro a sepsa me tomo nge ile engenging aolonga na ile tolilisong. <sup>28</sup> Na nge nang aka aro ur areken i patea nge, aro thomu o mit engeng na o thea la a sepsa, eneke i toth aka aro Toko Pomnga i velpol mo aro i el werer thomu.”

*Pamirealing nge pupos aka i pol.*

(Matiu 24:32-35; Mak 13:28-31)

<sup>29</sup> Mako Jisas i ria or nge riong agelalnga. Na i ria ve, “Thomu o thopolrum pupos ake na won elonga, <sup>30</sup> na aro ve thomu o thopol aka ve, pupos aken i pol, lomumu mire aka ve, nang po aro i velpol. <sup>31</sup> Ranga ve aka, aro ve thomu o thopol ur

areken ile velpoling, aro lomumu mire ako ve, i toth aka aro God ile menong e nepes aro i velpol.

<sup>32</sup> “Na tho ri nunganga a thomu nge, Judare pelie aro rongan o voth, naro ur areken aro i velpol. <sup>33</sup> Sepsa tomo nge ulue aro o vus, aveto lek riong aro i penthal avele.”

*Jisas i tor ole mo o nakalal or.*

<sup>34</sup> Jisas i ria or ve, “Thomu o nakalal thomu na o mothong tova lomumu es nge thinong na aning na vothung ulue anga, aro vene mo Toko Pomnga Itun aro i pakuktun thomu nge ile velpoling ranga ve ini susua aka i pakuktun silangre tinga. <sup>35</sup> Eneke ile velpoling aro i velpoltun toko na seng alavusnga ake ru a ulue. <sup>36</sup> Na nge nang elonga aro thomu o thealal. Naro thomu o nong engeng inga a God nge mo i sung ile engenging a thomu nge, mo aro thomu o lo rispot nge ur areko aro i velpol. Na o nong mun ve aro thomu o mit engeng nge nang aka aro thomu o mit nge riong, a Toko Pomnga Itun itheki.”

<sup>37</sup> Nge nang elonga Jisas i pamireal toko na sengre a Lotu Tepun a Vel a lok lemi, aveto nge pemliknga i es ma i nokolkol a tete aka o apet i ve ini a Oliv. <sup>38</sup> Na rulpoalal elonga toko alavusnga o es a Lotu Tepun a Vel a lok lemi mo aro o nongpol ile riong.

**Jisas i el sisisong na i rin lama i  
los werera mun**

*Judas i sungu a Jisas a Judare ole mukalingare omeni.*

*(Matiu 26:2-5; Mak 14:1-2, 10-11)*

<sup>1</sup> Na toth nge Judare oa Punseleainga a Aning ako o an bret ako yis ako ini pawimpotnga i voth nge avele, aka o apet i ve ini “Pasova”. <sup>2</sup> Na pris kimangare tomo e pamirealingare nge a Moses ile patorong, o ri ve aro o so rin a Jisas, aveto o ngange nge tokokoere, mako o kath sovengalo aka aro o so rin kine a Jisas nge. <sup>3</sup> Lama Satan i rero a Judas Iskariot ilemi. Na ini a Jisas ile wainlanga omole nge ile wainlanga or mule pa omole pothoi or aini aken. <sup>4</sup> Mako Judas i es a pris kimangare tomo mun nge Lotu Tepun a Vel a mit tetalongare ole mukalingare, mo i leng leng tomo nge or nge sovengalo kathnga aka aro i sungu a Jisas a omeni nge. <sup>5</sup> Ma o nongpol ile riong ma olemi sivenga nge. Ma o ri nunganga a i nge mo aro o sungtun i nge umtun. <sup>6</sup> Mako Judas i ri ve, “I sivenga.” Mako i kath sovengalo aka aro i sung kine a Jisas a mukalingare omeni.

*Jisas ile wainlanga or aini o monsi nge aning aka o apet i ve ini Pasova.*

*(Matiu 26:17-19; Mak 14:12-16)*

<sup>7</sup> Nge aning aolonga aka Judare o an bret ako pawimpotnga i voth nge avele, nang i velpol aka aro o so rin rin sipsipre nge, mo o oma oa Punseleainga a Aning nge. <sup>8</sup> Mako Jisas i pakepot a Pita ome a Jon ma i ria or ve, “O es mo o monsi Punseleainga a Aning aka aro te an i.”

<sup>9</sup> Ma o nina i ve, “Aro them monsi aning aken a kath?”

<sup>10</sup> Ma i olal ole riong ve, “Aro thomu paini o eso a rem pomnga, na toko omole ako i potun thei pokin aolonga, aro i sangpolo thomu paini a so. Mo thomu o paneso i a vel ako i eso nge. <sup>11</sup> Mo o ria vel tokoninga ve, ‘Ler pamirealinga i nin ve: Wop kathnga aka aro them e lek wainlangaere, them an Punseleainga a Aning nge?’ <sup>12</sup> Aro i pathengal thomu paini nge vel lemi ronganga aka i aolonga aka menongare i ngo nge mo thomu o monsi aning nge wop aken.”

<sup>13</sup> Mako or paini o es, mako o thopol ur alavusnga ranga ve aka Jisas i ri or paini nge. Mako o monsi Punseleainga a Aning nge.

*Jisas i sung aning a ile wainlangaere nge ma i ritet or nge a God ile riong kinnga ponganga.*

(Matiu 26:21-29; Mak 14:18-25; Jon 13:21-30; 1 Korin 11:23-25)

<sup>14</sup> Na nang i sivluk, mako Jisas i men tomo ol nge ile pakekere nge aning. <sup>15</sup> Ma i ria or ve, “Thosis rintet ve aro tho an Punseleainga a Aning ake tomo nge thomu, lamoko aro tho el ol sisisong. <sup>16</sup> Na tho ria thomu, aro tho an Punseleainga a Aning relnga e avele i pavurvur aka aro God ile menong e nepes i velpol a ulue.”

<sup>17</sup> Lama Jisas i ela thinonga aka vain i mon nge, ma i ri sivengaing a God nge lama i ria ve, “Ela thinonga ake mo thomu alavusnga o thin i. <sup>18</sup> Na tho ria thomu, aro tho thin ol vain avele i pavurvur aka aro God ile menong e nepes i velpol.”

<sup>19</sup> Lama i ela bret ma i ri sivengaing a God nge, lamako i reku i ma i sungu i a or nge, ma i ria

or nge ve, “Ake ini sivangek ako aro tho sungu i a God nge, ranga ve ini sungong ako aro i opoal thomu. Panen tova aro thomu o an Punseleainga a Aning, aro lomumu rum tho.”

<sup>20</sup> Ma o an ma i vus, mako i sung mun thinong a or nge ma i ria mun or ve, “Na God i kin ile riong ponganga tomo nge tokokoere, na ile riong kinnga ponganga aro i patea tova ok mla i palalas. Na vain ake kene ini ok mla ako aro i palalas mo aro i opoal thomu. <sup>21</sup> Aveto o thopol toko ake i an tomo e tho, aro i teltun tho a ngarangre omeni! <sup>22</sup> Toko Pomnga Itun aro i rin ranga ve aka God ilemi nge lale, aveto patong toko aka i teltun ia a ngarangre omeni.” <sup>23</sup> Lama o nin pel osivenga ve, toko kathnga a or nge aro i oma aken?

### *Anga aro i mukal?*

(Matiu 20:25-28; Mak 10:42-45)

<sup>24</sup> Ma Jisas ile wainlangaere o ri pel nge toko kathnga a or nge aro tokokoere o ri ve i pomnga nge or. <sup>25</sup> Na Jisas i ria or ve, “Na nepesre aka or ini Judare avele o panisisis ole tokokoere mo aro o nongal ole riong, aveto o ri ve aka aro ole tokokoere o apet or ini othanga. <sup>26</sup> Aveto aro i vene aken a thomu nge avele. Aro omu pomnga aro i velpol ranga ve ini toko polpolnga a thomu nge. Na omu mukalinga aro i velpol ranga ve ini toko umonga. <sup>27</sup> Eneke tho oma venen aken nge thomu. Na lomumu rum tel, anga i pomnga? Toko aka i men nge aning eve toko aka i sung aning a i nge? Ini toko aka i men nge aning. Aveto tho voth a thomu nge ranga ve tho ini toko umonga. <sup>28</sup> Na thomu ini areko o mit tomo nge

tho nge nang areko tho el matheong nge lale.  
<sup>29</sup> Na ranga ve aka Vovo i ateal tho ini nepes, aro tho ateal mun thomu ini nepesre. <sup>30</sup> Aro tho velpol ini nepes naro thomu o an na o thin tomo nge tho. Naro thomu o men nge nepes a menonga mo aro thomu o theal Israelre ole net or mule pa omole pothoi or aini.”

*Jisas i ritet nge a Pita aka aro i kelelal i.*  
*(Matiu 26:33-35; Mak 14:29-31; Jon 13:37-38)*

<sup>31</sup> Na Jisas i ria Pita ve, “Saimon, Saimon, nongpol, Satan i sis ve aro i tongporum thomu mo i thopolrum thomu, anga aro i mit engeng na anga i mit engeng avele. Na God i ria Satan ve, ‘La, tongporum or.’ <sup>32</sup> Aveto Saimon, tho nong nge a God mo aro lom lemioong aro i matu avele. Na nge nang aka aro ong eksing werer a tho nge me, aro wong paengeng thongongomre!”

<sup>33</sup> Na Pita i olal ile riong ve, “Toko Pomnga, tho pavurvur aka aro tho es tomo nge wong aka a mang a midenga lemi na tho pavurvur mun aka aro tho rin tomo nge wong.”

<sup>34</sup> Na Jisas i ria i ve, “Tho ria ong a Pita, pan pemlik vareo aro i tang rongan naro ong ri pa or me ve lomum mire nge tho avele.”

*Jisas i panakal ile wainlangaere.*

<sup>35</sup> Lama Jisas i ria ile wainlangaere ve, “Nge wop lemi aka nomenga tho pake thomu mo o panongpol nge Panongpolong Sivenga ma thomu o el tomo umtun le ngoinga, na alal, na esonga, kene avele. Na nge wop lemi aken thomu o oror nge ur pelie?”

Na o olal ile riong ve, “Avele, them oror nge ur e avele.”

<sup>36</sup> Ma Jisas i ri ve, “Aveto ponange, aro ve toko e ile umtun le ngoinga eve ile alal i voth, aro i el tomo i. Na aro ve toko e ile bainat avele, aro i ela ia teunong mo aro i tepolal i nge bainat omole.

<sup>37</sup> Eneke God ile erere i ri vene,

‘Tokokoere o ri ve  
ini toko kerenga

ako i avsa patorong.’ *Aisaia 53:12*

Na riong ake i ri nge tho, naro i velpol nun-ganga a tho nge. Eneke God ile erere alavusnga ako i ri nge tho, aro i velpol nunganga.”

<sup>38</sup> Na ile wainlangaere o ria i ve, “Toko Pomnga, thepol, bainat or aini ke.”

Ma i olal ole riong ve, “Aken i pavurvur.”

*Jisas i nong a tete a Oliv.*

*(Matiu 26:36-46; Mak 14:32-42)*

<sup>39</sup> Ma Jisas i lospot a rem pomnga ma i es a tete a Oliv, ake ini ile vothung vet ako i es nge tete aken, mako ile wainlangaere o panes i. <sup>40</sup> Ma o velpola nge wop aken, ma i ria or ve, “Aro thomu o nong mo o mothong tova o matu nge tongporumong.”

<sup>41</sup> Lama i los lelpot nge or, na ile melangaing a or nge i pavurvur nge um aka ranga ve toko i ul i. Ma i koru ieve ma i nong. <sup>42</sup> Ma i ria ve, “Vovo, tova ve lomum ve aro ong oma i, aro eltetpot matheong ake a tho nge, aveto mothong tova panes lemik, aro panes inga aka ini lomum.” <sup>43</sup> Ma ensel omole aka i esu a Pen a Urvet me, ma i velpol a i nge, ma i paengeng i. <sup>44</sup> Ma Jisas i rov matheong aolonga ma i nong engeng rintet na ia inin aka i velpol a i nge, ma i lelu a ulue ranga ve ini mla.

<sup>45</sup> Ma i nong ma i vus lama i mita ma i es werer a ile wainlangaere nge, ma i thepol aka o nokolkol, eneke lemi kerereong i omelal or. <sup>46</sup> Ma i ria or ve, “I vava ake thomu o nokolkol kek inga, e? Aro thomu o losa mo o nong mo aro thomu o matu nge tongporumong avele.”

*Judas i sungu a Jisas a ngarangre omeni.*  
(Matiu 26:47-56; Mak 14:43-50; Jon 18:3-11)

<sup>47</sup> Na Jisas rongan i ri na pulua aolonga aka o velpol, ma ina Judas i mukal ole, na ini a Jisas ile wainlanga omole nge ile wainlanga or mule pa omole pothoi or aini. Na i es a Jisas nge ma i angongoal i. <sup>48</sup> Ma Jisas i ria ve, “Judas, i vava ake wong teltun Toko Pomnga Itun tomo nge angongoaling, e?”

<sup>49</sup> Ma Jisas ile wainlangaere aka o voth tomo nge i, o thopol ur aken aka aro i velpol, ma o nin a Jisas ve, “Toko Pomnga, aro them pun or nge lemem bainat areke?” <sup>50</sup> Ma oa omole aka i sorotetpot Prisre oa Pomnga ile umonga itelnga aka a imeni sivenga nge anga.

<sup>51</sup> Aveto Jisas i ria ve, “Thomu o mothong tova o oma ol venen aken.” Ma i vugiro inga toko aken itelnga, nako i sivenga werer.

<sup>52</sup> Lama Jisas i ria pris kimangare, na Lotu Tepun a Vel theal tetalngare, na Judare oa pom-pomere aka o es me mo o rere i, ma i ria or ve, “Ava thomu o es tomo nge bainat na tongtong, ava thomu o rivenga tho ini toko multhanga? <sup>53</sup> Na evelelnga tho voth tomo nge thomu a Lotu Tepun a Vel a lok lemi, na thomu o rere vet tho avele. Aveto ponange ini nang aka ini lomu, aka aro o

oma omaing ake, eneke mideng ile engenging i mukal ol lale.”

*Pita i ria ve, ilemi mire nge a Jisas avele.*

(Matiu 26:69-75; Mak 14:66-72; Jon 18:16-18, 25-27)

<sup>54</sup> Ma o rere a Jisas ma o paeso i a Prisre oa Pomnga ile vel, ma Pita i o ieve nge or. <sup>55</sup> Na won sesenga e ako o papola i a lok lemi nge wop ako o pathun nge. Ma Pita i supo tomo mun nge tokokoe areko o men kalalual won sesenga aken. <sup>56</sup> Ma seng ovote ako ini umonga i thepol i ako ru i men ako ru a won sesenga nge, ma i the rinrin i na i ri ve, “Ine toko mun ake i voth tomo nge a Jisas!”

<sup>57</sup> Aveto Pita i kelelal i ma i ria seng aken ve, “Lemik mire nge toko aken avele.”

<sup>58</sup> Ma palolou avele lama toko e ako i thepol a Pita ma i ri ve, “Ae! Wong mun aken, ong ini a Jisas ithanga.”

Aveto Pita i olal ile riong ve, “Tho ini ilenga avele.”

<sup>59</sup> Lama palolou mun tie, nako toko mun e ako i ria viringa ve, “Ini ur kelelalonga avele, toko ake i voth tomo mun nge a Jisas, eneke i mun ake ini Galili anga!”

<sup>60</sup> Aveto Pita i olal ile riong ve, “Lemik mire nge riong aken ru wong ri nge, kene avele.” Na rongan i ri, nako vareo i tang. <sup>61</sup> Na Toko Pomnga i eksinga ma i the vengveng a Pita nge, ma Pita ilemi rum werera mun riong ako Toko Pomnga i ria i nge ve, “Nge pemliknга ake, vareo aro i tang rongan, naro wong ria tel pa or me ve lomum

mire nge tho avele.” <sup>62</sup> Ma Pita i espot a lalanga la ma ilemi kerere rintet ma i tang.

*Tokokoere o ri sililal a Jisas na o siso i.  
(Matiu 26:67-68; Mak 14:65; Jon 18:22-23)*

<sup>63</sup> Na tokokoe areko o rere a Jisas, o ri sililal i na o siso i. <sup>64</sup> Na o kin sopal itheki na o nina i ve, “Aro ve ong ini a God ile riong elnga e, aro ria them, toko anga ake i siso wong, e?” <sup>65</sup> Na o oma riong kerenga puluanga nge i ako i paruru i.

*Jisas i mit nge riong a lotu a mukalingare otheki.*

*(Matiu 26:63-66; Mak 14:61-63; Jon 18:19-21)*

<sup>66</sup> Ma erangu ol na Judare oa pompomere na pris kimangare na pamirealingare nge a Moses ile patorong, o pathunu lamako o wol ol a Jisas mo i mit nge riong a otheki. <sup>67</sup> Ma o ria i ve, “Wong ria them, Wong ini toko aka God i ateal ong ve aro ong el werer ile tokokoere?”

Ma i olal ole riong ve, “Aro ve tho ria thomu, aro lomumuo nge lek riong avele. <sup>68</sup> Na aro ve tho nin thomu nge ninong e, aro thomu o olal mun i avele. <sup>69</sup> Aveto i patea ponange naro i mulal panen, Toko Pomnga Itun aro i meno a God aka ile engenging i aolonga rintet, imeni sivenga nge anga.”

<sup>70</sup> Ma or alavusnga o ria i ve, “Na wong re ake ini a God Itun?”

Ma i ria or ve, “I re aken ranga ve aka thomu o ri lale.”

<sup>71</sup> Ma o ri ve, “Na i pavurvur ol aro te leng ol tokokoe pelie mo o pamilempot toko ake ia theki pelie avele, eneke riong ake te nongpol i, i velpol vengveng a isivenga iwo.”

## 23

*Jisas i mit nge riong a Pailat itheki.  
(Matiu 27:11-14; Mak 15:2-5; Jon 18:29-37)*

<sup>1</sup> Ma ine mukalinga alavusnga areken o losa ma o pasong a Jisas ma o pamit i nge riong a Pailat itheki. <sup>2</sup> Ma o patea ol iteltunnga, ma o ri ve, “Them thepol toko ake i paleklek lemem tokokoere nge vothung pulua. Na i rial or nge umtun ulnga a nepes a Sisar nge, na i ri ve i ini nepes omole ako God i ategal i ve aro i el werer ile tokokoere.”

<sup>3</sup> Na Pailat i nin a Jisas ve, “Wong ini Judare ole nepes, e?”

Ma Jisas i olal ile riong ve, “I venen re aken ong ri lale.”

<sup>4</sup> Lama Pailat i ria pris kimangare na pulua alavusnga aken ve, “Tho thepol vothung kerenga e avele ako toko ake i oma i, ako aro tho paomelal i nge.”

<sup>5</sup> Aveto o ri viringa mun ve, “Toko ake i pavur-pola tokokoere olemi nge ile pamirealing ako a pen alavusnga a Judia. I patea a Galili na i espot e pen ake.”

*Jisas i mit nge riong a Herot itheki.*

<sup>6</sup> Na Pailat i nongpol venen aken ma i nina or ve, “Toko ake ini Galili anga?” <sup>7</sup> Na i nongpol ako Jisas ile rem tepun i voth a epee ako Herot i theal i, mako i pake i a Herot nge, eneke Herot i voth mun a Jerusalem nge wop lemi aken.

<sup>8</sup> Ma Herot i thepol ako Jisas i velpol a i nge, ma ilemi sivenga rintet, eneke i nongpola Jisas ile kimaing. Na nge nang pulua i sis ve i thopol a

Jisas na ia pun ako ve, i thopol pathepolong pelie ako aro Jisas i oma i. <sup>9</sup> Mako Herot i nin a Jisas nge ninong pulua, aveto Jisas i olal vet riong tie avele. <sup>10</sup> Na pris kimangare tomo e toko pamirealingare nge a Moses ile patorong o tipot i a mukaling ma o ripot ia theki puluanga aka olemi otun i nge. <sup>11</sup> Na Herot tomo nge ile punongare o ri sililal a Jisas ma o oma riong aka i paruru i. Lamako o asisaltun i, mako o pateunu i nge seltun a urvet aka ini nepes a malmaling, ma o pake werer i a Pailat nge la. <sup>12</sup> Ma nge nang aken Herot ome a Pailat othanga ol pel. Na nomenga or paini ole ngarang pel.

*Pailat i ritet nge aka aro o pun rin a Jisas.*

*(Matiu 27:15-26; Mak 15:6-15; Jon 18:39–19:16)*

<sup>13</sup> Na Pailat i leng veliloalo pris kimangare tomo nge Judare oa pompomere na tokokoere. <sup>14</sup> Ma i ria or ve, “Thomu o wol toko ake a tho nge me na thomu o ri ve i pavelpol punong tomo e gavman, na thomu o mit a thekik na tho nongpol lomu riong aka lomumu otun i nge, aveto tho thopol i aka, e avele i nunganga. <sup>15</sup> Na Herot mun i thopol ur e avele aka i kerenga a i nge, eneke i pake werer i a it nge me. Na toko ake i oma ur e avele aka aro te pun rin i nge. <sup>16</sup> Mako aro tho ria or mo aro o so litlit i lamo o modop i mo i vthopot.” <sup>17</sup> [Na nge Punseleainga a Aning nge tovu po elonga tokokoere osivenga aro o apetpot toko e aka i voth a mang a midenga lemi mo aro Pailat i sungpot i mo i vthopot nge kinong.]

<sup>18</sup> Na pulua aken okei omolepot na o presa viringga ve, “Pun rin i! Na sungpot a Barabas

a them nge me.” <sup>19</sup> Na Barabas ini toko ako nomenga o paeso i a mang a midenga, eneke i supo tomo nge areko o pavurpolo punong ako a rem pomnga ma rinong i velpol nge.

<sup>20</sup> Na Pailat i sis ve aro i modop a Jisas mo i vthopot. Mako i lengpot mun a pulua aolonga aken nge. <sup>21</sup> Aveto o pres werer mun ve, “Pamona i a won ngoronga nge, pamona i a won ngoronga nge.”

<sup>22</sup> Na Pailat i ria or nge pa or menga ol ve, “Aveto vothung kerenga kathnga aka i oma i? Tho thopol vothung e avele aka i kerenga aka aro te so rin i nge! Aro tho ria or mo aro o so litlit i lamo o modop i mo i vthopot.”

<sup>23-24</sup> Aveto o mosal inga presing ve aro o pamona a Jisas a won ngoronga nge. Makola ole presing i oma a Pailat ma i panes olemi. <sup>25</sup> Na i modoppot toko aka osivenga o apetpot i aka nomenga o paeso i a mang a midenga, eneke i supo tomo nge punongare aka o pavelpol rinong. Na i sung a Jisas a punongare omeni ranga ve aka o ri nge.

*Rom a punongare o pamona a Jisas a won ngoronga nge.*

*(Matiu 27:33-44; Mak 15:22-32; Jon 19:17-24)*

<sup>26</sup> Na punongare o wolpot a Jisas la na o eses a sovengalo la ma o sangpolo toko omole aka iiion a Saimon na ini toko aka ile a Sairini na ia sele ometare lale, na i es alpo a rem pomnga. Na o rereu i ma o papotunu i nge a Jisas ia won ngoronga, ma i rumongal nge a Jisas. <sup>27</sup> Na pulua aolonga o panes i, na oa pelie ini sangre na o

wal na o tang nge a Jisas. <sup>28</sup> Na Jisas itheki lel werer a or nge na i ri ve, “Seng Jerusalem angare o mothong tova o tang nge tho, aveto aro o tang nge sivengomu tomo nge tutumuere, <sup>29</sup> eneke nang e ako aro i velpol aka aro tokokoere o ri ve, ‘Sapase seng areko otun e avele.’ <sup>30</sup> Na nge wop lemi aken tokokoere aro o ria tetere ve, ‘Mata a them nge.’ Naro o ria pengenere ve, ‘Tetun them.’ \* <sup>31</sup> Eneke Romre olemi mire aka tho oma vothung kerenga e avele na thomu o thopol vet paomelaling aka o oma i a tho nge, na anga aro i thopol ol paomelaling aolonga aka aro o sungu i nge thomu aka o oma vothung kerengare?”

<sup>32</sup> Na o wol mun toko kerenga or aini aka o avsa patorong, na o wol or mo aro o pun rin or tomo nge a Jisas. <sup>33</sup> Na o velpol a pen e aka o apet i ve ini “Toko po a kikil.” Mako o pamona ol a Jisas a won ngoronga nge. Na o pamona mun toko kerenga or aini aken. Na omole i mon a Jisas imeni sivenga nge anga, na omole i mon a Jisas imeni kerenga nge anga. <sup>34</sup> Ma Jisas i ri ve, “Vovo, lomum simikal ole vothung ake, eneke olemi mire nge ur aka o oma i, kene avele.” Na punongare o asisal nge satu mo aro i pathengal oa kathnga aken aro i el tel a Jisas ia teunong epee.

<sup>35</sup> Na toko na sengre o mit ma o the, aveto Judare oa pompomere o ri sililal i ve, “I pamimi pelie na aro ve ini toko aka God i ategal i mo aro i el werer ile tokokoere, aro i pamimi werer vet isivenga.”

<sup>36</sup> Na punonga munre o pasililalo itheki, mako

---

\* **23:30:** Hosea 10:8

o sung mun vain welnga a i nge,<sup>37</sup> na o ria ve, “Pamimi sivengom tova ve wong ini Judare ole nepes.”

<sup>38</sup> Na roro a ipounga o wat riong† epee ako ve,  
AKE INI JUDARE OLE NEPES.

<sup>39</sup> Na toko kerenga omole ako i mon totho a i nge, i ri riong kerenga a i nge ako i paruru i ma i ri ve, “Ava wong ini toko aka God i ateal wong mo aro wong el werer ile tokokoere, e? Na pamimi sivengom na them paini mun!”

<sup>40</sup> Aveto ia aininga i vol i, ma i ria i ve, “Wong papomnga a God avele? It alame te el inga paomelaling ako i vur e pel inga,<sup>41</sup> na it aini te el paomelaling ako i pavurvur nge omaing kerenga aka te oma i, aveto i kene, i oma omaing kerenga e avele.”

<sup>42</sup> Ma i ria Jisas ve, “Na aro lomum rum tho tova ve ong velpol ini nepes.”

<sup>43</sup> Ma Jisas i ria i ve, “Tho ri nunganga a wong nge, ponange aro wong voth tomo e tho ake ro a Pen a Urvet.”

*Jisas i rin a won ngoronga nge.  
(Matiu 27:45-56; Mak 15:33-41)*

<sup>44</sup> Na nge penang lopat, mideng aolonga i velpol ma i seltun pen elonga, i pavurvur aka la nang meta i el or me nge penie. <sup>45</sup> Na nang i to ol avele na lavlav velvelnga aka i mon rupalu a Lotu Tepun a Vel lemi pat, i minra ma epee ainiu. <sup>46</sup> Na

---

† **23:38:** Romre ole vothung i vene, aro ve o pun rin toko a won ngoronga nge, aro o wat vothung kerenga aka toko aken i oma i, na o sotuna i a ia won ngoronga mo aro tokokoere olemi mire nge vothung aka toko aken i oma i ma i rin nge.

Jisas i wala viringa ma i ri ve, “Vovo, onik i voth ol a menum nge.” Ma i ri venen aken lamako i rin.

<sup>47</sup> Na punongare ole mukalinga i thopol ur ako i velpol ma i risea a God nge ma i ri ve, “I nunganga, toko ake ini toko sivenga.” <sup>48</sup> Na tokokoe alavusnga areko o pathun mo o the nge ur aken, o thopol ur aken i velpol ma o lo werer a ole vel omole omole, ma o so opakei, eneke olemi kerere rintet. <sup>49</sup> Na tokokoe areko olemi mire nge a Jisas tomo nge seng areko o panes i a Galili me, or mun ako o mit mun mela tie na o thopol ur areko i velpol.

*O tetun ol a Jisas.*

(Matiu 27:57-61; Mak 15:42-47; Jon 19:38-42)

<sup>50-51</sup> Na toko omole ako i voth ma iion a Josep ma ile a Arimatea aka ini Judare ole rem. Na ini toko sivenga aka ile vothung i vengveng. Na i men total a God ile menong e nepes, ile velpoling. Na ini a Judare oa pomnga mun, aveto ilemi i vur e pel tomo nge areko o teltun a Jisas avele. <sup>52</sup> Na i es a Pailat nge na i nongpot a Jisas ini peti. <sup>53</sup> Lamako i osu a Jisas ini peti ma i soa i nge seltun na i pango i a vuvepun aka o monsi tonga nomenga a pilpeli tepun. Na o pangoo vung e nge rongan. <sup>54</sup> Na ini nang monsinga aka nge nang rialonga na nang rialonga i toth ol aka aro i patea ol.

<sup>55</sup> Na seng areko o panes a Jisas a Galili me, o panes a Josep na o thopol a Jisas ini peti aka o pangoo i a vuvepun aken. <sup>56</sup> Lamako o lo werer a ole pen ma o monsi nge ur una vronga aka aro o

taul a Jisas ini peti nge. Aveto nge nang rialonga o panes a Moses ile patorong na o thau or nge.

## 24

*Jisas i los werera nge rinong.*

(Matiu 28:1-8; Mak 16:1-8; Jon 20:1-8)

<sup>1</sup> Na nge nang mukalinga ako nge rulpoalal, seng areken o es a ia vuvepun aken na o es tomo ur una vronga ako o monsi i lale. <sup>2</sup> Ma o velpol ma o thopol um aolonga aka o singlelpot i a vol thekia lale. <sup>3</sup> Mako o koro a vuvepun, aveto o thopol a Jisas ini peti avele. <sup>4</sup> Na o mit ma olemi pelekpol nge. Na a ur e avele na toko or aini aka ole teunong i tolilis rintet, o mit totho a or nge. <sup>5</sup> Ma sengre o ngeip rintet ma opo tiru a ulue na toko or aini aken o ria or nge ve, “Na i vava ake thomu o or toko aka i mimi, ake ru a vuvepun, e? <sup>6</sup> I voth ake avele, i los werera lale. Ma lomumu rum ile riong aka i ria thomu nge, aka a Galili avele, <sup>7</sup> aka i ri ve, ‘Aro o sungu Toko Pomnga Itun a toko kerengare omeni naro o pamona i a won ngoronga nge, na nge nang or me i vus naro i los werera mun.’ ” <sup>8</sup> Na sengre olemi rum a Jisas ile riong.

<sup>9</sup> Na o plos lelpot vuvepun aken na o lo werer na o ritet a Jisas ile wainlanga or mule pa omole pothoi omole na tokokoere, nge ur alavusnga aka i velpol a or nge. <sup>10</sup> Na seng areken or ini a Maria Makdala anga, na Joana, na Maria aka ini a Jems inina, tomo mun nge seng pelie, aka o ritet ur alavusnga aken aka a pakekere nge. <sup>11</sup> Aveto pakekere olemi ve ole riong aken ini ur

polpolnga, na olemio ol nge ole riong aken avele. <sup>12</sup> Aveto Pita i plosa ma i tho a vuvepun aken ma i lotoru ma i theo na i thopol inga seltun ako o soal a Jisas ini peti nge, aveto i thopol mun ur e avele. Lama i lo werer a ile vel ma ilemi pelekpol nge ur ako i velpol.

*Jisas ile wainlanga or aini o thopol a Jisas a Emeus a Sovengalo.*

*(Mak 16:12-13)*

<sup>13</sup> Na nge nang aken Jisas ile wainlanga or aini o es a rem ako iion a Emeus ako i voth mela tie a Jerusalem na i pavurvur nge kilomita or mule pa omole pothoi omole. <sup>14</sup> Na o ri pel nge ur alavusnga aka i velpol. <sup>15</sup> Ma o es na o ri pel nge osivenga na Jisas i velpol a or nge ma i es tomo nge or. <sup>16</sup> Aveto o ate i avele.

<sup>17</sup> Ma Jisas i ria or paini ve, “Na thomu o es na thomu paini o ri pel nge uneke?”

Ma o mitu ma otheki a tanging. <sup>18</sup> Na oa omole aka iion a Kliopas na i nina Jisas ve, “Ava wong ini long aka wong voth a Jerusalem na engom inga ake lomum mire nge ur areko i velpol nge nang areko o vus lale, kene avele.”

<sup>19</sup> Na Jisas i nina i ve, “Ur nekere?”

Na o ria i ve, “Ur areko i velpol nge a Jisas aka ini Nasaret anga, aka ini a God ile riong elnga, na ile riong na ile omaing i engeng rintet aka a God itheki tomo mun a tokokoere otheki. <sup>20</sup> Na ler pris kimangare na ar pompomere o sungu i a Romre omeni mo aro i mit nge riong aka aro i rin nge, na o pamona i a won ngoronga nge. <sup>21</sup> Na them the nge i aka aro i ol werer Israelre a ole ngarangre

nge. Na e mun e ako ponange ini nang menga ako ur areken i velpol nge. <sup>22</sup> Na seng pelie ako a them nge, o palemi vurpol them nge ur areko o thopol i ako rulpoaal ponange o es a ia vuvepun, <sup>23</sup> aveto o thopol ini peti avele. Na o lo werer a them nge me, ma o ri ve o thopol a God ile enselre ako o ria or ve, ponange i mimi werera lale. <sup>24</sup> Na tokokoe pelie ako a them nge, o es mun a ia vuvepun la na o thopol i ma i ranga ve aka sengre o ri nge. Aveto ini ol inga aka o thopol ol a Jisas ol avele.”

<sup>25</sup> Lama Jisas i ria or ve, “Lomu mire i oror, na lomu lemioong i el viri ur areko God ile riong elngare o ri nge, kene avele. <sup>26</sup> Na God i ri ve toko aka i ategal i mo aro i el werer ile tokokoere, aro i el tel matheong lamo i el ol engengeng aolonga a God ilo sei.” <sup>27</sup> Na Jisas i panine mun or paini olemi nge riong alavusnga aka i ri nge isivenga, na i patea nge a God ile riong aka Moses i wat i na i mulal nge a God ile riong aka ile riong elngare o wat i.

<sup>28</sup> Na o es totho a rebo aka o es nge, aveto Jisas i oma ranga ve aka aro i es alpo, <sup>29</sup> aveto or paini o rialalu i ma o ri ve, “Aro ong voth tomo tel nge them, eneke penie rintet lale.” Mako i nongal inga or paini okei ma i voth tomo e or.

<sup>30</sup> Ma i menu mo i an tomo nge or, mako i ela bret na i ri sivengaing a God nge na i reku i lamako i sungu i a or paini nge. <sup>31</sup> Mako olemi rumnga i thep na o ate ol i, aveto i penthal rusa a olo sei. <sup>32</sup> Ma o ria pel nge osivenga ve, “I nunganga, ile riong aka i panine a God ile riong a it nge, a sovengalo, i ranga ve ini won sesenga.”

<sup>33</sup> Na a ur e avele, na o plosa ma o es werer a Jerusalem la. Na o thopol Jisas ile wainlanga or mule pa omole pothoi omole ako o pathun tomo mun nge tokokoe mun pelie. <sup>34</sup> Na o ria or paini ve, “I nunganga, Toko Pomnga i los werera lale. Na i velpoltun a Saimon.” <sup>35</sup> Na or paini o ria mun or nge ur alavusnga aka i velpol a or paini nge a sovengalo, nako or paini o ate senu ol Toko Pomnga aka i reku bret.

*Jisas i velpoltun ile wainlangaere.*

*(Mak 16:14-18; Jon 20:19-23; Pakeke 1:3-5)*

<sup>36</sup> Na rongan or paini o ri, na Jisas i velpoltun or, ma i ria or ve, “Lemi moring aro i voth tomo nge thomu.”

<sup>37</sup> Ma or alavusnga o kukuk nge ma o ngeip, eneke olemi ve o thopol ake ini toko oni. <sup>38</sup> Ma i ria or ve, “Mothong tova o kukuk, na o mothong tova lomumu pelekpol. <sup>39</sup> Na o thopol menik salemi na o thopol mun evek naro lomumu mire aka ini tho re ake. Na o krim rum tho, tho ranga ve ini toko oni avele, eneke nik peti na pokinngek ake ru i voth.”

<sup>40</sup> Na i ri venen aken lama i pathengal or nge imeni salemi na ieve. <sup>41</sup> Na olemi sivenga rintet, aveto rongan olemi pelekpol na olemio nge i aka ini neneanga rongan. Mako i nina or ve, “Aning pelie aken ru i voth?” <sup>42</sup> Mako o sungu silang menenga epee a i nge. <sup>43</sup> Ma i ela i ma i an i a otheki.

<sup>44</sup> Lama i ria or ve, “Na nge wop lemi aka tho voth tomo nge thomu nomenga, tho ria mun thomu nge ur areke. Na ur alavusnga aka i ri nge

tho, ako a God ile riong ako Moses na God ile riong elngare o wat i, i velpol nunganga lale.”

<sup>45</sup> Mako i panine ole mire, nge ur areko i voth a God ile erere nge. <sup>46</sup> Ma i ria or ve, “Riong ake i voth a God ile erere nge, ‘Toko aka God i ateal i mo aro i el werer ile tokokoere, aro i el tel matheong naro i los werera nge rinong tova ve nang or me i vus. <sup>47</sup> Naro tokokoere o el engenging nge iion naro o panongpol nge vothung kerenga onolpotnga na nge sovengalo aka aro God ilemi simikal vothung kerengare nge. Naro ole panongpolong aro i patea a Jerusalem na i mulal nge pen alavusnga ake ru a ulue.’

<sup>48</sup> Naro thomu o panongpol nge ur areko thomu o thopol i. <sup>49</sup> Naro tho pakeu Oni Riringa a thomu nge me. Ini ur aka Vovo i kin ile riong nge lale ve aro i sungu i a thomu nge. Aveto aro thomu o men inga a rem pomnga i pavurvur aka la nge nang aka aro thomu o el a God ile engenging nge.”

*God i ela Jisas a Pen a Urvet la.*

*(Mak 16:19; Pakeke 1:9-11)*

<sup>50</sup> Lama i wolpot or a Betani la. Na i paesa imeni alaini roro ma i nong a God nge mo aro i oma senu nge or. <sup>51</sup> Na rongan i nong na God i elteta i a or nge, ma i paesa i a Pen a Urvet la. <sup>52</sup> Ma o lotual i ma o lo werer a Jerusalem tomo nge lemi sivengaing aolonga. <sup>53</sup> Na evelelnga ol, o pathun a Lotu Tepun a Vel a lok lemi na o mosal ol inga aka ini a God iriseanga.

Na i re aken. I vus.

cli

**God Ile Riong Kinnga Ponganga nge  
Mangsengre Okei  
The New Testament in the Mangseng Language of  
Papua New Guinea  
Nupela Testamen long tokples Mangseng long Niugini**

copyright © 1999 Wycliffe Bible Translators, Inc.

Language: Mangseng

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 11 Nov 2022 from source files  
dated 9 Oct 2020

65e1c726-2893-536b-a159-517869464e50